

ಯೋಗ ಬಯಂದಕ....!

◆ ಹೊಟ್ಟೆಗಡ ಸ್ವಾತಿ



ಕರ್ನಾಟಕ ಕೂಡವ ಸಾಹಿತ್ಯ ಅಕಾಡೆಮಿ, ಪುಡಿಕೇರಿ

ಯೋಗ ಬಯಂದಕ.....!

ಹೊಟ್ಟೆಂಗಡ ಸ್ವಾತಿ
ಮಡಿಕೇರಿ



ಕರ್ನಾಟಕ ಕೂಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

“YOGA BAYANDAKA” - written by Smt. HOTTENGADA SWATHY,
Hysodlur village, Virajpet T. q., Kodagu Dist; Published by
Karnataka Kodava Sahithya Academy, Madikeri.

ಆದ್ಯ ಮುದ್ರಣ : 2012

ಪ್ರತಿ : 500

ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್

ಪ್ರಕಟ ಪಡಾತ್‌ನವು : ಕರ್ನಾಟಕ ಕೂಡವ ಸಾಹಿತ್ಯ ಅಕಾಡೆಮಿ,
ಮ್ಯಾನ್ಸ್ ಕಾಂಪೌಂಡ್, ಮಡಿಕೇರಿ 571 201
ದೂ. : 08272-229074

ಕ್ರಯ : ₹ 105/-

Price : ₹ 105/-

ಅಚ್ಚಾರ : ಹೈಷೀಕ ಗ್ರಾಫಿಕ್ಸ್ & ಸ್ಟೀಡ್‌ಪ್ರಿಂಟ್ ದರ್ಬೆ, ಪುತ್ತೂರು
08251-233051

ಅಧ್ಯಕ್ಷಾಂಡ ತಕ್ಕ

ಯೋಗ ಬಯಂದಕ ಎಣ್ಣುವ ಪುಸ್ತಕತ್‌ನ ಶ್ರೀಮತಿ ಹೊಟ್ಟೆಂಗಡ ನ್ವಾತಿ, ಹೈ ಸೊಡ್ಲರ್ ಗ್ರಾಮ ಇಯಂಗ ಸಂಗ್ರಹ ಮಾಡಿತ್ ಎಳೊದಿತ್. ಈ ಪುಸ್ತಕತ್‌ನ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ 2011-12ನೇ ಕಾಲತ್‌ರ ಪುಸ್ತಕ ಪ್ರಕಟಣೆ ಯೋಜನೆಲ್ ಕೊಡವ ಸಾಹಿತ್ಯ ಅಕಾಡೆಮಿ ಪ್ರಕಟಪಡ್‌ತಿತ್.

ಈನ ಎಡ್‌ತಿತ್ ಓದುವ ಕೊಡವಾಭಿಮಾನಿಯ ವಿಮರ್ಶೆ ಮಾಡಿತ್ ಎಕ್ಸ್‌ಕರ್‌ತಿಕ್ ಪುರ್‌ಡ್ ಕೊಡ್‌ಪದಲ್ಲತೆ, ಕೊಡವ ಭಾಷೆ, ಸಾಹಿತ್ಯ ಸಂಸ್ಕೃತಿನ ಬೊಳೊತುವಕೂ ಪುಸ್ತಕ ಎಡ್‌ತಿತ್ ಓದುವಾಂಡ ಮೂಲಕ ಸಹಕಾರ ತರಂಡೂಂದ್ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಆಡಳಿತ ಮಂಡಳಿರ ಪರವಾಯಿತ್ ಕೆಲೆಬಿ.

ಐಮುಡಿಯಂಡ ರಾಣಿ ಮಾಚಯ್ಯ
ಅಧ್ಯಕ್ಷ
ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ
ಮಡಿಕೇರಿ

ಎಚ್ಚರಿಕೆ ತಕ್ಕ

ಇಂದೇತ ಕಾಲತ್ ಮೊಬೈಲ್ ಇಲ್ಲತ ಜನಳೆ ಇಲ್ಲೆ. ದಾಡ ಕೈಲೂ ನೋಬ್‌ಚೇಂಗಿ ಮೊಬೈಲ್ ಇಂಜತೇ ಇಪ್ಪ. ಮೊಬೈಲ್‌ನುಂಡ್ ಎಚ್ಚಕ್ ಅನುಕೂಲ ಉಂಡೋ ಅಚ್ಚಿಕೇ ತೊಂದರೆಯೂ ಉಂಡ್.

ಓದುವ ಮಕ್ಕಡ ಕೈಲ್ ಮೊಬೈಲ್ ದುಂಚಿಪೋಯಿತ್. ಅದೋರ್ ಫ್ಯಾಷನ್. ಪೊರಮೆ ಓದುವಕ್ ಮಕ್ಕಳ ಬುಡುವಕ ಅಪ್ಪವ್ವ, ದೂರ ತುಳ್ಯಂದ್ ಮೊಬೈಲ್ ಎಡ್ತಕೊಡ್‌ಪ. ಆಚೇಂಗಿ ಆ ಮೊಬೈಲ್ ನುಂಡ್ ಆಪದ್ ಎನ್ನತದ್ ! ಒರ್ ಮಿಸ್‌ಕಾಲ್, ಮೆಸೇಜ್, ಗೊತ್ತಿಲ್ಲತಯಂಗಡ ಪರಿಚಯ ಅಲ್ಲಂಜ ಲವ್ವ್ ಇನ್ನತ ಕಳಯಲ್ಲತ ಕಳ.

ಪುಚ್ಚಿಕಳ ಕಳಚಂಡೇ ಬಯ್ಯಕ್ ಅದ್ ಬಲ್ಯದಾಯಿ ಪೋಪದೂ ಉಂಡ್. ಈ ಕಥೆರ ಮಾದಲಿ.

ಮೊಬೈಲ್ ಎಣ್ಣುವದ್ ಎಚ್ಚಕ್ ಬೋಂಡುವೋ ಅಚ್ಚಕತ್ತಿರಂಡು. ಓದುವ ಮಕ್ಕಕ್ ಮೊಬೈಲ್‌ರ ಅವಶ್ಯಕತೆ ಇಲ್ಲೆ. ಪಂಡ್ ಎಚ್ಚಕೋ ದೂರತಿಂಜಂಡ್ ಓದತಿಲ್ಲೆಯಾ? ಅಕ್ಕ ಮೊಬೈಲ್ ಇಂಜತಾ?

ನಾಡ ಈ ಕಥೆನ ಪುಸ್ತಕ ರೂಪತ್ ಬೊಳಪಡ್‌ತುವಕ್ ಮಿಂಞುಕ್ ಬಂದ್ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಕ್ ನಾಡ ಮನದುಂಬ್‌ನ ಕೃತಜ್ಞತೆ.

ಹೊಟ್ಟೆಂಗಡ ಸ್ವಾತಿ

ಹಾಯ್ ದಿವ್ಯ ಎನ್ನನೆ ಉಳ್ಳಿಯಾ?

ನಾನ್ ಚಾಯಿತೇ ಉಳ್ಳ. ನಿಂಗ ದಾರ್?

ಎಂತ ಮೂಡಿ ಇಚ್ಚಕ್ ಬೆರಿಯ ಮರ್ಂದ್ ಪೋಯಾ? ಕೇಟತ್ ಗೊತ್ತಿಲ್ಲತಾಂಗೇ ಕೇಟಂಡುಳ್ಳ. ಚೆಡಿಲ್ ಎಣ್ಣೆಚಿ ದಿವ್ಯ ಇಕ್ಕ ಬಾರಿ ಜಂಭ ಬಂತ್ ಕಾಂಬಲ್ಲಾ? ಉತ್ತರ ಬಾತ್

ಹಲೋ, ಮಿಸ್ಟರ್ ಮೈಂಡ್ ಯುವರ್ ಲಾಂಗ್ವೇಜ್. ಚೆನ್ನ ಗೇನ ಮಾಡಿತ್ ತಕ್ಕ ಪರಿ

ನೀನ, ದಿವ್ಯ ತಾನೇ?

ಅಕ್ಕ.

ಅಕ್ಕ ನನ್ನ ಗೊತ್ತಿಲ್ಲೆಯಾ?

ಗೊತ್ತಿಪ್ಪಕ್ ನೀನೆಂತ ಮಹಾತ್ಮಾ ಗಾಂಧೀಜಿಯಾ, ಅಬ್ದುಲ್ ಕಲಾಂಮಾ? ಪೋನ್ ಮಾಡುವಕ ಚೆನ್ನ ಕಣ್ಣೆಬುಟ್ಟಿತ್, ನಂಬರ್ನ್ ಸೆರಿಯಾಯಿತ್ ನೋಟಿತ್ ಪೋನ್ ಮಾಡಿ. ದಾರ್ ದಾರಕೋ ಪೋನ್ ಮಾಡಿತ್ ಪುಚ್ಚಿಪರೆಯತಿ ಚೆನ್ನ ಜೋರ್ಲ್ ತಕ್ಕ ಪರಂದತ್ ದಿವ್ಯ.

ಹಲೋ... ನಿಂಗಕ್ ಮಾತ್ರ ಬಾಯಿ ಉಳ್ಳಂದ್ ಗೇನ ಮಾಡತಿ. ಎನ್ನತೋ ತಪ್ಪಿತ್ ಮಾಡಿಟ ನಾನ್ ನಾಡ ತಂಗೆ ದಿವ್ಯಂಗ್ ಮಾಡ್ನ ಅದ್ ಈ ಘಾಟಿ ದಿವ್ಯಂಗ್ ಪೋಯಿರತ್ ಕೆಣಕ್ಚಿ ದರ್ಶನ.

ನೋಟಿ, ಬಾಯಿಕ್ ಬಂದನಕೆ ತಕ್ಕ ಪರಂದಡುಳ್ಳ ನಿಂಗ. ನಾನಲ್ಲ. ಅಚ್ಚಕ್ ಕ್ಲೋಸ್ ಉಂಡೇಂಗಿ ತಂಗೆರ ತಕ್ಕಕೂ, ಬೋರೆಯಿಂಗಡ ತಕ್ಕಕೂ, ವ್ಯತ್ಯಾಸ ಗೊತ್ತಾಪ. ನಿಂಗಡ ಮಾದರಿ ತಕ್ಕ ಪರೆಯುಲೆ. ತಿರಿತ್ ಎಣ್ಣೆಚಿ ದಿವ್ಯ.

ನಿಂಗಕ್ ಬಿ. ಪಿ ಇಕ್ಕು, ಆಸ್ಪತ್ರೆಕ್ ಪೋಯಿತ ನೋಟಿಚಿಡಿ ಎಣ್ಣೆಚಿ ದರ್ಶನ. ಅದ್‌ನ ನೀನ್ ಎಣ್ಣುವ ಅವಶ್ಯಕತೆ ಇಲ್ಲೆ. ನಾಡ ಆರೋಗ್ಯತನ ನೋಟಿಯವಕ್ ನಾಕ್ ಚಾಯಿತೇ ಗೊತ್ತುಂಡ್. ನೀನೇ ಪೋಯಿತ್ ಕಣ್ಣೆ ಟೆಸ್ಪ್‌ಮಾಡಿತ್ ಕನ್ನಡಿ ಇಟ್ಟು ಪೋನ್ ನಂಬರೆಲ್ಲಾ ಸೆರಿಕ್ ಕಾಂಬ, ಎಣ್ಣಿತ್ ಪೋನ್ ಕಟ್ವ್ ಮಾಡ್‌ಚಿ ದಿವ್ಯ.

ಭೇ, ಈ ಮೊಬೈಲ್ ಎನ್ನಂಗ್ ಬಾತೋ ಎಚ್ಚಕ್ ಅನುಕೂಲ ಉಂಡೋ, ಅಚ್ಚಿಕೇ ಬೋಂಡತ್‌ದ್. ಇಕ್ಕ ತಪ್ಪಿತ್ ಮಾಡುವ ಬಯ್ಯಂಜಿ ಫೆಂಡ್‌ಶಿಪ್ ಅಲ್ಲಿಂಜ ಲವ್ಸ್. ಇವಂಗ್ ಎಚ್ಚಕ್ ಅಹಂಕಾರ ಇಕ್ಕು ನಾಕೇ ಬಿ. ಪಿ. ಟೆಸ್ಪ್ ಮಾಡುವಕ್ ಎಣ್ಣುವ ಒಬ್ಬಳೇ ಗೊಣಂಗಿಯಂಡತ್ ದಿವ್ಯ.

ಎಂತಾಚಿ ದಿವ್ಯ ಕೇಟತ್ ಕಲ್ಪನಾ

ಒಂದೂ ಇಲ್ಲೆರೇ ದಾರೋ ತಪ್ಪಿತ್ ಪೋನ್ ಮಾಡಿಯದೂ ಅಲ್ಲತೆ, ನಾಕೇ ಇಲ್ಲತಾನ ಎಣ್ಣುವ. ಕಲ್ಪನಂಗ್ ನಡಂದಾನ ಎಣ್ಣಿಕೊಡ್‌ತತ್ ದಿವ್ಯ.

ಓಹೋ, ಅವಂಗ್ ಅಚ್ಚಕ್ ಅಹಂಕಾರ ಉಂಡಾ? ನೀನ್ ಅವಂಡ ಕೂಡೆ ತಕ್ಕ ಪರಿ. ತಕ್ಕ ಪರಂದಂಡೇ ಅಹಂಕಾರತನ ಅಡ್‌ಕನ ಎಣ್ಣೆಚಿ ಕಲ್ಪನ.

ನೀನ್, ಮುಂಡತಿರ್ ಇಕ್ಕ ಬಜ್ಜದ್ ಮದಿ. ಒಂದಾಂಗ್ ದಂಡ್ ಆಪದ್ ಬೋಂಡ. ಎಣ್ಣೆಚಿ ದಿವ್ಯ.

ನೋಟ್ ದಿವ್ಯ ನೀಕ್ ಅವೊ ದಾರಂದೇ ಗೊತ್ತಲೆ ಅವಂಗೂ ನೀನ್ ದಾರ್, ಎನ್ನನೆ ಉಳ್ಳಿಯಾಂದೂ, ಗೊತ್ತಲೆ ಗೊತ್ತುಳ್ಳ ಮೊಬೈಲ್ ನಂಬರ್ ಮಾತ್ರ ಇಕ್ಕ ಚೆನ್ನ ಕಳಿಪಿಚಿಡ್. ಅದ್ ಎಂತೇಂಗಿ ಜಾಸ್ತಿ ಆನಕ ಸಿಮ್ ಬೋರೆ ಮಾಡ್‌ಚೇಂಗಿ ಆಚಿ. ವೆರಿ ಸಿಂಪಲ್ ಎಣ್ಣೆಚಿ ಕಲ್ಪನಾ.

ಎಂತ ತಕ್ಕಂದ್ ಪರೆಯುವಿಯಾ ಕಲ್ಪನಾ? ಅವಂಡ ಕೂಡೆ ನಾಕೆಂತ ಕಳಿ?

ನೀಕೆಲ್ಲಾ ದಾರ್ ಎಣ್ಣೆವೊ? ಕಾಲೇಜ್, ಹಾಸ್ಟೆಲ್ ಲೈಫ್‌ನ ಇಕ್ಕ ಎಂಜಾಯ್ ಮಾಡತನಕೆ. ಮಂಗಲಾನ ಪಿಂಇ ಮಾಡುವಿಯಾ? ಮಿಂಇಕ್

ಎನ್ನನೇಂದ್ ಎಣ್ಣಿಯುವಕ್ ಕಯ್ಯಲೆ. ಮಂಗಲಾಪಂವೊ ಎಂತಂವೊ ಆಯಿತಿಪ್ಪಾಂದ್ ದಾರಕ್ ಗೊತ್ತಾ? ನಲ್ಲಂವೊ ಆಚೇಂಗಿ ಪರೋಲೆ ಇಲ್ಲತ ಪೋಚೇಂಗಿ ಕಣ್ಣೀರೇ ಗತಿ. ಎಣ್ಣೆಚಿ ಕಲ್ಪನ.

ಎಂತ ಬಾರಿ ಅನುಭವ ಉಳ್ಳ ಮಾದರಿ ತಕ್ಕ ಪರಂದಂಡುಳ್ಳಿಯಾ? ಕೇಟತ ದಿವ್ಯ.

ಇದಂಗೆಲ್ಲಾ ಅನುಭವ ಆಂಡುಂದೇ ಇಲ್ಲೆ. ನೋಟಿತೇ ಅರ್ಥ ಮಾಡಿಯವಲು. ಇಂದೇತ ಕಾಲತ್ ಎಲ್ಲಿ ಜಾಗ ಕ್ಕಟ್ಟುವೋ ಅಲ್ಲಿ ನುಗ್ಗಂಡು. ಬಯ್ಯ ಬಯ್ಯ ಕಳಿಚಕ. ಬಯ್ಯತಾಲೇ ನಿಪ್ಪಚಿಟ್ಟಾರುವಾ? ನೀಕ್ ಒಂದೂ ಬೋಂಡ ಒಮ್ಮತೆ ಬೈಟ್ ಪನ್ನಂದ್, ಪನ್ನೆರಂಡ್ ಗಂಟಿಕ್ ಹಾಸ್ಪೆಲ್ ರ ಒರ್ ಸುತ್ತ ಇಡ್ ನೀಕೇ ಗೊತ್ತಾಪ ಎಣ್ಣೆಚಿ ಕಲ್ಪನ.

ಬೋಂಡತ ವಿಷಯಕ್ ನಾಡ ವರಕ್ ನ ಪಾಳಾಕುಲೆ. ದಾರ್ ಎಂತೇಂಗಿ ಆಡ್, ಎಂತ ಬೋಂಡೇಂಗಿ ಮಾಡಡ್. ನಾಡ ಲೈಫ್ ನಾಕ್.

ಅಮ್ಮಾ ತಾಯಿ, ಎಂತೇಂಗಿ ಮಾಡ್ ನೀಕ್ ಎಣ್ಣುವಿಯಲ್ಲಾ ನಾಕ್ ಬುದ್ಧಿ ಇಲ್ಲೆ ಮಂಡೆ ಬಡ್ಚಂಡ್ ಬುದ್ಧಂಡತ್ ಕಲ್ಪನ.

ದಿವ್ಯ ಮಾಚಯ್ಯ ಪಿಂಇ ಮಾಚಮ್ಮ ದಂಪತಿಯಡ ದಂಡ್ ಮಕ್ಕಡಾತ್ ಪೆರಿಯವ ಬೆಂಗಳೂರ್ ಕಾಲೇಜ್ ದಂಡನೇ ಬಿ. ಎಸ್ಸಿ. ಓದಿಯಂಡಿಂಜತ್. ಇಂಇಸೋರ್ ಮೋಂವ ಕೊಡಗ್ಲೇ ಪಿ. ಯು. ಸಿ. ಮಾಡಿಯಡುಂಡ್ ದಿವ್ಯ ಓದುವಾತ್ ದುಂಬಾ ಹುಷಾರ್. ಸುಮಾರ್ ಸ್ಕಾಲರ್ ಶಿಪ್ ಎಲ್ಲಾ ಕ್ಕಟ್ಟುವಂಜತ್, ಚಾಯಿಕರ್ತಿ ಅಲ್ಲತ ಪೋಚೇಂಗಿಯೂ ಲಕ್ಷಣ. ಅವಡ ಪೂಂಇ. ಕಣ್ಣ್, ಅವಳ ನೋಟುವನಕೆ ಮಾಡುವಂಜತ್.

ಈ ಮೂಡಿಕ್ ಎಚ್ಚಕ್ ಚೊಕ್ಕ. ಇಂದೆಕೆತ್ತಣೆ ದಾಡ ಕೈಲೂ ಇನ್ನತ ಬೈಗಳ ಕೇಟಂಡಿತಿಲ್ಲೆ. ತಪ್ಪಿತ ಪೋನ್ ಬಂದಾಂಗ್ ಇನ್ನನೆ ಕಳಿಕಂಡುವಾ? ಬಾರಿ ಬಲ್ಯ ತ್ರಿಪುರ ಸುಂದರಿ ಕಾಂಬ. ಇವಳ ಮಂಗಲಾಪಂವೊಂಡ. ಪಾಡ್ ಪಾಡೇ ಎಣ್ಣಿಯಂಡ್ ಬಜ್ಜತ್ ದರ್ಶನ್.

ನಾನ್ ಪೋಪಾಂಡ ಒಳಲ್ ಇವಕೋರ್ ಪಾಠ ಪಡಿಪ್ ಚೆಡುವಿ.

ಮಾಡುವಿ ನೋಟ್‌ನೀಕ್ ಗೇನ ಮಾಡಿಯಂಡ್ ಬುದ್ಧಂಡತ್ ದರ್ಶನ.

ದರ್ಶನ್ ಕಾಳಯ್ಯ ಪಿಂಞ ಚೋಂದವ್ವ ದಂಪತಿಯಡ ದಂಡ್ ಮಕ್ಕಡಾತ್ ದಂಡನೆಯಂವೊ. ಆರ್ಮಿಕಾರ, ಮೂಂದ್ ತಿಂಗ ರಜ ಎಡ್ತಂಡ್ ಮನೆಕ್ ಬಂದಿತಿಂಜತ್ ಉದ್ದಕೂ ಬಣ್ಣತೂ ಚಾಯಿಕಾರ. ಅಣ್ಣ ದಿನೇಶ್ ಮಂಗಲಾಯಿತ್ ಬೆಂಗಳೂರ್‌ಲ್ ವಾಸ ಉಂಡ್ ತಾಂಡ ಕುಂಞವ್ವಂಡ ಮೋವ ದಿವ್ಯಂಗ್ ಮಾಡ್‌ನಲ್ಲಿ ಅದ್ ಪೋನದ್ ಘಾಟಿ ದಿವ್ಯಂಗ್.

ದರ್ಶನ್ ಪೋಲಾಕ ಬೆರಿಯ ಎದ್ದಿತ್. ಪೊರಡುವಕ್ ರೆಡಿ ಆಚಿ. ಅಕ್ಕಣೆಕ್ ಅವ್ವ ಚೋಂದಮ್ಮ ಎನ್ನಂಗೋ ಕೋಂಬರೆಕ್ ಬಾತ್.

ಎಂತ ದರ್ಶನ್ ಎಲ್ಲಿಕೋ ಪೋಪಕ್ ರೆಡಿ ಆಯಿತುಳ್ಳಿಯಾ? ಕೇಟತ್ ಚೋಂದಮ್ಮ. ಅಕ್ಕ ಮಮ್ಮಿ, ಚೆನ್ನ ಪೇಟೆಕ್ ಪೋಯಿತ್ ಬಪ್ಪಿ. ಎನ್ನ ಇಂಜಕ್ಕಿಂಜನಕೆ?

ಅನ್ನನೆ ಒಂದೂ ಇಲ್ಲೆ. ಮುಂಡತೇ ಸುತ್ತಿಯಾ ಬಕ್ಕಾಂದ್. ಸುಮಾರ್ ಸಮಯ ಆಚಲ್ಲಾ.

ಸೆರಿ. ಬೆರಿಯ ಬಂದಾರ್.

ಮಜ್ಜಣಕ್ ಕಡಂಬುಟ್ ಪಂದಿಕರಿ ಮಾಡುವಿ. ಆಚಿ ಬಪ್ಪಿ.

ಸೆರಿ ಪೋಯಿತ್ ಬಾ.

ದರ್ಶನ್‌ರ ಮನಸ್ಸೊರಳಲೇ ದಿವ್ಯಂಡ ಮೇಲೆ ಚೆಡಿ ಬಪ್ಪಿಯಿಂಜತ್. ಮನಸ್ಸಲೇ ಗೇನ ಮಾಡಿಯಂಡ್ ನೇರೆ ಮೊಬೈಲ್ ಶಾಪಕ್ ಪೋಚಿ.

ಮೆಸೇಜ್ ಬಣ್ಣೆ ಉಳ್ಳ ಸಿಮ್ ಉಂಡಾ? ಕೇಟತ್ ದರ್ಶನ್.

ನೋಟಿ ಸರ್ ಈ ಬಿ.ಎಸ್.ಎನ್.ಎಲ್. ಪುದಿಯ ಆಫರ್ ಉಂಡ್. ಅನ್‌ಲಿಮಿಟೆಡ್ ಮೆಸೇಜ್ ಬಣ್ಣೆ. ಎಣ್ಣೆಚಿ ಶಾಪ್‌ಕಾರ.

ಸೆರಿ ಅಂದಕ ಅದನೇ ತಾರಿ ಎಣ್ಣೆಚಿ ದರ್ಶನ್.

ಸಿಮ್ ಎಡ್ತಂಡ್ ನೇರೆ ಮನೆಕ್ ಬಂದ ದರ್ಶನ್ ಪಳೆಯ ಮೊಬೈಲ್‌ಕ್ ಆ ಸಿಮ್ ಇಟ್ಟಿತ್ ತಾನ್ ಎನ್ನತದೋ ಬಲ್ಯ ಸಾಧನೆ ಮಾಡಿಯಂಡುಳ್ಳಂದ್ ಗೇನ ದರ್ಶನಕ್.

ಮೆಸೇಜ್ ಅಯಪಕ್ ಸುರು ಮಾಡ್‌ಚಿ.

ಹಾಯ್ ಸ್ವೀಟಿ, ಹೌ ಆರ್ ಯೂ?

ದಿವ್ಯಂಡ ಮೊಬೈಲ್ ರಿಂಗಾಚಿ.

ಇದ್ ದಾರಪ್ಪಾ? ಪುದಿಯ ನಂಬರಕಾರಂದ್ ಗೇನ ಮಾಡಿಯಂಡ್, ಮೆಸೇಜ್ ನೋಟ್‌ಚಿ ದಿವ್ಯ. ದಾಡ ಪೆದವೂ ಇಲ್ಲೆ ಒಂದೂ ಇಲ್ಲೆ. ಮೊನಿಯಾಂದ್‌ರನಕೆ ಕಾಂಬಾಂದ್ ಗೇನ ಮಾಡಿತ್ ಮುಂಡತಾಯಿರತ್ ದಿವ್ಯ. ದರ್ಶನ ಪುನಾದಿಯೋ ಒರ್ ಮೆಸೇಜ್ ಅಯಿಚತ್. ಅದಂಗೂ ಉತ್ತರ ಇಲ್ಲೆ.

ದರ್ಶನ್ ಕ್‌ಟ್‌ಕ್‌ಟ್‌ನ ಮೆಸೇಜ್‌ನ್ನೆಲ್ಲಾ ಅಯೆಪ ಕೂಡ್‌ಚಿ. ಎಂತ ಅಯೆಚತೇಂಗಿಯೂ, ತಿರ್‌ಗಿತ್ ಒರೂ ಮೆಸೇಜ್ ಬಂದ್‌ಲೆ.

ದರ್ಶನ್‌ಕ್ ಇಂಞ ಚೆಡಿ ಬಾತ್. ಅಲ್ಲಾ ಅಂದ್ ಅಚ್ಚೆಕ್ಲೆಲ್ಲಾ ಬಾಯಿಬಡ್‌ಚವ ಇಂದ್ ಎನ್ನಂಗ್ ಮುಂಡತಾಯಿಟ? ಬೈಯುವ ಇಂಜತಲ್ಲಾ? ಎನ್ನಾಯಿರತ್ ಗೇನ ಮಾಡಚಿ ದರ್ಶನ್.

ಮುಂಡತೇ ಮೆಸೇಜ್‌ರ ಕೂಟ್‌ಕ್ ಮಿಸ್ಡ್‌ಕಾಲ್ ಇಡುವಕ್ ಕೂಡ್‌ಚಿ. ಒಂದಾಂಗೂ ಸದ್ದ್ ಸರ ಇಲ್ಲೆ.

ದಿವ್ಯಂಗ್ ದಿನ ಪೋನನಕೆ ಈ ಮೆಸೇಜ್ ಮಿಸ್ಡ್‌ಕಾಲ್ ಮಾಮೂಲ್ ಆಯಿರತ್. ಮುಂಡತೇ ಇಂಜತೇಂಗಿ ಮಾಡಿ ಮಾಡಿ ಮದಿ ಬಂದಿತ್ ನಿಪ್ಪಾಚಿಡುವ ನಂಗ ತಿರ್‌ಗಿತ್ ಅಯೆಚಕ ಜಾಸ್ತಿ ಆಪಾಂದ್‌ಗೇನ ಮಾಡಿತ್ ಬಂದ ಮೆಸೇಜ್‌ನ್ನೆಲ್ಲಾ ಡಿಲಿಟ್ ಮಾಡಿತ್ ತಾಂಡ ಪಾಡ್‌ಕ್ ಇಪ್ಪಯಿಂಜತ್ ದಿವ್ಯ.

ಇನ್ನನೆ ಒರ್ ತಿಂಗ ಕಯಿಂಜತ್. ದರ್ಶನ್ ತಾಂಗ್ ಗೊತ್ತಿಲ್ಲತನೆಕೆ ದಿವ್ಯಂಗ್ ಮೆಸೇಜ್ ಮಾಡುವ ಇಂಜತ್.

ಛೇ, ನಾನ್ ತಪ್ಪ್ ಮಾಡಿಟ. ಅನಾವಶ್ಯವಾಯಿತ್ ದಿವ್ಯಂಗ್ ತೊಂದರೆ ಕೊಡ್‌ತ. ಅವ ಒರ್ ನಲ್ಲ ಮೂಡಿ. ಮೂಡೀಂದ್ ನೋಟತೆ ಕ್‌ಟ್ ಕ್‌ಟ್‌ನ ಮೆಸೇಜ್‌ನ ಅಯೆಚ. ನಾನ್ ಇನ್ನನೆ ಮಾಡಂಡಿಂಜಿಲೆ. ಅವಳ

ಮಾಫ್ ಕೇಕಂಡು. ಎಂತ ಮಾಡವ ಇಕ್ಕ. ಎನ್ನನೆ ಪೋನ್ ಮಾಡಡ್.. ಅವ ನಾಡ ಕೂಡೆ ತಕ್ಕ ಪರೆಯುವಕ್ಕಿಲ್ಲ. ಈ ನಂಬರ್‌ಲ್ ಪೋನ್ ಮಾಡ್‌ನಕ ನಾನೋರ್ ಪೋಕರಿ ಆಯಿರುವಿ. ಇಕ್ಕ ಬೋಂಡ ಚೆನ್ನ ದಿನ ಕಯ್ಯಡ್ ಪಂಜಾಬ್‌ಕ್ ಪೋನ ಪಿಂಇ ಆ ನಂಬರ್‌ಲ್ ಪೋನ್ ಮಾಡುವಿ. ಗೇನ ಮಾಡಿಯಂಡ್ ಪಳೆಯ ನಂಬರ್‌ಲೇ, ನಲ್ಲ ನಲ್ಲ ಮೆಸೇಜ್ ಅಯಪ ಕೂಡಚಿ ದರ್ಶನ.

ಓಹೋ, ಈ ಮನುಷ್ಯಂಗ್ ನಲ್ಲ ಬುದ್ಧಿ ಬಂದನಕೆ ಕಾಂಬ. ಬಾರೀ ನಲ್ಲ ನಲ್ಲ ಮೆಸೇಜ್ ಅಯೆಚಡುಂಡ್. ದಾರೋ ಇವಂಗ್ ಜ್ಞಾನೋದಯ ಮಾಡಿಚಿಟ್ಟಿತ್ ಕಾಂಬ. ಮಾಡಡ್ ಎಚ್ಚಕ ದಿನಾ? ಒಂದಲ್ಲ ಒರ್ ದಿನ ಇದೂ ನಿಂದ್ ಪೋಪ ಮನಸ್ಸಲೇ ಗೇನ ಮಾಡಿಯಂಡತ್ ದಿವ್ಯ.

ದರ್ಶನ್ ಪೊಲಾಕ, ಬೈಟೂ, ಮಜ್ಜಣ ದಿವ್ಯಂಗ್ ಮೆಸೇಜ್ ಅಯೆಪ ಕೂಡ್‌ಚಿ. ದರ್ಶನಕ್ ತಾಂಗೇ ಗೊತ್ತಿಲ್ಲ ತನಕೆ ದಿವ್ಯಂಡ ಮೇಲೆ ಆಸೆ ಪುಟ್‌ಚಿ. ಅವಡ ಕೂಡೆ ತಕ್ಕ ಪರೆಯಂಡುಂಡ್, ಮನಸ್ಸ ಎಣ್ಣಕಲೂ ಬಾಯಿ ಬಪ್ಪಯಿಂಚಿಲೆ. ತಾನ್ ದಿವ್ಯನ ಕಳಿಪಿಡಂಡೂಂದ್ ಬೀಜ್ ಬಲೆಕ್ ದರ್ಶನೇ ಬುದ್ಧತ್. ಛೇ, ನಾನೆಂತ ಮಾಡಿಟ ನಾಕ್ ಎಂತಾ ಯಡುಂಡ್‌ಂದ್ ದರ್ಶನ್ ತನ್ನೇ ಪ್ರಶ್ನೆ ಮಾಡಿಯಂಡತ್.

ದರ್ಶನ್‌ರಲ್ಲಿ ಏದೋ ಒರ್ ತರತರ ಬದಲಾವಣೆ ಆಯಂಡುಂಡ್. ಅವ್ವ ಚೋಂದವ್ವ ಸುಮಾರ್ ದಿನತಿಂಜೆ ದರ್ಶನ್‌ನ ಕೇಕಂಡೂಂದ್ ಇಂಜತ್.

ಅಂದ್ ದರ್ಶನ್ ಬೈಟ್ ಉಂಗತೇ ಬುದ್ಧವಕ್ ಪೋಚಿ. ನೋಟನ ಚೋಂದವ್ವಂಗ್ ಆಶ್ಚರ್ಯ ಆಚಿ ಕೋಂಬರೆಕ್ ಪೋಯಿತ್ ಕಾಕ್‌ಚಿ.

ದರ್ಶನ್, ಬಾ ಉಂಬಕ್.

ಬೋಂಡ ಮಮ್ಮಿ ನಾಕ್ ಕೆಲಪಯಿಪ್‌ಲೆ.

ಬೈಟ್ ಉಂಗತೆ ಬುದ್ಧವಕಾಗ.

ಇಲ್ಲೆ ಮಮ್ಮಿ ನಾಕ್ ಬೋಂಡ.

ನೀನ್ ಬಂದಲ್ಲಿಂಚೇ ನೋಟಿಯಂಡುಳ್ಳ ಸುಮಾರ್ ದಿನತಿಂಜ ನೀಕ್

ಸೆರಿಯಾಯಿತ್ ಕೂಳ್ ನೀರ್ ಒಂದೂ ಬೋಂಡ ತಾಯಿಟ್ತ್. ಎಕ್ಕಲೂ ಆ ಮೊಬೈಲ್ ಎಂತ ಕಳಿ ನೀಕ್. ಒರ ದಿನ ನೋಟ್ ಅದ್‌ನ ಎಡತಿತ್ ಕನ್‌ಚಿರುವಿ. ಚೆಡಿಲ್ ಎಣ್ಣೆಚಿ ಚೋಂದವ್ವ.

ಅಯ್ಯೋ ದಯ ಬೆಚ್ಚಿತ್ ಆ ಕೆಲಸ ಮಾಡತೆ. ಅದತ್‌ಲ್, ಅದತಲ್ ಬಿಕ್‌ಚಿ ದರ್ಶನ್.

ಹ್ಲಂ ಎಣ್ಣೆ? ಅದತ್‌ಲ್ ಎಂತ ಉಂಡ್?

ಒಂದೂ ಇಲ್ಲೆ ಎಚ್ಚರಾಚಿ ದರ್ಶನ್.

ನೀನೂ ನೀಡ ಕಳಿಯೂ ನೀಕೇ ಚಾಯಿ. ಬಾ ಇಕ್ಕ ಉಂಬಕ್ ಪುನಾದಿಯೊ ಕಾಕ್‌ಚಿ ಚೋಂದವ್ವ.

ಅಂತೂ ನೀನ್ ಬುಡುವನಕೆ ಇಲ್ಲೆ. ಚೆನ್ನ ತೆಳಿಚಿತ್ ಪರಂದತ್ ದರ್ಶನ್.

ಮಕ್ಕ ಎಚ್ಚಕ್ ಬಲ್ಯದಾಚೇಂಗಿಯೂ ಅವ್ವಪ್ಪಂಗ ಮಕ್ಕ ಮಕ್ಕಳೇ ನಂಗಡ ಕಷ್ಟ ನಿಂಗಕೆಲ್ಲ ಅರ್ಥ ಆಪಾ? ವಯಸ್ಸ್‌ಕ್ ಬಂದನಕೆ ರೆಕ್ಕೆಪುಕ್ಕ ಬಂದಿತ್ ಪಾರುವಕ್ ಕಳಿಪಿರಾ. ಪೆತ್ತಕರ್‌ರ ನೊಂಬಲ ನಿಂಗಕ್ ಗೊತ್ತಿಪ್ಪಾ. ಎಣ್ಣೆಚಿ ಚೋಂದಮ್.

ಮದಿ, ಮದಿ, ಕೇಪಕ್ ಬಂದಿರಾ, ಬಾರಿ ಎಲ್ಲಾರು ಕೂಡಿತ್ ಉಂಗನ. ಎಲ್ಲಾರು ಉಂಬಕಳತತ್.

ಉಂಡಿತಾಚಿ. ದರ್ಶನ್‌ಕ್ ವರ್‌ಕೇ ಇಲ್ಲೆ. ದಿವ್ಯಂಡದೇ ಗೇನ. ಎನ್ನನಿಕ್ಕು ದಿವ್ಯ ಚಾಯಿಕರ್ತಿಯಾ, ಇಲ್ಲೆಯಾ? ಕಡ್ಡಿಯಾ, ಡುಮ್ಮಿಯಾ, ಎನ್ನನಿಕ್ಕು? ತಕ್ಕ ಕೇಪಕ ಬಾರಿ ಚೆಡಿಕರ್ತಿ ಕಾಂಬ ಪರೋಲೆ ಆ ಚೆಡಿಲ್ ನಲ್ಲದುಂಡ್. ಇಕ್ಕ ನಾನ್ ಎನ್ನನೆ ತಕ್ಕ ಪರೆಯಡ್ ನಾನ್‌ಂದ್ ಗೊತ್ತಾನಕ ಅವ ಮುಂಡತಿಕ್ಕುವಾ? ಬೋಂಡ ಅಂತಿಂತೂ, ನಾಡ ಪೆದೆಣ್ಣಿತ್ತಿಲ್ಲೆ? ಅವಕ್ ಅಚ್ಚಕ್ ಬೆರಿಯ ನಾಡ ಸ್ವರ ಗೊತ್ತಾಪಕಿಲ್ಲೆ. ಎಲ್ಲಾಂಗೂ ಪಂಜಾಬ್‌ಕ್ ಪೋಯಿತ್ ಗೇನ ಮಾಡಿಯಂಡಿಜನಕೇ ವರಕ್ ಪತ್ತಚಿ ದರ್ಶನ್.

ದಿನ ಪೋನನಕೆ ದರ್ಶನ್‌ರ ರಜವೂ ತೇಂದಂಡ್ ಬಾತ್ ಒರ್ ದಿನ ಪೋಪಕ್ ರೆಡಿ ಆಚಿ. ದರ್ಶನ್ ಮಮ್ಮಿ ಪಪ್ಪಾ ನಾನ್ ಪೋಯಿತ್ ಬಪ್ಪಿ?

ಇಂಞ ಎಕ್ಕ ಬಪ್ಪಿಯಾ?

ಆಚಿ ಮೋನೆ ಚಾಯಿತಿರ್, ಪೋನನಕೆ ಪೋನ್ ಮಾಡ್ ಎಣ್ಣೆಚಿ ಕಾಳಯ್ಯ.

ಆಚಿ, ಪೋಯಿತ್ ಬಪ್ಪಿ.

ಸರಿ, ಪೋಯಿತ್ ಬಾ.

ದರ್ಶನ್ ಪಂಜಾಬ್ ಟ್ರೈನ್ ಪತ್ತಾಚಿ. ಆ ಟ್ರೈನ್‌ಕ್ ಒರ್ ಮೂಡಿ ಪತ್ತಾಚಿ. ದರ್ಶನ್‌ಕ್ ದಿವ್ಯನ ಗೇನ ಆಚಿ. ಇವ ಇನ್ನನೆ ಇಕ್ಕುವಾ? ಇಲ್ಲೆ, ಇವಡನ್ನಕೆ ಇಪ್ಪಕ್ಕಿಲ್ಲೆ. ಒರ್ ಸಮಯ ಅವನಾಡ ಮಿಂಞಾತ್‌ಲೇ ಬಾತೇಂಗಿಯೂ ನಾಕ್ ದಿವ್ಯ ಇವಳೇಂದ್ ಗೊತ್ತಾಪಕ್ಕಿಲ್ಲೆ. ವಿಧಿ ಎನ್ನನೆ ಕಳಿಪೋ ಅನ್ನನೆ ಕಳಿಕಡ್ ದಾರ್ ದಾರ್‌ನ ನಂಗ ಮೀಟ್ ಮಾಡಂಡುವೊ ಅದ್ ಆಯಿತೇ ಆಪ. ಅದ್‌ನ ತಪ್ಪಾಚಿಡುವಕ್. ದಾಡ ಕೊಂಡೂ ಕಯ್ಯಲೆ. ನಾನ್ ಇಕ್ಕ ದಿವ್ಯನ ಕಳಿಪಿಚಿಡುವಕ್‌ಂದ್ ಎಂತೆಲ್ಲಾ ಮಾಡ್‌ನ, ಆಚೇಂಗಿ ವಿಧಿ ಎಂತ ಮಾಡ್‌ಚಿ? ನಾಡ ಬಾಳ್‌ನೇ ತಿರ್‌ಕಿರತ್. ನಾಕ್ ಗೊತ್ತಿಲ್ಲತನಕೆ ದಿವ್ಯಂಡ ಮೇಲೆ ಆಸೆ ಪುಟ್ಟಚಿಟ್ಟತ್.

ಇದಂಗೆ ಎಣ್ಣುವ ಕಾಂಬ. ದಾರ್‌ಕೇಂಗಿ ಕೆಟ್ಟಾದ್ ಬಯಂದಕ ಅದ್ ಅಯಿಂಗಕೆ ತಿರ್‌ಗುವ ಅನ್ನನೆ ಆಚಿ. ನಾಡ ಬಾಳ್. ಪೆರಿಯಂಗಡ ತಕ್ಕಲ್ ಅರ್ಥ ಉಂಡ್. ದಾಡ ಮೇಲೆ ತುಂಬಾ ಚೆಡಿ ಇಪ್ಪೋ, ಅಲ್ಲಿ ಜಾಸ್ತಿ ಪ್ರೀತಿ ಇಪ್ಪ. ಇದೂ ಸಹ ಅಚ್ಚಿಕೇ ಸತ್ಯ. ನಾಡ ಚೆಡಿಯೆ ಇಂದ್ ಪ್ರೀತಿಯಾಯಿತ್ ಆ ಕೊದಿಕಾಯಿತ್ ಚಾತಕ ಪಕ್ಷಿರ ಮಾದರಿ ಪಾರ ಕಾಪನ್ನಕೆ ಮಾಡಿತ್. ನಂಗಡ ಹಣೆ ಬರಹತ್‌ಲ್ ಎಳ್‌ದಿತುಳ್ಳಾನ ದಾಡ ಕೊಂಡೂ ತಪ್ಪಾಚಿಡುವ ಕಯ್ಯಲೆ. ಏದೇದ್ ಎನ್ನನೆ ಆಕಂಡು ಅದ್ ಆಯಿತೇ ಆಪ. ಇನ್ನನೆ ಗೇನ ಮಾಡಿಯಂಡ್ ದರ್ಶನ್‌ಕ್ ಪಂಜಾಬ್‌ಕ್ ಎತ್ತನದೆ ಗೊತ್ತಾಯಿಲೆ.

ಎನ್ನೊ ದರ್ಶನ್ ಎನ್ನನೆ ಇಂಜತ್ ರಜ, ಕೇಟತ್ ಕೂಟ್‌ಕಾರ ಕರಣ್.

ಹ್ಯೊಂ, ಚಾಯಿ ಇಂಜತ್.

ಎನ್ನೊಗರೆ ಬಾಡಿತಿಳ್ಳಿಯಾ? ಎಂತಾಚಿ ನೀಕ್? ಒಂದೂ ಇಲ್ಲೆ.

ಅಲ್ಲಿಂಜ ಬಂದ ಸುಸ್ತು ಅಚ್ಚಿಕೆ.

ಸೆರಿಯಪ್ಪಾ ನೀನ್ ರೆಸ್ವ್ ಎಡ್ತ ಪೊಲಾಕ 3 ಗಂಟೆಕ್ ಡ್ಯೂಟಿಕ್ ಪೋಂಡು. ಅನ್ನನೆ ಪಪ್ಪಾ ಮಮ್ಮಿ ಅಣ್ಣ ಎಲ್ಲಾ ಚಾಯಿತುಂಡಲ್ಲಾ? ಕೇಟಿತ್ ಕರಣ್‌ಹೇಂ ಚಾಯಿತುಂಡ್.

ಸೆರಿ ಬಯ್ಯ ಕಾಂಬಿ ನಾನ್.

ಆಚಿ.

ಡ್ಯೂಟಿಕ್ ಪೊರಟಿತ್ ಕರಣ್.

ದರ್ಶನ್ ತಾಂಡ ಪಂಜಾಬ್ ಸಿಮ್‌ನ ಇಟ್ಟಂಡತ್ ದಿವ್ಯಂಗ್ ಇಕ್ಕ ಪೋನ್ ಮಾಡಡುಂದ್ ಗೇನ ಮಾಡಚಿ. ಬೋಂಡ ಅವ. ಚಾಕ್ರಿಕರ್ತಿಯೊ ಇಲ್ಲೆ ಓದಿಯಂಡುಂಡೇಂಗಿ ಡಿಸ್ಪರ್ಬ್ ಆಪ. ಎಲ್ಲಾಂಗೂ ಬಯಿಟಾಪಕ ಮಾಡುವಿ. ಆ ನೇರಕ್ ಎಲ್ಲಾರೂ ಆರಾಮ್ ಇಪ್ಪ ಗೇನ ಮಾಡಚಿ ದರ್ಶನ್. ಆರ್ ಗಂಟೆ ಆಚಿ.

ದರ್ಶನ್ ಮೊಬೈಲ್ ಎಡ್ತ ನಂಬರ್ ಒತ್ತಾಚಿ.

ಹಲೋ ಚಾಯಿತೆ ಉಳ್ಳಿಯಾ, ಕೇಟಿತ್ ದರ್ಶನ್.

ನಾನ ಚಾಯಿತೆ ಉಳ್ಳ ನಿಂಗದಾರ್. ದಿವ್ಯಂಡ ಅದೇ ಸ್ಟೈಲ್.

ನಾನ್ ದರ್ಶನ್‌ಂದ್ ಆರ್ಮಿಉಳ್ಳ. ನೀಡ ಜೊತೆಲ್ ತಕ್ಕ ಪರೆಯಂಡುಂದ್ ಆಚಿ ಅದಂಗ್ ಪೋನ ಮಾಡಿಯೆ.

ದಿವ್ಯಂಗ್ ದರ್ಶನ್‌ರ ಮೇಲೆ ನಂಬಿಕೆ ಬಂದ್ಲೆ. ದಾರೋ ಅವಳ ಗೊತ್ತುಳ್ಳಿಯಿಂಗಳೇ ಕಳಿಪಿಚಿಟ್ಟುಂಡ್ ಇಕ್ಕುಂದ್ ಗೇನ ಮಾಡ್‌ಚಿ. ಅದೂ ಅಲ್ಲತೆ ದಿವ್ಯಂಗ್ ಆರ್ಮಿಕಾರ ವಣ್ಣಾಚೇಂಗಿ ಗೌರವ ಇಂಜತ್.

ದಾರಾಯಿತಿಕ್ಕು ಗೇನ ಮಾಡಚಿ ದಿವ್ಯ.

ಪುನಾದಿಯೋ ಕೇಟಿತ್

ನಾನ್ ದರ್ಶನ್ ನೀನ್ ದಿವ್ಯ ತಾನೇ?

ಅಕ್ಕು.

ನೀಕ್ ದಾರ್ ನಾಡ ನಂಬರ ತಂದಿಯೇ?

ಅದ್ ಎನ್ನನೆಯೋ ಕ್‌ಟ್ಚಿ.

ಇಂಇ ಎಂತ ವಿಶೇಷ್?

ಒಂದೂ ಇಲ್ಲೆ. ನೀನ್ ನೇರಾಯಿತೂ ದಾರ್‌ಂದ್ ಎಣ್ಣೆ?

ನೇರಾಯಿತೂ ನಾನ್ ದರ್ಶನ್, ದರ್ಶನ್ ದೇವಯ್ಯ. ಇಲ್ಲೆ ನೀನ್ ಪೊಟ್ಟ ಪರಂದಂಡುಳ್ಳಿಯಾ? ಇಲ್ಲೆ ದಿವ್ಯ ನಾನ್ ನೇರಾಯಿತೂ ದರ್ಶನ್ ಎಂತ ಕಾಲೇಜ್ ಆಚಾ? ಒರ್ ಅಂದಾಜ್‌ಲ್ ಕೇಟತ್ ದರ್ಶನ್.

ಹ್ಲಂ ಆಚಿ.

ದರ್ಶನ್‌ಕ್ ದಿವ್ಯ ಇಂಇೂ ಓದಿಯಂಡುಳ್ಳಂದ್ ಗೊತ್ತಾಚಿ.

ದಿವ್ಯಂಗ್ ಎಂತೋ ಒರ್ ತರಾ ಬೇರ ಆಚಿ. ದಾರಾಯಿತಿಕ್ಕು? ಇಂವೊ ನಾಕ್ ಗೊತ್ತುಳ್ಳಂವ.

ಪುದಿಯ ನಂಬರ್ ಇಟ್ಟಂಡ್ ನನ್ನ ಕಳಿಚಿಡುವೊ. ನೋಟನ ಎಣ್ಣೆತ್ ಪೋನ್ ಬೆಚ್ಚತ್.

ದರ್ಶನ್‌ಕ್ ಒರ್ ತರಾ ಸಮಧಾನ ಆಚಿ. ದಿವ್ಯ ತಕ್ಕ ಪರಂದತಲ್ಲಾ. ಇಂಇ ನಾಡ ಕೂಡೆ ತಕ್ಕ ಪರೆಯುವಾ. ಪಾಪ ಅವ ದಾರೋ ಗೊತ್ತುಳ್ಳಯಿಂಗಳೇಂದ್ ಗೇನ ಮಾಡಿತ್. ಒರ್ ತರತ್ ನಲ್ಲದೇ. ಇದೇ ಐಡಿಯಾ ಚಾಯುಂಡ್. ನಾಳೆ ಇನ್ನೆ ಪೋನ್ ಮಾಡುವಿ ಪಿತ್ಯಾಂದ್. ಆರ್ ಗಂಟೆಕ್ ಪೋನ ಮಾಡಚಿ ದರ್ಶನ್.

ದಿವ್ಯಂಡ ಪುನಾದಿಯೋ ಅದೇ ಪ್ರಶ್ನೆ.

ನೋಟ್ ದಿವ್ಯಾ ನೀಕ್ ನಾಡ ಮೇಲೆ ಅಚ್ಚಕ್.

ನಂಬಿಕೆ ಇಲ್ಲತ ಪೋಚೇಂಗಿ ನಂಬರ್‌ನ ಸರಿಯಾಯಿತ್ ನೋಟ್ ಇದ್ ಪಂಜಾಬ್ ನಂಬರ್.

ದಿವ್ಯ ನೋಟ್‌ಚಿ. ಅಕ್ಕು ಇದ್ ಇಲ್ಲಿಯತ ನಂಬರ್ ಅಲ್ಲ.

ನಾನ್ ಎಣ್ಣೆದಲ್ಲಾ ಸತ್ಯ. ನಾಕ್ ನೀಡ ನಂಬರ್ ಎನ್ನನೆ ಕಟ್ಟಚಿ

ಎಣ್ಣುವಾನ ಬಯ್ಯ ಎಣ್ಣುವಿ. ಇಕ್ಕ ನಾಡ ಕೂಡೆ ತಕ್ಕ ಪರೆಯುವಿಯಾ? ನಾಡ ಫ್ರೆಂಡ್‌ಶಿಪ್‌ನ ಒತ್ತವಿಯಾ ಕೇಟತ್ ದರ್ಶನ.

ದಿವ್ಯಂಗ್ ಒಮ್ಮೆ ಕಲ್ಪನಾಂಡ ತಕ್ಕ ಗೇನ ಬಾತ್ ಕೂಟ್‌ಕ್. ಇಂವೊ ಬಯ್ಯ ಎಣ್ಣುವಿ ಎಣ್ಣಿಚಲ್ಲಾ ಅದನ ಕೇಪಕಾಯಿತ್. ತಕ್ಕ ಪರವಕ ಸುರು ಮಾಡ್‌ಚಿ ದಿವ್ಯ.

ಇನ್ನನೆ ದಿನಾಲೂ ಆರ್ ಗಂಟೆಕ್ ದರ್ಶನ್ ಪೋನ ಮಾಡುವಕ್ ಕೂಡ್‌ಚಿ. ದಿವ್ಯ ಚಾಯಿಲೆ ತಕ್ಕ ಪರಂದಂಡ್ ಇಂಜತ್. ದರ್ಶನ್ ತಾಂಡ ಕೆಲಸತ್‌ರ ಬಗ್ಗೆ, ಮನೆರ ವಿಷಯ ಎಲ್ಲಾನೋ ದಿವ್ಯಂಗ್ ಎಣ್ಣಿಚಿ.

ದರ್ಶನ್ ಎಲ್ಲಾ ವಿಷಯತ್‌ನ ಎಣ್ಣಿಚೇಂಗಿಯೂ ದಿವ್ಯ ಮಾತ್ರ ತಾಂಡ ನೇರಾನ ವಿಷಯತ್‌ನ ಬಾಯಿ ಬುಟ್ಟಲೆ. ಪೊಟ್ಟರ ಮೇಲೆ ಪೊಟ್ಟ ಪರಂದಿತ್ ತಕ್ಕ ಪರೆಯುವ ಇಂಜತ್. ತಾಂಡ ಪೆದ ದಿವ್ಯ ಎಣ್ಣುವ ವಿಷಯತ್‌ನ ಬುಟ್ಟತೇಂಗಿ ದರ್ಶನ್‌ಕ್. ದಿವ್ಯಂಡ ಬಗ್ಗೆ ಗೊತ್ತಿಂಜದೆಲ್ಲಾ ಪೊಟ್ಟೇ ಆಯಿತಿಂಜತ್. ಇನ್ನನೆ ತಕ್ಕ ಪರಂದಂಡ್ ಆರ್ ತಿಂಗ ಕಯಿಂಜತ್. ಒರ್ ದಿನ ದಿವ್ಯ ದರ್ಶನ್ ತಾಂಡ ನಂಬರ್ ಕಟ್ಟನ ಬಗ್ಗೆ ಕೇಟತ್.

ನೋಟ್ ದಿವ್ಯ ನಾನ್ ಸತ್ಯ ಎಣ್ಣುವಿ. ಆಚೇಂಗಿ ನೀನ್, ನನ್ನ ಬಯ್ಯವಕಾಗ ಪಿಂಇ ನಾಡ ಕೂಡೆ ತಕ್ಕ ಪರೆಯುವಾನ ನಿಪ್ಪಚಿಡುವಕಾಗ. ಅನ್ನನೆ ಉಂಡೇಂಗಿ ಮಾತ್ರ ನಾನ್ ಎಣ್ಣಿವಿ

ಇಲ್ಲೆ. ಎಣ್ಣ್ ಆತುರತ್ ಕೇಟತ್ ದಿವ್ಯ.

ಇಲ್ಲೆ ದಿವ್ಯ, ನಾನ್ ಎಣ್ಣುವಾನ ಕೇಟತೇಂಗಿ ನೀಕ್ ನಾಡ ಮೇಲೆ ಚೆಡಿ ಬಕ್ಕು. ಅದಂಗಿಂಜ ಮಿಂಇಲ್ಲೇ ನಿನ್ನ ಮಾಫ್ ಕೇಟವಿ. ದಯಬೆಚ್ಚಿತ್ ನನ್ನ ಮಾಫ್ ಮಾಡಿರ್ ಎಣ್ಣಿತ್ ಸುರು ಮಾಡಿಚಿ ದರ್ಶನ್.

ಒರ್ ಕುರಿ ನಾನ್ ನೀಕ್ ತಪ್ಪಿತ್ ಪೋನ್ ಮಾಡ್‌ನ. ನೀಕ್ ಗೇನ ಇಪ್ಪಕ್ಕಿಲ್ಲೆ. ಆಚೇಂಗಿ ನಾಕ್ ಚಾಯಿತೇ ಗೇನ ಉಂಡ್. ನೀನ್ ನಾಕ್ ಬಜ್ಜಿಯಾ. ಅಕ್ಕ ನಾನ್ ನೀಕ್ ಬಿ. ಪಿ. ಇಕ್ಕು ಟೆಸ್ಪ್ ಮಾಡಿಚಿಟ್ಟ ಎಣ್ಣ.

ಇಚ್ಚಕ್ ಎಣ್ಣುವಕ ದಿವ್ಯಂಗ್ ಸಡನ್ ಆಯಿತ್ ಪಳೆಯದ್ ಗೇನ ಆಚಿ.

ಅಕ್ಕು ಅಕ್ಕು ನಾಕ್ ಗೇನ ಉಂಡ್.

ಅವನೇ ನಾನ್. ಅಕ್ಕ ನಾಕ್ ಮನೆಕ್ ಬಂದಿತಿಂಜ.

ಆಚೇಂಗಿ ಇಕ್ಕ ಪಂಜಾಬ್ ಉಳ್ಳ ಒಹೋ, ಅವನಾ ನೀನ್ ಏಂಗ್ ಚಿ ದಿವ್ಯ.

ಅಕ್ಕು ದಿವ್ಯ ಅದಂಗೇ ಎಣ್ಣಿಯೇ ಮಾಘ್ ಮಾಡಿರಾಂದ್. ದಯಬೆಚ್ಚಿತ್ ಕೇಟವಿ.

ದಿವ್ಯ ಚೆನ್ನ ನೇರ ಮುಂಡತಾಯಿರಾತ್.

ಎನ್ನಂಗ್ ದಿವ್ಯಾ? ತಕ್ಕ ಪರಿ. ನಾನ್ ನೀಕ್ ಮಿಂಗಳೆ ಎಣ್ಣಿಯೆ ಚೆಡಿ ಮಾಡಿಯವತೇಂದ್.

ಸೆರಿ ಬುಡ್. ಇಕ್ಕ ಎಣ್ಣಿತ್ ಎಂತ ಪ್ರಯೋಜನ? ಫ್ರೆಂಡ್ಸ್ ಎಣ್ಣಿ ಪಿಂಗಳ ಜಗಳ ಎಲ್ಲಾ ಮಾಮೂಲ್ ಎಣ್ಣೆಚಿ ದಿವ್ಯ.

ಥ್ಯಾಂಕ್ಸ್ ದಿವ್ಯ ನೀನ್ ಇಚ್ಚಕ್ ಸಮಾಧಾನತ್ ಇಪ್ಪಿಯಾಂದ್ ನಾನ್ ಗೇನ ಮಾಡಿತಿಂಜಿಲೆ.

ಪರೋಲೆ ಬುಡ್ ಎಣ್ಣಿತ್ ಫೋನ್ ಬೆಚ್ಚಿತ್ ದಿವ್ಯ.

ದರ್ಶನ್ ರ ಮನಸ್ಸಲಿಂಜ ಭಾರ ಇಳಿಂಜನಕೆ ಆಚಿ ಸದ್ಯ! ದಿವ್ಯ ಚೆಡಿಂಜಿಲೆಲ್ಲಾ. ನಾನ್ ಎಂತೋ ಗೇನ ಮಾಡಿಟ. ಆಚೇಂಗಿ ಮೆಸೇಜ್ ರದ್ ಎಣ್ಣುವದ್ ಬೋಂಡ. ಅದ್ ನಾನೇಂದ್ ಗೊತ್ತಾನಕ ನನ್ನ ತಿರಿತ್ ಕೂಡಿ ನೋಟುವಕಿಲ್ಲೆ. ದರ್ಶನ್ ತಾಂಗ್ ತಾನೇ ಸಮಾಧಾನ ಮಾಡಿಯಂಡತ್.

ಇವನೇನಾ ಅಂಪೋ. ಇಚ್ಚಕ್ ದಿನ ಎಣ್ಣೆಲೆಲ್ಲಾ. ಇಂವೊ ಇಚ್ಚಕ್ ನಾಡ ಕೂಡೆ ಕಳಿಚಿತಿಪ್ಪಕ ಇಂಗಳ ನಾನೂ ಇವನ ಕಳಿಪಿಚಿಡುವಿ.

ತಕ್ಕ ಪರಂದಂಡೇ ಇವನ ಸೆರಿ ಮಾಡುವಿ. ನಾನ್ ತಕ್ಕ ಪರೆಯತ್ ಪೋಚೇಂಗಿ ಅವಂಗ್ ಇಪ್ಪ ಕಯ್ಯಲೆ. ನಾನ್ ಎಂತ ಎಣ್ಣುಕಲೂ ಜೈ ಜೈ ಎಣ್ಣುವ ನಿನ್ನ ಮಾಡುವಿ ಇರ್ ಮನಸ್ಸಲೆ ಗೇನ ಮಾಡಿಯಂಡತ್ ದಿವ್ಯ.

ಎಂತರೆ ದಿವ್ಯ ತುಂಬಾ ಗೇನ ಮಾಡಿಯಂಡುಳ್ಳಿಯಾ ಕೇಟತ್ ಕಲ್ಪನಾ.

ಎಕ್ಸಾಂ ಪಕ್ಕ ಬಂದದಲ್ಲಾ ಪೊಟ್ಪಪರಂದತ್ ದಿವ್ಯ.

ಎಕ್ಕಾಂ, ಅಲ್ಲಾ, ಆರ್ ಗಂಟೆರ ಪೋನಾ?

ನೀನ್ ಎಂತೆಂತೂ ಎನ್ನಂಗ್ ಗೇನ ಮಾಡುವಿಯಾ? ಇಂಇಂತದ್ ದಿನಾಲೂ ಆರ್ ಗಂಟೆಕ್ ಪೋನ್ ಬಪ್ಪ ನೀನ್ ಒರ್ಗಂಟೆ ಅರೆಗಂಟೆ ತಕ್ಕ ಪರೆಯುವಿಯಾ ನಾನೂ ನೋಟಿಯಂಡೆ ಉಳ್ಳೊ ನೀನಾಯಿತ್ ಎಣ್ಣೆಡ್ಂದ್ ಇಂಜ. ಆಚೇಂಗಿ ನೀನ್ ಒಂದೂ ಎಣ್ಣೆಲೆ. ಅದಂಗ್ ನಾನೆ ಕೇಟಿ ಎಂತ ವಿಷಯ ಎಣ್ಣೆ.

ಅದ್ ಅದ್ ಬಿಕ್ಕಚಿ ದಿವ್ಯ.

ಪುನಾದಿಯೋ ಪೊಟ್ಟ್ ಪರೆಯತೆ ಉಳ್ಳಾನ ಎಣ್ಣೆ. ಅದೇ ಕಲ್ಪನಾ. ನಾನ್ ಅಂದ್ ಒಬ್ಬಂಡ ವಿಷಯ ಎಣ್ಣೆನೋಟ್. ತಪ್ಪಿತ್ ಪೋನ್ ಮಾಡಿತ್ ನಾಕೆ ಎಂತೆಲ್ಲೊ ಎಣ್ಣೆಚೇಂದ್...

ಅಕ್ಕು ಅಕ್ಕು ಗೇನ ಉಂಡ್ ಎಂತಾಚಿ ಇಕ್ಕು? ಅವನೇ ಇಂವೊ. ಪೆದ ದರ್ಶನ್.

ಅಂದ್ ಎಂತೆಲ್ಲೊ ಬಾಯಿ ಬಡಿಚಿಯಾ ಇಕ್ಕು ಎಂತಾಚಿ?

ನೋಟ್ ದಿವ್ಯ ನಾನ್ ನೀಕೋರ್ ವಿಷಯ ಎಣ್ಣೆವಿ. ಅಂದ್ ನಾನ್ ಎಣ್ಣೆ, ತಕ್ಕ ಪರೀಂದ್. ಆಚೇಂಗಿ ಇಕ್ಕು ನೀಡ ತಕ್ಕನ ಕೇಪಕ. ನೀನ್ ಅವಂಡ ಕೂಡೆ ತಕ್ಕ ಪರೆವದ್ ಬೋಂಡಾಂದ್ ಆಪ.

ಇಲ್ಲೆ ಕಲ್ಪನಾ ಅಂದ್ ಒರ್ ತಕ್ಕ ಇಂದ್ ಒರ್ ತಕ್ಕ ಎನ್ನಂಗ್?

ನೇರ್ ದಿವ್ಯ ಅಂದ್ ನಾನ್ ನೀಕ್ ಪ್ರಪಂಚತ್ನ ನೋಟ್ ಎಣ್ಣೆನ. ನೀನ್ ನೋಟಿಯ. ತಕ್ಕೂ ಪರಂದಿಯಾ. ಆಚೇಂಗಿ ಸೂಕ್ಷ್ಮತ್ನ ಅರ್ಥ ಮಾಡಿಯಂಡಿತಿಲ್ಲೆ. ಅಂವೊ ನೀಡ ಕೂಡೆ ಇಚ್ಚಕ್ ತಕ್ಕ ಪರೆವಾ ಎಣ್ಣೆಚೇಂಗಿ ಅಂವೊ ಕೊದಿಚಂಡುಂಡು.

ಸ್ವಾಪ್ ಇಟ್ ಕಲ್ಪನಾ. ಪುಚ್ಚಿ ಪರೆಯತೆ.

ಸತ್ಯ ಎಕ್ಕಾಲೂ ಕೈಪೆಕೆರ ಮಾದರಿ. ಕಯಿಪ ದಾರ್ಕೂ ಇಷ್ಟ ಆಪುಲೆ. ಆಚೇಂಗಿ ಅದತಲ್ ಕಾಹಿಲೆ ವಾಸಿ ಮಾಡುವ ಮದ್ದ್ ಉಂಡ್. ಅದನ ಅರ್ಥ ಮಾಡಿಯಾ. ದರ್ಶನ್ನ ನೀನ್ ಫ್ರೆಂಡ್ ಆಯಿತ್ ನೋಟಿತಿಕ್ಕು

ಆಚೇಂಗಿ ಅವೊಂಡ ಮನಸ್ಸಲ್ ಅದಿಲ್ಲೆ. ಇಕ್ಕ ಫ್ರೆಂಡ್‌ಶಿಪ್ ಇಂಞ ಚೆನ್ನಕೇ ದಿನತ್ ಕೊದಿಕಳಿ ಸುರುವಾಪ. ಎಸ್. ಟಿ. ಡಿಲೆ ಅವೊ ಅರೆಗಂಟೆ ಒರ್‌ಗಂಟೆ ತಕ್ಕ ಪರೆಯುವಾ ಎಣ್ಣಿಚೇಂಗಿ ಗೇನ ಮಾಡ್. ಒಂದೂ ಇಲ್ಲತೆ ದಾರೂ ಇನ್ನನೆ ಪೋನ್ ಮಾಡುಲೆ. ಆದ್ಯತ್ ತಕ್ಕ ಪರೆವಕ ನೀನ್ ಬಜ್ಜಂಗಾಯಿತ್ ಅವೊ. ಮುಂಡತೆ ಉಂಡ್ ತಾಂಡಲ್ಲಿಯೇ ಭಾವನೆನ ಅಡಕಿತ್ ಬೆಚ್ಚಂಡಿತ್. ಎಲ್ಲಿ ಎಣ್ಣಿಚೇಂಗಿ ನೀನ್ ಬಜ್ಜಿರುವಿಯಾಂದ್ ಪೋಡಿ. ತಕ್ಕ ಪರಿಯತಾಯಿರುವಿಯಾಂದ್ ಗೇನ.

ಚೆನ್ನ ಗೇನ ಮಾಡಿ ನೋಟ್ ದಿವ್ಯ.

ಇಪ್ಪಕೂ ಮದಿ, ಇಲ್ಲತಿಪ್ಪಕೂ ಮದಿ, ಆಚೇಂಗಿ ಅವೊ ಇಂದೆಕೆತ್ತಣೆ. ಅನ್ನತ ಒರೂ ತಕ್ಕೂ ಪರಂದಾಲೆ. ಎಣ್ಣೆಚಿ ದಿವ್ಯ.

ಅವೊ ಸಂದರ್ಭ ನೋಟಿತ್ ತಕ್ಕ ಪರೆವ ಮನುಷ್ಯ. ಗೊತ್ತುಳ್ಳ ಮಾದರಿ ತಕ್ಕ ಪರಂದಿತ್. ನಿನ್ನ ಫ್ರೆಂಡ್ ಮಾಡಿಯಂಡತ್. ಆ ಫ್ರೆಂಡ್‌ಶಿಪ್‌ಲೆ ಮಿಂಞಕ್ ಪೋಯಿತ್ ಇಂಞ ಚೆನ್ನಂಗಿ ದಿನತ್ ತಾಂಡ ಮನಸ್ಸರ್ ಆಸೆನ ಎಣ್ಣಿಯವ.

ಇಲ್ಲೆ ನಾನ್ ಇದಂಗ್ ಅವಕಾಶ ಕೊಡಪಾಲೆ. ಎಣ್ಣೆಚಿ ದಿವ್ಯ.

ನೋಟ್ ದಿವ್ಯ ನೀಡ ಮನಸ್ಸಲ್ ಅವಂಡ ಮೀದ ಅನ್ನತ ಭಾವನೆ ಇಲ್ಲತ ಪೋಚೇಂಗಿ ಇಕ್ಕಲಿಂಜ ತಕ್ಕ ಪರೆವನ ಕಮ್ಮಿ ಮಾಡ್. ಬಯ್ಯಂಜಿ ಅದಾಯಿತೇ ನಿಂದ್ ಪೋಪ. ನೀಡ ತಕ್ಕನುಂಡ್ ಅವಂಡಲ್ಲಿ ಇಂಞೂ ಆಶೆ ಪುಟ್ಟುವದ್ ಬೋಂಡ ಅವೊ ಆರ್ಮಿಕಾರ. ನಿನ್ನೊಂಡ್ ದೇಶಕ್ ನಷ್ಟ ಆಪದ್ ಬೋಂಡ. ಅವೊ ಅವಂಡ ಕೆಲಸತನ ಚಾಯಿಲ್ ಮಾಡಡ್. ಮನಸ್ಸ ಪಾಳಾಚೇಂಗಿ ವಾಸಿ ಮಾಡುವಕ್ ಕಯ್ಯಲೆ. ಆಚೇಂಗಿಯೂ ಬಲ್ಯಗಾಯ ಆಪಕ್ಕಿಂಜ ಮಿಂಞಲೆ ಗೇನ ಮಾಡ್ ಎಣ್ಣೆಚಿ ಕಲ್ಪನಾ ದಿವ್ಯಂಗ್, ಕಲ್ಪನಾಂಡ ತಕ್ಕಲ್ ಅರ್ಥ ಉಂಡಂದ್ ಆಚಿ.

ಅಕ್ಕು ಮಿಂಞಕ್ ದರ್ಶನ್‌ರ ಪೋನ್ ಬಂದತೇಂಗಿ ತಕ್ಕ ಪರೆವಕಾಗ. ಎಂತೇಂಗಿ ಕಾರಣ ಎಣ್ಣಿತ್ ಬೆಚ್ಚಿರೊಂಡು. ದಿವ್ಯ ಗೇನ ಮಾಡ್‌ಚಿ. ಅಕ್ಕಣೆ ಮೊಬೈಲ್ ರಿಂಗಾಚಿ. ನೋಟಣೆ ದರ್ಶನ್, ದಿವ್ಯ ಗೇನ ಮಾಡ್‌ಚಿ. ಅಕ್ಕಣೆ

ಪೋನ್ ಕಟ್ಟಾಚಿ. ಪುನಾದಿಯೊ ಕಾಲಿಂಗ್.

ಹಲೋ ದಿವ್ಯ.

ಹ್ಲಂ ಎಣ್ಣೆ.

ನೀಕೋರ್ ವಿಷಯ ಎಣ್ಣೆಂಡು.

ದಿವ್ಯಂಗ್ ಪೋಡಿ ಆಚಿ. ಹ್ಲಂ ಎಂತ? ಕೇಟತ್

ಎನ್ನಂಗ್ ದಿವ್ಯ, ಹುಷಾರಿಲ್ಲಿಯಾ ಒರ್ ತರಾ ತಕ್ಕ ಪರಂದಂಡುಳ್ಳಿಯಾ?

ಇಲ್ಲೆ. ಅನ್ನನೆ ಒಂದೂ ಇಲ್ಲೆ. ಎಂತ ಎಣ್ಣೆ?

ನಾಕ್ ರಜ ಕ್ಕಟ್ಟಿತ್. ಬಪ್ಪವಾರ ಕೊಡಗಕ್ ಬಪ್ಪಿ. ಅಂತಿಂತೂ ಬೆಂಗಳೂರ್ಕ್ ಬಂದಿತೇ ಬರಂಡುವಲ್ಲಾ. ಅಕ್ಕ ನಿನ್ನ ಕಾಂಬಿ ನೀ ಬಪ್ಪಿಯಲ್ಲಾ?

ದಿವ್ಯಂಡ ಎದೆ ಬಡಿಪಕ್ ಸುರು ಆಚಿ. ಎಂತ ಎಣ್ಣೆಡ್, ಮನಸ್ಸಲೇ ಗೇನ ಮಾಡ್ಚಿ.

ಬಪ್ಪವಾರ ಅಲ್ಲ, ನೋಟನಾ?

ಅಲ್ಲಾ ದಿವ್ಯ ನಾನ್ ಇಚ್ಚಕ್ ಮುಷಿಲ್ ಎಣ್ಣೆವಕ, ಬೇಜಾರತ್ ಕೇಟತ್ ದರ್ಶನ್.

ಮನುಷ್ಯಂಡ ಜೀವನತ್ನ ಎಣ್ಣೆಯುವಕಯ್ಯುಲೆ. ಇಂದಿಪ್ಪನೆಕೆ ನಾಳೆ ಇಪ್ಪಾಲೆ ಇಂಇಗೂ ಒರ್ವಾರ ಟೈಂ ಉಂಡಲ್ಲಾ.

ಇಲ್ಲೆ ದಿವ್ಯ ಮಾಮೂಲ್‌ರನಕೆ, ನೀನ್ ಇಂದ್ ಇಲ್ಲೆ. ಎಂತಾಚಿ ಎಣ್ಣೆ?

ಒಂದೂ ಇಲ್ಲೆ ಚೆನ್ನ ಮಂಡೆ ನೊಂಬಲ ಅಚ್ಚಿಕೇ ನಾಕ್ ಇಕ್ಕ ತಕ್ಕ ಪರೆವಕ್ ಕಯ್ಯುಲೆ ಬೆಪ್ಪಿ.

ನೀಕ್ ಮಿಂಇಲೆ ಎಣ್ಣೆವಲಿಂಜತಲ್ಲಾ.

ಇಕ್ಕ ಎಣ್ಣೆ ಅಲ್ಲಾ. ಬೆಯ್ಯಿ ಬಾಯ್.

ಸೆರಿ ನೀಡ ಮೂಡ್ ಸೆರಿ ಇಲ್ಲೆ. ನಾಳೆ ಮಾಡುವಿ ಬಾಯ್ ಬಾಯ್.

ದರ್ಶನ್ ಒರ್ವಾರ ಎಕ್ಕ ಬಪ್ಪಾಂದ್ ಮುಷಿಲ್ ಕಾತಂಡಿಂಜತ್ ಪೋನನ್ನಕೆ ದಿವ್ಯನ ನೋಟವೀಂದ್ ಮನಸ್ಸಲ್, ಆಚೇಂಗಿ ದಿವ್ಯ.

ಬರಡ್, ಬಾ ಎಣ್ಣೆತ್ ನಾನ್ ಪೋಪ್ಲೆ. ನೋಟನ ಅಕ್ಕ ಅವಂಗ್ ನಾಡ ಮೇಲೆ ಚೆಡಿ ಬಪ್ಪ. ಕಾತ್ ಕಾತ್ ಬೇಜಾರ ಆಪ. ಪರೋಲೆ ಬಯ್ಯಂಜಿ ಸೆರಿ ಆಪ. ನಾನ್ ದಾರಂದೇ ಗೊತ್ತಲೆಲ್ಲಾ ಇಂಇ ಎನ್ನನೆ ಅಂವೊ ನನ್ನ ಕಂಡ್ಪುಡಿಪ, ಅವಂಡ ಮಿಂಇ ಕಾಲೇ ಪೋಚೇಂಗಿಯೂ ಗೊತ್ತಿಪ್ಪಕ್ಕಿಲ್ಲೆ. ಅಕ್ಕ ಅಂವೊ ನಾಕ್ ಪೋನ್ ಮಾಡುಲೆ. ಅಲ್ಲಿಕ್ ಅವಂಡೂ ನಾಡೋ ಸಂಬಂಧ ಕಟ್ತ್. ಗೇನ ಮಾಡಚಿ ದಿವ್ಯ.

ಹಲೋ ದಿವ್ಯ ನಾಳೆ 11 ಗಂಟೆಕ್ ನಾನ್ ನೀಕ್ ಎಂ. ಜಿ. ರೋಡ್ಲ್ ಕ್ಟ್ಟುವಿ. ಎಣ್ಣೆಚಿ ದರ್ಶನ್.

ಸೆರಿ ಬಾ. ನಾನೂ ಬಪ್ಪಿ ಎಣ್ಣೆಚಿ ದಿವ್ಯ.

ದರ್ಶನ್ರ ಮನಸ್ಸೊರಳಿಯೇ ಖುಷಿ ಆಚಿ. ನಾನ್ ನಾಳೆಯೇ ದಿವ್ಯಂಗ್ ಪ್ರಪೋಸ್ ಮಾಡುವಿ. ನಾಡ ಮನಸ್ಸಲ್ ಇಚ್ಚಕ್ ದಿನ ಬೆಚ್ಚಿತಿಂಜ ಆಸೆನ ಎಣ್ಣೆಯವಿ. ಅವ ಎನ್ನನೇ ಇರಡ್. ನಾಕ್ ಚಾಯಿ ಬೋಂಡ. ಅವಡ ಚಾಯಿ ಮನಸ್ಸ ಮದಿ ಐಲವ್ ಯೂ ದಿವ್ಯ ಮನಸ್ಸಲೇ ಎಣ್ಣೆಚಿ ದರ್ಶನ್.

ಪಿತ್ಯಾಂದ ಪೊಲಾಕ ದಿವ್ಯಂಗ್ ಒರ್ ತರಾ ಗ್ಡಪಕ್ ಸುರುವಾಚಿ. ನಾಕ್ “ಬಾಂದ್ ಎಣ್ಣೆತ್ ಇಕ್ಕ ಅಂವೊ ಬಪ್ಪ. ನನ್ನ ತೇಡುವ. ಪೋನ್ ಮಾಡುವ ಎಂತ ಮಾಡಡ್. ದಿವ್ಯ ಸೀದಾ ಬಟ್ಟೆ ಇಟ್ಟಂಡ್ ಎಂ. ಜಿ. ರೋಡ್ಕ್ ಬಾತ್ ನೋಟ್ಚಿ ದಾರೂ ಕಂಡ್ಲೆ. ದರ್ಶನ್ಕ್ ಪೋನ್ ಮಾಡ್ಚಿ.

ಎಲ್ಲಿ ಉಳ್ಳಿಯಾ ನೀನ್?

ನೀನ್ ಎಲ್ಲಿ ಉಳ್ಳಿಯಾ? ನಾನು ಅಲ್ಲಿಯೇ ಉಳ್ಳ. ಎಣ್ಣೆಚಿ ದಿವ್ಯ.

ಏದ್ ಕಲರ್ ಶರ್ಟ್?”

ನೀಲಿ ಚೆಕ್ಸ್ ಎಣ್ಣೆಚಿ ದರ್ಶನ್.

ತಿರಿತ್ ನೋಟಿಚಿ ದಿವ್ಯ.

ಉದ್ದಕೂ ಬಣ್ಣಕೂ ಚಾಯಿಕಾರ ಪಟ್ಟಾಳಕಾರಂಡ ಬೀರ್ಯ ಅವಂಡಲ್ಲಿ ಎದ್ದ ಕಾಂಬ ಇಂಜತ್.

ದರ್ಶನ್‌ರ ಕಣ್ಣು ತಾಂಡ ಕೊದಿರಾಣಿ ನ ತೇಡುವ ಕೂಡ್‌ಚಿ.

ದರ್ಶನ್‌ನ ನೋಟ್‌ನ ದಿವ್ಯ ಅವಂಡ ಪಕ್ಕಕಾಲೇ ಪೋಚಿ. ಆಚೇಂಗಿ ದರ್ಶನ್‌ಕ್ ಗೊತ್ತಾಯಿಲೆ. ತಾಂಡ ಮಿಂಞಾತ್ ಪೋಯಂಡುಳ್ಳವ. ತಾಂಡ ಕೊದಿರಾಣೀಂದ್ ಅವಂಗ್ ಗೊತ್ತಾಯಿಲೆ. ಪುನಾದಿಯೊ ಪೋನ್ ಮಾಡ್‌ಚಿ.

ಸೈಲೆಂಟಲ್ ಬೆಚ್ಚಿತಿಂಜ ದಿವ್ಯ ನೋಟಿತ್ ಮುಂಡತಾಚಿ.

ದರ್ಶನ್ ಪೋನ್ ಮಾಡಿಯಂಡೇ ಇಂಜತ್. ದಿವ್ಯ ದರ್ಶನ್‌ನೇ ನೋಟಿಯಂಡಿಂಜದಲ್ಲತೆ, ಪೋನ್ ಎಡತ್‌ಲೆ.

ದರ್ಶನ್‌ರ ಆಸೆ ಎಲ್ಲಾ ಒಡಂದ್ ಪೋಚಿ. ಮೂಡ್ ಬಾಡಿಚಿಟ್ಟಂಡ್ ವಾಪಸ್ಸಾಚಿ.

ಛೇ ನಾನ್ ಇನ್ನನೆ ಮಾಡಂಡಿಂಜಲೆ. ದರ್ಶನ್‌ನ ತಕ್ಕ ಪರಿ ಚೆಡಂಡಿಂಜತ್ ಪಾಪ, ಅವೊ ಎಚ್ಚಕ್ ಆಸೆ ಬೆಚ್ಚಂಡ್ ಬಂದಿತಿಂಜತ್. ನಾನ್ ಎಲ್ಲಾನೋ ಪಾಲ್ ಮಾಡಿಟಾಂದ್ ಮನಸ್ಸು ಒರ್ ಬರಿಲ್ ಎಣ್ಣಿಚೇಂಗಿ, ಇಂಞಗೋರ್ ಬರಿಲ್ ನಾ ಮಾಡ್‌ನದ್ ನಲ್ಲದಾಚಿ... ಇಂಞ ಮಿಂಞಾಕ್ ದರ್ಶನ್ ನಾಕ್ ಪೋನ್ ಮಾಡುಲೆ. ನಾಡ ಮೇಲೆ ಅವಂಗ್ ಚೆಡಿ ಬಂದಿತಿಪ್ಪ. ನನ್ನ ಬಜ್ಜಿತಿಕ್ಕು ಬಯ್ಯಡ್ ಆಚೇಂಗಿ ನಾನ್ ಮಾತ್ರ ಇಂಞ ಮಿಂಞಾಕ್ ಹುಷಾರಾಯಿತಿರಂಡು. ಅಪ್ಪಿತಪ್ಪಿಯೊ ಗೊತ್ತಿಲ್ಲತಯಿಂಗಡ ಕೂಡೆ ತಕ್ಕ ಪರೆಯುವಕಾಗ ಸದ್ಯ ಈ ಗಲಾಟೆ ತೇಂದತ್‌ಂದ್ ಉಸರ್ ಬುಟ್ಟಿತ್ ದಿವ್ಯ.

ಇತ್ತಟಿ ದರ್ಶನ್‌ಕ್ ಬೇಜಾರ ಆಚಿ. ಛೇ, ಎನ್ನತ ಮಾಡಿಯ ಇವಾ? ನಾನ್ ಎಲ್ಲಾ ಮೂಡಿಯಡ ಮಾದರಿ ಇವ ಅಲ್ಲಾಂದ್ ಗೇನ ಮಾಡ್‌ನ ಆಚೇಂಗಿ ಇವಳೂ ಅದೇ ಜಾತಿಕ್ ಕೂಡ್‌ನವ. ಬಪ್ಪ ಕಯ್ಯತ ಪೋಚೇಂಗಿ ಬಪ್ಪಲೇಂದ್ ಎಣ್ಣುವಲಿಂಜತ್. ಬಪ್ಪೇಂದ್ ಎಣ್ಣಿತ ನನ್ನ ಪಾರಕಾಪ್‌ಚಿಟ್ಟಿತ್ ಬಂದ್‌ಲೆಲ್ಲಾ, ಈ ಮೂಡಿಯ ಎಲ್ಲಾ ಇನ್ನನೆ. ಎಂತ ಆಚೇಂಗಿಯೊ ನಂಗಡನ್ನತ ಕಣ್ಣಂಗ ಬದಲಾಪ್‌ಲೆ. ಮೂಡಿಯ ತೆಳಚತೇಂಗಿ ತಕ್ಕ, ಪರಂದತೇಂಗಿ ಸೋಯ ತಪ್ಪಿ ಪೋಪ. ನಾನ್ ಮಾಡ್‌ನ ಮುಠಾಳ ಕೆಲಸಕ್ ಬೋರೆಯಿಂಗ ಎಂತ ಮಾಡುವ ಕಯ್ಯವಾ? ನಾನೇ ಅರಿಂಜವಂಡಿಜತ್.

ಎಚ್ಚಕ್ ಆಸೆ ಬೆಚ್ಚಂಡ್ ಅಲ್ಲಿಂಜ ಬಂದ. ಇಚ್ಚಕ್ ದಿನ ಎಣ್ಣುವ ಕಯ್ಯತ

ವಿಷಯತನ ಮನಸ್ಸಲೇ ಬೆಚ್ಚಂಡಿಂಜ ಅದೆಲ್ಲಾ ಎಣ್ಣುವಂಡೂಂದ್ ಗೇನ ಮಾಡ್ನ ಆಚೇಂಗಿ ದಿವ್ಯ ನೀನ್ ನೀನ್ಂದ್ ಚೆಡಿಲ್ ಬಾಯಿ ಬಡಚತ್ ದರ್ಶನ್.

ದರ್ಶನ್ ಕಣ್ಣೇ ಕಾಂಗತನಕೆ ಆಚಿ. ಎಂತ ಮಾಡಡ್? ಅಯ್ಯೋ ದೇವಳೆ ನಾಕೆನ್ನಂಗ್ ಈ ಶಿಕ್ಷೆ?

ಶಿಕ್ಷೆ ಆಕಂಡು. ಇದೆಲ್ಲಾ ನಾನೇ ಮಾಡಿಯಂಡದ್ ನಾಡ ಕೆಲಸ ನೋಟಿಯಂಡ್ ಇಂಜಿತುಂಡೇಂಗಿ ನಾಕ್ ಇಂದ್ ಈ ಪರಿಸ್ಥಿತಿ ಬಪ್ಪ ಇಂಜಿಲೆ. ನಾನ್ ಬಲ್ಚ ಬಲೆಕ್ ನಾನೇ ಕೆಣಿಂಜಂಡಿಯೆ ದಿವ್ಯ ಗೆದ್ದತ್.

ಒರ್ ದಿನಕ್ ಪತ್ತ ಪನ್ನೆರಂಡ್ ದೇಶದ್ಲೋಹಿಯಳ ಕೊಲ್ಲುವ ನಾನ್, ಇಂದ್ ಒರ್ ಮೂಡಿರ ವಿಷಯತ್ ಇಚ್ಚಕ್ ಕೊರಗುವದಾ? ಇಲ್ಲೆ, ನಾನೋರ್ ಪಟ್ಟಾಳಕಾರ ನಾಡ ಗತ್ತ ನಾಕಿರಂಡು. ಆಪದೆಲ್ಲಾ ಆಚಿ. ಇಂಇ ಮಿಂಇಕ್ ಏದ್ ದಿವ್ಯನೂ, ಇಲ್ಲೆ ಭವ್ಯನೂ ಇಲ್ಲೆ. ಪಪ್ಪ ಮಮ್ಮಿ ಏದ್ನ ನೋಟುವ ಅದನ ಮಂಗಲ ಕಯಿಪಿ ಈ ಮೂಡಿಯಡ ಸಹವಾಸವೇ ಬೋಂಡ.

ಎಂತ ಗೇನ ಮಾಡಚೇಂಗಿಯೂ ದರ್ಶನ್ ದಿವ್ಯಂಡ ಮೀದ ಚೆಡಿ ಇಂಜಿತೇ ಇಂಜತ್. ಇವಕ್ ಅಖೀರಿಕ್ ಒರ್ ಫೋನ್ ಮಾಡುವಿ ನೋಟನ, ರಿಂಗ್ ಮಾಡ್ಚಿ ದರ್ಶನ್.

ಟ್ರಿನ್ ಟ್ರಿನ್ ಟ್ರಿನ್

ಹಲೋ ಎಣ್ಣಚಿ ದಿವ್ಯ.

ಇಕ್ಕ ನೀಕ್ ಸಮಾಧಾನ ಆಚಾ? ತುಂಬಾ ಋಷಿ ಆಯಿತಿಕ್ಕು. ಎಲ್ಲಾಡ ಮಾದರಿ ನೀನ್ ಅಲ್ಲಾಂದ್ ಗೇನ ಮಾಡ್ನ. ಆಚೇಂಗಿ ನೀನ್ ಆ ಜಾತಿಕ್ ಕೂಡ್ನವ. ಇಂಇ ಮಿಂಇಕ್ ನೀಕ್ ಡಿಸ್ಪರ್ಬ್ ಮಾಡುಲೆ. ಎಂತ ಬೋಡೇಂಗಿ ಮಾಡಿಯಾ? ಆಚೇಂಗಿ ದಾರ್ಕೂ ಮಿಂಇಕ್ ಇನ್ನನೆ ಮಾಡುವಕ್ ಪೋಕತೆ. ಚೆಡಿಲ್ ಪರಂದತ್ ದರ್ಶನ್.

ನೀಡ ತಕ್ಕ ಜಾಸ್ತಿಯಾಯಡುಂಡ್. ನಾನೊಂದು ನಿನ್ನ ಪೋನ್ ಮಾಡ್ಂದ್ ಕೇಟಂಡಿತಿಲ್ಲೆ. ನೀನಾಯಿತೆ ತಕ್ಕ ಪರಂದಿಯಾ. ನಾನೂ ಪರ್ಂದ ಅಚ್ಚಕ್ ಬುಟ್ಟತೇಂಗಿ ನಾನೆಂದೂ ನೀಡ ಕೂಡ ಕಳಚಿತಿಲ್ಲೆ. ನಿನ್ನ ಇಷ್ಟಪಟ್ಟಿತೂ

ಇಲ್ಲ. ಮಂಗಲಾಪೀಂದ್ ಎಣ್ಣೆತಿಲ್ಲೆ. ಎಲ್ಲಾ ನೀನಾಯಿತೇ ಮಾಡಿಯಂಡದ್. ಅನುಭವಿಚಿಡ್ ಎಣ್ಣೆಚಿ ದಿವ್ಯ.

ಅನುಭವಿಚಿಡಂಡು ಇಂಞಂತ ಮಾಡುವ ಕಯ್ಯುವಾ? ನೀನ್ ಎಣ್ಣುವದೂ ನೇರೆ. ಆಚೇಂಗಿ ಒಂದ್ ಗೇನ ಬೆಚ್ಚ ದಿವ್ಯ. ನಾನ್ ಕುರುನ ಮಾತ್ರ ಮಣ್ಣಾಕ್ ಇಟ್ಟ. ಆಚೇಂಗಿ ಅದಂಗ್ ನೀರ್ ಬೂಕಿತ್ ಬಲ್ಯ ಗಿಡ ಆಯಿತ್ ಬೊಳತನವ ನೀನ್. ಕುರು ಆಪಕ ಅನ್ನನೆ ಬುಟ್ಟಿತುಂಡೇಂಗಿ ಅದ್. ಒರ ಸಮಯ ಚತ್ತಪೋಪದೋ, ಮೊಟ್ಟವದೋ ಆಪಯಿಂಜತ್. ಆಚೇಂಗಿ ಮರ ಆನ ಪಿಂಞ ಅದನ ಒಂದೂ ಮಾಡುವ ಕಯ್ಯಲೆ. ಇಕ್ಕ ಪೊಳಿಪಕ್ ನೋಟಿಚೇಂಗಿ ಬಲ್ಯ ಸದ್ದಾಪ. ಜೊತೆಕ್ ನಷ್ಟವೂ ಆಪ ಎಣ್ಣೆಚಿ ದರ್ಶನ್.

ನೀನೆಂತ ನಾನ್ ನಿನ್ನ ಕೊದಚಿತ್ ಕೈ ಬುಟ್ಟಿ ಮಾಡರಿ ಎಣ್ಣುವಿಯಾ?

ನೀಕ್ ಗೊತ್ತುಂಡ್ ದಿವ್ಯ. ನಾನ್ ನಿನ್ನ ಕೊದಚಂಡುಳ್ಳ ಆಚೇಂಗಿ ಎಣ್ಣೆಯಂಡಲೆ ಎಣ್ಣುವ ಸತ್ಯ ಗೊತ್ತುಂಡ್. ಗೊತ್ತಿಂಜಿತೂ, ನೀನ್ ತಕ್ಕ ಪರಂದಿಯಾ ನೀನ್ ನಾಡ ಭಾವನೆರ ಜೊತೆಲ್ ಕಳಿಚಿಯಾ. ಅದಂಗೇ ನಾಕ್ ಇಚ್ಚಕ್ ನೊಂಬಲ ಆಯಂಡುಳ್ಳಾ?

ಶಟ್ ಅಪ್ ದರ್ಶನ್. ನೀನ್ ಅನ್ನತ ಮರ್ಯಾದಿಕಾರ ಆನಕ ಎನ್ನಂಗ್ ಒರ್ ಮೂಡಿರ ಕೂಡೆ ತಕ್ಕ ಪರಂದಿಯ ತಪ್ಪಿತ್ ಅಂದ್ ಪೋನ್ ಮಾಡಿಯಾ ಅಲ್ಲಿಂಜ ಮುಂಡತೆ ಇರೋಲಿಂಜತಲ್ಲಾ?

ಅದೇ ನಾಡ ತಪ್ಪು. ಇಕ್ಕ ಸೆರಿಯಾಯಿತ್ ಶಿಕ್ಷೆ ಆಯಿತ್ ಇಂಞ ಮಿಂಞಾಕ್ ನೀಕ್ ಪೋನ್ ಮಾಡುಲೆ. ಗುಡ್ ಬಾಯ್. ಬೆಚ್ಚತ್ ದರ್ಶನ್.

ದಿವ್ಯಂಗ್ ತಾಂಡ ತಪ್ಪುಂಡ್ ಗೊತ್ತಿಂಜಕಲೂ ತಾಂಡದೆ ಸೆರೀಂದ್ ಎಣ್ಣೆಚಿ. ಆಚೇಂಗಿ ಮನಸ್ಸೊಳಿಯೆ ಬೇಜಾರ ಮಾಡ್ಚಿ.

ದರ್ಶನ್ ಎಣ್ಣುವಾತ್ ಅರ್ಥ ಉಂಡ್ ನಾನ್ ಅದೇ ತಕ್ಕ ಪರೆವಾನ ನಿಪ್ಪಚಿಡೋಂಡಿಂಜತ್ ಆಚೇಂಗಿ ನಾನ್ ಆ ಕೆಲಸ ಮಾಡ್ಲೆ. ನಾನೆನ್ನಂಗ್ ಇನ್ನನೆ ಮಾಡ್ನಾ? ಇಂದೆಕೆತ್ತಣೆ ಏದೂ ಕಣ್ಣಂಗ ನಾಕ್ ಇನ್ನನೆ ಪರಂದತಿಂಜಿಲೆ ಆಚೇಂಗಿ ಇಂಪೋ ನಾಕ್ ಎಣ್ಣೆಚಿಲ್ಲಾ. ನಾಡ ಬುದ್ಧಿಕ್ ಎಂತ ಆಯಿಂಜತ್.

ನಾನ್ ಇಂಞೂ ಚೆನ್ನ ಹುಷಾರ್ ತಪ್ಪಿ ತಿಂಜಕ ಇನ್ನೂ ಎಂತದೆಲ್ಲೋ ಆಪದ್. ಸದ್ಯ ನಾ ಬಚಾವಾನ, ಗೇನ ಮಾಡಿಯಂಡತ್ ದಿವ್ಯ.

ಇನ್ನನೆ ಒರ್ ತಿಂಗ ಕಯಿಂಜತ್ ದರ್ಶನ್‌ರ ಪೋನ್ ಮೆಸೇಜ್ ಒಂದೂ ಇಲ್ಲೆ. ಕೂಟ್‌ಕ್ ಪರೀಕ್ಷೆಯೂ ಪಕ್ಕ ಬಾತ್. ದಿವ್ಯ ತಾಂಡ ಮನಸ್ಸನ ಓದುವಾಂಗ್ ಬೆಚ್ಚತ್. ನಾಕ್ ನಲ್ಲೋಣೆ ಮಾರ್ಕ್ಸ್ ಎಡತಿತ್ ಪಾಸಾಂಡು. ಪುಚ್ಚಿ ಕಳಿ ಕಳಿಕತೆ. ಓದಂಡುಂದ್ ಗೇನ ಮಾಡಿಯಂಡ್ ಓದುವ ಕೂಡ್‌ಚಿ ದಿವ್ಯ.

ಇತ್ತಟಿ ದರ್ಶನ್‌ಕ್ ಮೊಬೈಲ್ ನೋಟುವಕ್ಕೆಲ್ಲಾ ದಿವ್ಯನ ಗೇನ ಬಪ್ಪ ಇಂಜತ್. ನಂಬರ್ ಒತ್ತಿತ್ ಕಟ್ಪ್ ಮಾಡುವ ಇಂಜತ್. ಇನ್ನನೆ ದಿನ ಕಯಿಂಜನಕೆ ದಿವ್ಯ ದರ್ಶನ್‌ರ ಬಾಳಲಿಂಜ ದೂರ ಪೋಪ ಕೂಡ್‌ಚಿ.

ಇನ್ನನೆ ಒರ್ ಕಾಲ ಕಯಿಂಜತ್. ದರ್ಶನ್‌ರ ಸದ್ದೆ ಇಲ್ಲೆ. ಕೂಟ್‌ಕ್ ದಿವ್ಯ ನಂಬರನೋ ಚೇಂಜ್ ಮಾಡಿರ್‌ತ್. ಪರೀಕ್ಷೆ ಎಲ್ಲಾ ಆಚಿ ದಿವ್ಯ ನಲ್ಲ ಮಾರ್ಕ್ಸ್ ಎಡತಿತ್ ಡಿಗ್ರಿ ಪೂರ್ತಿ ಮಾಡ್‌ಚಿ. ಮಿಂಞಾಕ್ ಎಂತದ್ ಗೇನ ಮಾಡಿಯಂಡಿಕ್ಕಣೆ. ಪೇಪರ್‌ಲ್ ಒರ್ ಪೋಸ್ಟ್ ಆಫೀಸ್ ಚಾಕ್ರರ ಅರ್ಜಿ ಕಾಕಿತಿಂಜತ್ ಇದನ ನೋಟನ ದಿವ್ಯ ಅರ್ಜಿ ಇಟ್ಟತ್. ಎಳ್ತ ಪರೀಕ್ಷೆಯೂ ಆಚಿ. ಆಂಡ ರಿಸಲ್ಟೇ ಪಾರಕಾಕಂಡಿಂಜತ್ ದಿವ್ಯ. ಒರ್ ದಿನ ಪೋಸ್ಟ್ ಮ್ಯಾನ್ ದಿವ್ಯಂಗ್ ಒರ್ ಕಾಗದ ಕೊಡ್ತತ್.

ಒಡ್ತಿತ್ ನೋಟನ ದಿವ್ಯಂಗ್ ಶಾಕ್ ಆಚಿ. ತಾಂಗ್ ಇಚ್ಚಕ್ ಬೆರಿಯ ಚಾಕ್ರಿ ಕ್‌ಟ್ಟುವಾಂದ್ ಅವ ಗೇನ ಮಾಡಿತಿಂಜಿಲೆ. ಅದತ್‌ಲ್ ಬಪ್ಪವಾರವೇ ಅಮ್ಮತ್ತಿ ಪೋಸ್ಟ್ ಆಫೀಸಲ್ ಕೆಲಸಕ್ ಕೂಡುವಕ್ ಇಂಜತ್.

ಕಟ್ಪನ ಚಾಕ್ರಿನ ಎನ್ನಂಗ್ ಬುಡುವೋ? ದೂರ ಆಚೇಂಗಿಯೂ ದಿವ್ಯ ಪೋಪಕ್ ರೆಡಿ ಆಚಿ. ಸಿದ್ಧಾಪುರತಿಂಜ ಎಕ್ಕಾಲು ಅಮ್ಮತ್ತಿ ಪೋಸ್ಟ್ ಆಫೀಸಕ್ ಬಪ್ಪ ಕೂಡ್‌ಚಿ.

ಆದ್ಯತ್ ಕೆಲಸ ಕಷ್ಟ ಆಚೇಂಗಿಯೂ ಮಿಂಞಾಕ್ ಪೋನನಕೆ ದಿವ್ಯ ಪಡಚಂಡ್ ಬಾತ್. ಇಕ್ಕ ದಿವ್ಯ ಮಿಂಞಾತ್‌ರ ದಿವ್ಯ ಅಲ್ಲ. ಜವಾಬ್ದಾರಿ ಉಳ್ಳ ಒರ್ ಮೂಡಿ. ಆಚೇಂಗಿ ಅವಳ ದಾರೂ ಅಲ್ಲಿ ದಿವ್ಯಂದ್ ಕಾಕುವ ಇಂಜಿಲೆ.

ದೇಚಮ್ಮಂದೇ ಎಲ್ಲಾರೂ ಕಾಕುವ ಇಂಜತ್. ಎನ್ನಂಗೆಣ್ಣಕ ಅವಡ ಸ್ಕೂಲ್‌ಲ್ ಎಲ್ಲಾ ದೇಚಮ್ಮಂದೇ ಇಂಜತ್. ದಿವ್ಯ ಕೆಲಸತ್‌ನೆಲ್ಲಾ ಅಚ್ಚಕ್ ಬೆರಿಯ ಟಕ್ ಟಕ್‌ಂದ್ ಮಾಡುವ ಇಂಜತ್ ಆನಗುಂಡ್ ಅವಳ ಅಲ್ಲಿ ಎಲ್ಲಾರುಕೂ ಖುಷಿ.

ದಿನ ಪೋನನಕೆ ದಿವ್ಯ ಆ ಊರ್‌ರ ಜನಕ್ಕೆಲ್ಲಾ ಒರ್ ಖುಷಿಕರ್ತಿ ಮೂಡಿ ಆಚಿ. ತಾನ್ ಆಚಿ ತಾಂಡ ಕೆಲಸ ಆಚಿ. ಸರಿ ನೇರಕ್ ಮನೆಕ್ ಪೋಪ ಇಂಜತ್.

ದಿವ್ಯಂಗೆ ಒರ್ ದಿನ ದರ್ಶನರ ಗೇನ ಬಾತ್. ತಾಂಡ ಮನಸ್ಸೊಳಿಯೇ ಎಣ್ಣಿಯಂಡತ್. ದರ್ಶನ್ ನೀನ್ ಎನ್ನನೆ ಉಳ್ಳಿಯೋ ಗೊತ್ತಲೆ. ಆಚೇಂಗಿ ನೀಕ್ ನಲ್ಲ ಮೂಡಿಯೇ ಕಟ್ಟುವ. ನಾನ್ ನೀಕ್ ಮೋಸ ಮಾಡ್‌ನ. ಆಚೇಂಗಿ ನಾಡ ಮನಸ್ಸಲ್ ಆ ತರತ್‌ರ ಭಾವನೆ ಇಂಜಿಲೆ. ಆಚೇಂಗಿ ನಿನ್ನ ನೋಟುವಕ ನಾಡ ಮನಸೇ ಬದಲಾಚಿ. ಮಂಗಲ ಆಪದಾಚೇಂಗಿ ನೀಡನ್ನತ ಕಣ್ಣಿನ ಮಂಗಲಾಕಂಡುಂದ್ ಗೇನ ಮಾಡ್‌ನ. ಆಚೇಂಗಿ ಮನಸ್ಸರ ಎಲ್ಲಿಯೋ ಒರ್ ಮೂಲೆಂಜ ಪೋಡಿ. ನಾಡ ಕಾಲ್‌ನ ಮಿಂಇಕ್ ಎಡ್‌ಪಕ್ ಬುಟ್ಟಲೆ. ನೀನ್ ನೇರಾಯಿತೂ ನಲ್ಲ ಕಣ್ಣಿ. ನಾಡ ಮೇಲೆ ಎಚ್ಚಕೋ ಆಸೆ ಬೆಚ್ಚಿಂಜಿಯಾ ಆಚೇಂಗಿ ನಾಕ್ ಅದ್‌ನ ಬೆಚ್ಚವಚ್ಚಕ್ ಶಕ್ತಿ ಇಲ್ಲೆ. ಇಂದ್ ನಾನ್ ಒರ್ ಜವಾಬ್ದಾರಿರ ಮನುಷ್ಯತಿ. ನಾನ್ ಮಾಡ್‌ನಾನ ಗೇನ ಮಾಡ್‌ವಕ ನಾಕೇ ಬೇಜಾರ ಆಯಂಡುಂಡ್. ಇದ್ ನಾಡ ವಯಸ್‌ರ ಕಳಿಯೋ ಗೊತ್ತಲೆ. ಆಚೇಂಗಿ ನೀನ್ ನಲ್ಲ ಕಣ್ಣಿ ನೀಕ್ ನೀಡ ಇಷ್ಟತ್‌ರ ಮುಡಿಯೇ ಕಟ್ಟುವ. ಅಕ್ಕಣೆಕ್ ಅವ್ವ ದಿವ್ಯನ ಕಾಕಾಚಿ.

ಎಂತ ಮಮ್ಮಿ?

ನಂಗ ನೀಕ್ ಮಂಗಲ ಕಯಿಕಡುಂದ್ ಉಂಡ್. ಇದಂಗೆ ನೀಡ ಅಭಿಪ್ರಾಯ ಎಂತ?

ನಾಕ್ ಇಚ್ಚಕ್ ಬೆರಿಯ ಬೋಂಡ.

ಬೋಂಡ ಎಣ್ಣಿಚೇಂಗಿ, ನೀನೆ ದಾರ್‌ನೇಂಗಿ ನೋಟಿಯಂಡಿಯಾ? ನಿಂಗಕ್ ನಾಡ ಮೇಲೆ ನಂಬಿಕೆ ಇಲ್ಲೆಯಾ? ದಾರ್‌ಕ್ ಗೊತ್ತ

ಓದಿಯಂಡಿಪ್ಪಕ ಎಂತೆಲ್ಲಾ ಮಾಡುವಿರೋ? ಅದ್ ಬುಡ್. ನೀಕೊರ್ ತಂಗೆ ಉಂಡ್ ಗೇನ ಇರಡ್.

ಅವಕಾಯಿತ್ ನಾನ್ ಮಂಗಲ ಕಯಿಕಂಡುವಾ? ಅನ್ನನೆ ಎಣ್ಣೆತಿಲ್ಲೆ ಎಣ್ಣೆಚಿ ಮಾಚವ್ವ.

ನಿಂಗಕ್ ನಾನ್ ಮನೆಲಿಪ್ಪದ್ ಅಚ್ಚಕ್ ಕಷ್ಟ ಆಚೇಂಗಿ ಎಣ್ಣೆ, ಏದೇಂಗಿ ಪಿ. ಜಿ. ನೋಟಿಯವಿ. ನೆಮ್ಮದಿಲ್ ಇಕ್ಕಲು.

ಬಾಯಿಕ್ ಬಂದನಕೆ ತಕ್ಕ ಪರೆಯತೆ. ಇಂದ್ ನಾಳೆ ಆಚೇಂಗಿ ನವ್ಯನೂ ಮಂಗಲಕ್ ರೆಡಿ ಆಪ. ಇಂಇ ಅಕ್ಕಂಗ್ ಬಂದವೆಲ್ಲಾ ತಂಗಿನ ಕೇಪಕ್ ಆಯಿ ಪೋಪ. ಇಂಇ ನೀನ್ ಅನ್ನನೆ ಇಪ್ಪಿಯಾ? ನಂಗಕೂ ವಯಸ್ಸಾಚಿ. ನಂಗ ಚಾಯಿತಿಪ್ಪನಕೆ ನಿಂಗಲೆಲ್ಲಾ ನಲ್ಲ ಮನೆಕ್ ಕೂಟರನಾಂದ್ ಗೇನ ಮಾಡುವ ಎಣ್ಣೆಚಿ. ಮಾಚವ್ವ.

ಏದೇದ್ ಎಕ್ ಆಕಂಡುವೊ ಅದ್ ಆಯಿತೇ ಆಪ. ಚಾವಂಡುಂದ್ ಉಂಡೇಂಗಿ ಚಾವ. ಬದುಕುಂಡು ಉಂಡೇಂಗಿ ಬಾವ. ಅದಂಗ್ ಒಂದೂ ಮಾಡಿಯವ ಕಯ್ಯಲೆ ಜೋರ್ಲ್ ಎಣ್ಣೆಚಿ ದಿವ್ಯ.

ನಿಂಗಕ್ಕೆಲ್ಲಾ ಪಡಿಪ್ ಚಾಸ್ತಿಯಾನಕೆ ತಕ್ಕೂ ಜಾಸ್ತಿ ಆಪ. ನಂಗ ಮಕ್ಕಾಂದ್ ಗೇನ ಮಾಡುವೊ, ಆಚೇಂಗಿ ಮಕ್ಕಡ ಮಾದರಿ ನಿಂಗ ಇಲ್ಲೆ. ನಿಂಗಡನ್ನತ ಮಕ್ಕಳ ಪೆತ್ತ ಪಿಂಇ ಇಂತನ್ನೆಲ್ಲಾ ಅನುಭವಿಚಿಡಂಡು ಎಣ್ಣೆಚಿ ಮಾಚವ್ವ.

ನೀನ್ ಎಂತೇಂಗಿ ಗೇನ ಮಾಡಿಯಾ? ಎಣ್ಣೆಯಂಡ್ ಕೋಂಬರೆಕ್ ಬಾತ್ ದಿವ್ಯ ಅಕ್ಕಣೆಕ್ ಅಲ್ಲಿಕ್ ನವ್ಯ ಬಾತ್.

ಅಕ್ಕಾ ನೀನ್ ಬೆರಿಯ ಮಂಗಲ ಕಯ್ಯಿ. ನಾಕೋರ್ ಭಾವ ಕೊಟ್ಟವಾ. ಅನ್ನನೆ ನಾಡ ಲೈನೂ ಕ್ಲಿಯರ್ ಆಪ.

ನಾಕಿಂಜ ನೀನೇ ಅರ್ಜೆಂಟಲ್ ಉಳ್ಳಿಯಾ? ಕೇಟತ್ ದಿವ್ಯ ಅನ್ನನೆ ಅಲ್ಲ ನೀಕ್ ಎಣ್ಣೆಯೆ ಅಚ್ಚಿಕೆ.

ನೀಕ್ ಅಚ್ಚಕ್ ಆತುರ ಉಂಡೇಂಗಿ ಪೋಯಿತ್ ಪಪ್ಪಂಗೂ ಮಮ್ಮಿಕೂ ಎಣ್ಣೆ ಮಂಗಲ ಕಯಿಚಿ ತಪ್ಪ. ನಾಡ ಬಗ್ಗೆ ನೀನ್ ಗೇನ ಮಾಡಂಡ,

ಚೆಡಿಲ್ ಎಣ್ಣೆಚಿ ದಿವ್ಯ.

ಮಿಷಿಲ್ ಬಂದ ನವ್ಯ ಅಕ್ಕಂಡ ತಕ್ಕ ಕೇಟಿತ್ ಮೂಡ್ ಬಾಡಿಚಿಟ್ಟಂಡ್ ಪೊರಮೆ ಪೋಚಿ.

ನಾಡ ವರೀಸ್ ನಾಕ್. ಇಯಂಗ್ ನಾಡ ಮಂಗಲತರ ಗೇನ. ಇದಂಗೆ ಎಣ್ಣುವೊ ಪೆರಿಯದಾಯಿತ್ ಪುಟ್ಟುವ ಕಾಗಾಂದ್ ಎಲ್ಲಾ ಜವಾಬ್ದಾರಿನೊ ಬೆರಿಯ ಬೆರಿಯ ಇಡುವಕ್ ನೋಟುವ.

ಅಲ್ಲಾ ನಾಕ್ ಎಂತ ಬಾರಿ ವಯಸ್ಸಾನನಕೆ ತಕ್ಕಪರೆವ. ಇಕ್ಕ ತಾನೆ ಡಿಗ್ರಿ ತೇಂದಿಯೆ. ಚಾಕ್ರಿಯೂ ಕ್ವಿಟ್. ಇಚ್ಚಕ್ ದಿನ ಪಪ್ಪಂಡ ಕೈಲ್ ದುಡ್ಡ್ ಕೇಟಂಡ್ ಬುಡ್ಂಜಿ ಪೋಯಿತ್. ಮಿಂಇಕಾಚೇಂಗಿ ನಾಡ ದುಡ್ಡ್ಲೆ ಚೆನ್ನ ಎಂಜಾಯ್ ಮಾಡನ ಎಣ್ಣೆಚೇಂಗಿ ಮಂಗಲತರ ಸುದ್ದಿ ಎಡ್ಪ. ಮಂಗಲಾಯಿರ್ತೇಂಗಿ ವಡಿಯ ಸಂಸಾರ. ಇದೇ ಅಯಿಂಗ ಎಣ್ಣೆಕಂತೆ. ಬಾವಂಡು, ಇಯಂಗೆನ್ನೊ ಜವಾಬ್ದಾರಿ ತೇತವಕ್ ಪೇಚಾಡುವ ಆಚೇಂಗಿ ನಾಡ ಲೈಫ್. ಛೇ, ಪೊಣ್ಣಾಯಿತ್ ಪುಟ್ಟುವಕೇ ಆಗ, ತಾಂಡೊಳ್ಲೇ ಬಜ್ಜಂಡತ್ ದಿವ್ಯ.

ಕೇಟಿರಾ ನಿಂಗಡ ಮೋವಡ ತಕ್ಕ. ಎಣ್ಣೆಚಿ ಮಾಚವ್ವ ಹ್ಲೆಂ. ಅವ ಚೆರಿಯ ಕುಂಇ ಅಲ್ಲ ಇಕ್ಕ. ವಯಸ್ಸಕ್ ಬಂದ ಮಕ್ಕಳ ಫೈಂಡ್ಸ್ ಆಯಿತ್ ಕಾಗಂಡು. ಇನ್ನನೆ ಜೋಕ್ ಮಾಡಿಚೇಂಗಿ ಅವು ಇನ್ನನೆ ತಿರ್ಗಿತ್ ಪರೆವ ಎಣ್ಣೆಚಿ ಮಾಚಯ್ಯ.

ಓಹೋ, ಅಂದಕ ಫೈಂಡ್ಸ್ ಮಾದರಿ ಅವಳ ಕೇಕಂಡಿಂಜತ್. ನಿಂಗಲೂ ನಿಂಗಡ ತಕ್ಕೂ ಮೋವ ವಯಸ್ಸಕ್ ಬಂದಿತ್ ಗೇನ ಉಂಡಾ?

ದಾರ್ ಇಲ್ಲೇಂದ್ ಎಣ್ಣೆಯೇ?

ಇಂಇೂ ನಿಂಗಕ್ ಸಂಗತಿ ಅರ್ಥ ಆಪುಲಿಯಾ. ದಿವ್ಯಂಡ ಡಿಗ್ರಿ ಆಚಿ. ನವ್ಯ ಇಕ್ಕ ಡಿಗ್ರಿಕ್ ಕೂಡಿತ್. ನಾಳೆ ಪಿತ್ಯಾಂದ್ ಎಣ್ಣುವಕ ಅವಕೂ ತಂದ್ ಬಪ್ಪ. ಅಕ್ಕ ದಿವ್ಯನ ಬುಟ್ಟಿತ್ ನವ್ಯನ ಮಂಗಲ ಕಯಿಪಿರಾ?

ಆಚೇಂಗಿ ಆಡ್ ಬುಡ್ ತೊಂದರೆ ಎಂತ? ಎಚ್ಚಕೋ ಅನ್ನತದ್ ಆಯಿತಿಲ್ಲೆಯಾ?

ನಿಂಗಕ್ ಎಕ್ಕಲೂ ಇದೆ. ಒಂದಾನೊ ಸಿರಿಯಸ್ಸಾಯಿತ್ ಗೇನ ಮಾಡತಿ. ಲೋಕತ್ ಕಣ್ಣಿಂಗಕ್ ನಿಂಗಡ ಮೂಡಿಯ ಉಳ್ಳುಂದ್ ಗೇನ ಮಾಡಿರಾ. ಇಕ್ಕಲೇ ಕಣ್ಣಿಂಗ ಬಪ್ಪೊ. ಇಂಞ ದಂಡ್ ಮೂಂದ್ ಕಾಲ ಕಯಿಂಜ ಪಿಂಞ ಮೂಡಿಕ್ ವಯಸ್ಸಾಚಿ. ಅದಂಡ ಅಕ್ಕಲೆ ಓದಿತಾಯಿತಿಂಜತ್ಂದ್ ಎಣ್ಣುವ.

ಇಕ್ಕ ನಾನೆಂತ ಮಾಡಡ್. ದಿವ್ಯಂಡ ತಕ್ಕನ ನೀನೂ ಕೇಟಿಯಲ್ಲಾ? ಎಣ್ಣಾಚಿ ಮಾಚಯ್ಯ.

ಕೇಟ. ಅವು ಎಣ್ಣಾಚಿ ಎಣ್ಣಿಯೆಂಡ್ ನಂಗ ಮುಂಡತೇ ಇಪ್ಪ ಕಯ್ಯುವಾ. ನಂಗಡ ಕೆಲಸತ್ ನಂಗ ಮಾಡಂಡು.

ಸೆರಿ. ಆಚೇಂಗಿ ಈ ವಿಷಯತ್ ನ ದಿವ್ಯಂಗ್ ಎಣ್ಣಂಡ ಅವ ಅನ್ನನೆ ಇರಡ್. ಏದೂ ಪೋಸ್ತ್ ಆಫಿಸಕ್ ಚಾಕ್ರಿಕ್ ಪೋಪಲ್ಲಾ. ಏದೇಂಗಿ ನಲ್ಲ ತಂದ್ ಬಂದಕ ಅರಿಂಜಿತ್ ಬಯ್ಯಂಜಿ. ಕಣ್ಣಿಂಗ್ ದಿವ್ಯನ ನೋಟುವ ಕೆಣ್ಣನ. ಅವ ಪೋಸ್ತ್ ಆಫಿಸಕ್ ಪೋಪಕ ನೋಟಿಯವಡ್. ಅಕ್ಕ ದಿವ್ಯಂಗ್ ನಂಗ ಮಾಡಿಯೆಂಡುಳ್ಳ ವಿಷಯ ಗೊತ್ತಾಪ್ಲೆ. ಚೆಡಿಯೂ ಮಾಡುಲೆ ಎನ್ನೆಣ್ಣುವಿಯಾ?

ನೇರೆ. ನಿಂಗಡ ಐಡಿಯಾ ಚಾಯುಂಡ್.

ಇಂಞ ಮಾಚಯ್ಯನ ಎಂತ ಗೇನ ಮಾಡಿತಿಂಜಿಯಾ? ಮದಿ, ಮದಿ ಜಾಸ್ತಿ ಆಯಿರತ್ ಮಿಂಞಕ್ ಮಾಂವ ಆಪಕುಳ್ಳಯಿಂಗ ನಲ್ಲ ಮೈಮನ ನೋಟಿ.

ನಾಡ ಮೈಮ ಆಪಂವೊ ಎನ್ನನೆ ಇಪ್ಪ ಗೊತ್ತಾ. ನಾನ್ ಅಂತವನೇ ತೇಡ್ವೊ.

ನಿಂಗಡ ಮಾದರಿ ಕುಡಿಕಾರ ಬೋಂಡ. ನಾನ್ ಅನುಭವಿಚಿಟ್ಟನ ನಾಡ ಮೋವಳೂ ಅನುಭವಿಚಿಡ್ವಕಾಕು.

ಅಲ್ಲಾ ನನ್ನ ಕೆಟ್ಟಿಯೆಂಡ್ ನೀನ್ ಎಂತ ಪಾಳಾಯ?

ಅದನ್ ಎಣ್ಣುವಕ್ ಪೋನಕ ಬಲ್ಲೋರ್ ಕಾದಂಬರಿಯೇ ಆಪ.

ಸುರು ಆಚಿ ನೀಡ ಅಚ್ಚಕ್ ಕಷ್ಟ ಇಂಜ ಪಿಂಇ ಎನ್ನಂಗ್ ನಾಡ
ಕೂಡ ಸಂಸಾರ ಮಾಡಿಯಾ?

ನಿಂಗಳ ಖುಷಿ ಪಟ್ಟಂಡ್ ಅಲ್ಲ. ನಾಡ ಮಕ್ಕಕಾಯಿತ್.

ಓಹೋ, ಇಂಇ ಮಿಂಇಕ್ ನೀಕ್ ಮಾಡುವಿ ನೋಟ್.

ನಾಕೊಂದೂ ಬೋಂಡ. ಎಂತ ಉಂಡೇಂಗಿಯೂ ಮಕ್ಕಕೆ ಇರಡ್.

ನೀನ್ ಒರ್ ರೇಡಿಯೋತ್‌ರ ಮಾದರಿ. ಅದೇ ರಾಗ ಅದೇ ಪಾಟ್.
ಎಣ್ಣೆಚಿ ಮಾಚಯ್ಯ.

ಅದ್ ಎಂತೇಂಗಿ ಆಡ್ ಒರ್ ನಲ್ಲ ಮೈಮನ ತೇಡಿ.

ಅಕ್ಕಣೆಕ್ ಮನೆಕಾರ ಕರಂಬಯ್ಯ ಮನೆಕ್ ಬಾತ್ ಎನ್ನತದ್ ವಡಿಯನೂ
ಪೊಣ್ಣಾರೋ ತಕ್ಕ ರಸ್ತೆ ಕೆತ್ತನೆ ಕೇಪ ಕೇಟತ್ ಕರುಂಬಯ್ಯ. ಒಂದೂ
ಇಲ್ಲೆ ತೆಳಿಚಂಡ್ ತೆಳಿಚಂಡ್ ಎಣ್ಣೆಚಿ ಮಾಚಯ್ಯ.

ವಿಷಯ ಇಲ್ಲತೆ ತಕ್ಕ ಇಚ್ಚಕ್ ಜೋರಾಪಾಲೆ ಕೇಟತ್ ಕರುಂಬಯ್ಯ.

ಅದ್ ನಾಡ ಚೋಮಕ್ಣ ಮೂಂದ ದಿನತಿಂಜ ಕೆಲಸಕ್ ಬಂದಾಲೆ.
ಅದಂಗ್ ನಾನ್ ಇವಕ್ ಎಲ್ಲಿಯ ಅಂವೊ ಬಾತೇಂಗಿ ದುಡ್ಡ್ ಕೊಡ್‌ಕಂಡ
ಎಣ್ಣೆ. ಆಚೇಂಗಿ ಅಂವೊ ಪೊಣ್ಣಾನ ಆಸ್ಪತ್ರೆಕ್ ಕಾಕಿಯ ಪೋಪಕ್ ದುಡ್ಡ್
ಕೇಟತ್‌ಲ್ಲೊ. ಇವ ಕೊಡತಿತ್. ಇಂದ್ ನೋಟುವಕ ಅಲ್ಲಿ ಕುಡಚಿತ್
ಚರಂಡಿಲ್ ಉಂಡ್ ಸೋಯ ಇಲ್ಲೆ.

ಓಹೋ ಇದಾ ವಿಷಯಾ?

ಅದಂಗೆ ಚೆನ್ನ ತಕ್ಕ ತಕ್ಕ ಆಯೆ. ಸಂಗತಿನ ಎಣ್ಣೆತೆ ಪೊಟ್ ಪರಂದತ್
ಮಾಚಯ್ಯ.

ಇಂಇನ್ನ ಭಾವ ವಿಶೇಷ್, ಮಳೆ ಮದಿಯಾ? ಆಕಾಶಕ್ ಯಾವನೊ
ಬೊಡಿ ಬೆಚ್ಚಿತ್ ಕಾಂಬ ತೂತ್ ಆನನಕೆ ಪೊಯ್ಯುವಾ. ಇದ್ ಆಗಸ್ತ್
ಇಂಇಗೂ ಮಳೆ ಕಮ್ಮಿ ಯಾಯಿಲೆ.

ನೇರ್ ಭಾವ, ಮಳೆ ನೋಟಿ ನೋಟಿ ಬುಡ್‌ಂಜಿ ಪೋಯಿತ್. ಪೊರಮೆ
ಪೋಪಕ್ ಕಯ್ಯಲೆ. ಬಟ್ಟೆಲ್ಲಾ ಪುಂಡೆ ಪುಂಡೆ ಆಯಿಪೋಪ. ಒಣಕಟ್ಟತೇಂಗಿ

ಒಣಗುವದ್ ಇಲ್ಲೆ. ಮುಗ್ಗ್ ವಾಸನೆ ಬೋರೆ.

ನೇರೆ ಮಕ್ಕ ಎಲ್ಲಾ ಎಂತ ಮಾಡುವ. ಒಬ್ಬ ಓದಿಯಡುಂಡ್.
ಪೆರಿಯವಕ್ ಪೋಸ್ಟ್ ಆಫೀಸ್‌ಲ್ ಚಾಕ್ರಿ ಆಯಿತ್.

ಹ್ಲಂ ಮೊನಿಯಾಂದ್ ಚೋಮುಣಿನ ಕ್‌ಟಿತಿಂಜತ್ ಅಕ್ಕ ಅವೊ
ಎಣ್ಣೆಚಿ. ಅಮ್ಮತ್ತಿ ಪೋಸ್ಟ್ ಆಫೀಸ್‌ಲ್ ಅಲ್ಲಾ?

ಹ್ಲಂ ಅಕ್ಕು.

ಚಾಕ್ರಿ ಆಚಿ. ಮಂಗಲ ಎನ್ನೇಂಗಿ ಉಂಡಾ?

ಸದ್ಯಕ್ ಒಂದೂ ಇಲ್ಲೆ. ಇಕ್ಕ ಕಕ್ಕಡ ತೇಂದಿಯಲ್ಲಾ ಇಂಞೂ ಒಂದೂ
ಗೇನ ಮಾಡಿತಿಲ್ಲೆ. ದಿವ್ಯಂಡೊ ಸದ್ ಇಲ್ಲೆ.

ಯಾವನೇಂಗಿ ಪಂದಿನ ಕೇಟಿತ್ ಬೋಡಿ ಬೆಪ್ಪರೇ? ಅದನ ನಂಗಳೇ
ಅರ್ಥ ಮಾಡಿಯವಂಡು. ಮಕ್ಕ ಎಣ್ಣೆಲೆ. ವಯಸ್ ಬಪ್ಪಕ ಅದ್ ಅಪವ್ವಂಡ
ಜವಾಬ್ದಾರಿ ನಲ್ಲದ್ ಬಾತೇಂಗಿ ಈ ಮೇ ತಿಂಗತ್ ಕಯಿಚಿರ್. ಸುಮಾರ್
ದಿನ ಎಲ್ಲಾ ಬೆಪ್ಪದ್ ಬೋಂಡ.

ಅಂದಕ ನಾನ್ ಮೆಲ್ಲೆ ಪೊರಡುವಿ. ಇಲ್ಲಿ ಬೇಲ್ ನೋಟಿಯ
ಪೋಕಾಂದ್ ಬಂದ. ಸುಮಾರ್ ದಿನ ಆಚಿಲ್ಲಾ ಅನ್ನನೆ ತಕ್ಕ ಪರಂದ್
ಪೋಕಾಂದ್ ಬಂದ. ಬರಡಾ ಬಪ್ಪಿ, ಮಾಚವ್ವ.

ಇರಿ ಭಾವ ಕುಡಚಿತ್ ಪೋಯಿ.

ಚೆನ್ನ ಕೆಲ ಸೆರಿ ಇಲ್ಲೆ. ಒಂದೂ ಬೋಂಡ ಬಪ್ಪಿ ಎಣ್ಣೆತ್ ಪೊರಟತ್
ಕರುಂಬಯ್ಯ.

ನಂಗ ಇಕ್ಕ ತಾನೇ ಇದನ ತಕ್ಕ ಪರಂದಿಯೆ ನೋಟಿರಾ, ಜನ
ಕೇಪಕ್ ಸುರು ಮಾಡಿತ್.

ಜನ ಎಣ್ಣುವ ಎಣ್ಣೆಯಂಡ್. ಯಾವಂಗೊ ಕೊಡ್‌ಪಕಯ್ಯಲೆ. ನಂಗಡ
ಆಸ್ತಿಕ್ ಅವಡ ಚಾಯಿಕ್ ಏದ್ ಸೆರಿ ಬಪ್ಪಾ ನೋಟಿತ್ ತಕ್ಕ ಪರಂದತೇಂಗಿ
ಆಚಿ. ಆತುರ ಮಾಡಂಡ.

ನೋಟಿ ದಾರ್‌ನ ನೋಟಿವಿರಾಂದ್ ನಾನೂ ನೋಟ್‌ವಿ ಮಂಡೆ

ತಿರ್ಕಚಿ ಮಾಚವ್ವ.

ದಿವ್ಯಂಗಿಂಜ ಜಾಸ್ತಿ ಇವಳೆ ಆತುರತ್ ಉಂಡ್. ಇಂಞ ಇದೇ ರಾಮಾಯಣ. ಇಂಞ ನನ್ನ ನಿಪ್ಪಕ್ ಅಳಪಕ್ ಬುಡುಲೆ. ಅದೃಷ್ಟ ಉಂಡೇಂಗಿ ಆಪ. ಎಲ್ಲಿ ಯೋಗ ಬಯಂದಿತೋ ಅಲ್ಲಿಯೆ ಆಪೋ ಕಂಕಣ ಭಾಗ್ಯ ಕೂಡಿ ಬಂದಕ ದಾರ್ ಎಂತ ಮಾಡಿಚೇಂಗಿಯೂ ತಪ್ಪು ಚಿಡುವಕ್ ಕಯ್ಯಲೆ. ನಂಗ ಬೋಂಡ ಬೋಂಡ ಎಣ್ಣಿಚೇಂಗಿ ಅದ್ ಆಯಿತೆ ಆಪ. ತಾಂಡಲ್ಲಿಯೆ ಎಣ್ಣಿಯಂಡತ್ ಮಾಚಯ್ಯ ದಿವ್ಯ ಅಪ್ಪವ್ವಂಡ ತಕ್ಕನ ಕೇಟಂಡ್ ಮನಸ್ಸೊರಳಿಯೆ ಗೇನ ಮಾಡಚಿ. ಅಲ್ಲಾ ನಾಡ ಕ್ಕಣ್ಣ ಎನ್ನನ್ನಿಕ್ಕೂ ಎಂತ ಮಾಡಿಯಂಡಿಕ್ಕು? ಫಿಲ್‌ಲ್ ಕಾಟುವ ಮಾದರಿ ಕಾಂಬ ಇಂಜತೇಂಗಿ ಎಚ್ಚಕ್ ಚಾಯಿ ಇಂಜತ್? ಚಾಯಿಕಾರನ? ಋಷಿಕಾರನ? ಎನ್ನನ್ನೆ ಉಂಡೋ? ನಾಡ ಇಷ್ಟತಾರ ಪೋಲೆ ಇಂಜತೇಂಗಿ ಪರೋಲೆ ಇಲ್ಲತ ಪೋಚೇಂಗಿ ಎನ್ನನೆ? ಇಯಂಗಡ ತಕ್ಕ ಕೇಪಕ ದಾಡೇಂಗಿ ಕೂಡೆ ಪೋಯಿರೋಂದ್ ಆಪ. ಆಚೇಂಗಿ ಎಂತ ಮಾಡುವೊ ಬಯ್ಯಕ್ ಒಂದೂ ಮಾಡುವ ಕಯ್ಯಲೆ.

ಅಲ್ಲಾ ಇಯಂಗಕ್ ನಾಡ ಮೇಲೆ ನಂಬಿಕೆ ಇಲ್ಲೆಯಾ? ನನ್ನ ನೋಟ್‌ಚೇಂಗಿ ದಾರ್‌ನೊ ಕೊದಿಚಂಡುಳ್ಳ ಮಾದರಿಕಾಂಬ? ಇಯಂಗಕ್ಕೆಲ್ಲಾ ಎಂತದ್ ಆಪೋ? ಎಚ್ಚಕೊ ಅಪ್ಪವ್ವ ಉಂಡ್. ಆಚೇಂಗಿ ನಾಡ ಅಪ್ಪವ್ವಂಡ ಮಾದರಿ ದಾರೂ ಇಪ್ಪಕ್ಕಿಲ್ಲೆ. ಮಕ್ಕಳೆಲ್ಲಾ ಎಚ್ಚಕ್ ಚಾಯಿತೆ ನೋಟಿಯವ ನಾಡ ಫೆಂಡ್ ಕಲ್ಪನಾನ ಅವಡ ಅಪ್ಪವ್ವ ಇಕ್ಕಲೂ ಕೂಡಿ ಕುಂಞಿರ ಮಾದರಿ ನೋಟುವ. ನಾಡ ಅಪ್ಪನೂ ಉಂಡ್ ನಾಕ್ ನಾಪದ್ ವಯಸ್ಸಾನ ಮಾದರಿ ಕಳಿಪ. ನಾನ್ ಇಯಂಗಕ್ ಪುಟ್ಟುವ ಬದಲ್ ಬೋರೆ ದಾರ್‌ಕೇಂಗಿ ಪುಟ್ಟಿತುಂಡೇಂಗಿ ನಲ್ಲದ್ ಇಂಜತ್. ಆಚೇಂಗಿ ನಾಡ ಕರ್ಮ. ಇಯಂಗ್‌ಕೆ ಪುಟ್ಟಿನ. ಇದಂಗೆ ಎಣ್ಣಿವೊ ಓದಿತಾನಕೆ ಮನೆಲ್ ಇಪ್ಪಕಾಗಂದ್ ಮಂಗಲ ಎಣ್ಣಿಯಂಡ್ ಪ್ರಾಣ ತಿಂಬ. ಪೆತ್ತಿತ್ ಚಾಕಿತ್ ಒರ್ ವಿದ್ಯೆ ತಂದಿತ್ ಮಂಗಲ ಕಯಿಚಿ. ಕೊಡ್‌ತತೇಂಗಿ ಇಯಂಗಡ ಜವಾಬ್ದಾರಿ ತೇಂದನಕೇಂದ್ ಗೇನ ಮಾಡಿತ್. ಆಚೇಂಗಿ ನಾಡ ಇಷ್ಟತೆನ ಕೇಪಯಿಂಗ ದಾರ್? ನಾಳೆ, ದಾರೊಬ್ಬ ಬಪ್ಪಾ. ನಾನ್ ಅವಂಡ ಮಿಂಞಲ್ ಪೋಂಡು. ಋಷಿಯಾಚೇಂಗಿ ಮಾತ್ರ ಮಿಂಞಕ್. ಅಕ್ಕ ನಾಡ ಆಸೆಕ್ ಬೆಲೆ ಇಲ್ಲೆಯಾ? ಇದ್ ಎನ್ನತ ಎತ್ತ

ವ್ಯಾಪಾರವಾ? ಏದ್ ಚಾಯಿ ಅದನ ಎಡಪಕ್? ಒರ್ ಮನೆನ ಉದ್ದಾರ ಮಾಡುವ ಪೊಣ್ಣಾಕ್ ಎನ್ನಂಗ್ ಶಿಕ್ಷೆ ಇದನ ದಾರೂ ಎನ್ನಂಗ್ ಕೇಪಾಲೆ. ಎಲ್ಲಾರೂ ಕಣ್ಣ್ ಮುಚ್ಚಿಯಂಡ್ ಮುಂಡತೆ ಇಪ್ಪ.

ಅಕ್ಕು, ಇಕ್ಕಂಡು ಇಲ್ಲತ ಪೋಚೆಂಗಿ ಆ ಮೂಡಿ ಘಾಟಿ ಎಣ್ಣುವ ತಕ್ಕು ಬಪ್ಪ. ಮಿಂಇಕ್ ಬಾವಕೂ ಕಷ್ಟ ಆಪ ಜೊತೆಲ್ ನಾಡನ್ನತ ಅಪ್ಪವ್ವಂಗ ಇಂಜತೆಂಗಿ ತೇಂದತ. ಬಾಯಿ ಎಡಪಕ್ ಬುಡುಲೆ. ಇಚ್ಚಕ್ ಕಷ್ಟತ್ ಇಯಂಗಳ ಚಾಕುವಕ್ ದಾರ್ ಎಣ್ಣಿಯೆ? ಈ ತಾಪತ್ರೆಯ ಎಲ್ಲಾ ಎನ್ನಂಗ್? ಮಕ್ಕ ಇಲ್ಲತ ಎಚ್ಚಕೂ ದಂಪತಿಯ ಇಲ್ಲೆಯಾ? ಅಕ್ಕ ಈ ಎಲ್ಲಾ ಜವಾಬ್ದಾರಿ ಇಪ್ಪ? ಇಂಜಿಲೆಲ್ಲಾ ಚಾವ ಕೆತ್ತನೆ ಆರಾಮಲ್ ಇಕ್ಕಲು ಅಂದ್ ಪೂವಮ್ಮ ಎಣ್ಣೆಚಿ. ಓದಿತಾನದು ಅಲ್ಲಿಯೆ ಚಾಕ್ರಿ ಎತಂಡ್ ಕೂಡಿರ್ಂದ್. ಆಚೇಂಗಿ ಅವಡ ತಕ್ಕರ ಅರ್ಥ ನಾಕ್ ಇಂದ್ ಗೊತ್ತಾಯಡುಂಡ್. ಈ ಮನೆಲ್ ಇಪ್ಪದೂ ಬೋಂಡ. ಇಯಂಗಡ ತಕ್ಕು ಕೇಪದೂ ಬೋಂಡ ಅನ್ನನ ಗೇನ ಮಾಡಿಯಂಡ್ ದಿವ್ಯ ವರಿರಾತ್.

ಇಂದ್ ದರ್ಶನ್ ಪೋನ್ ಮಾಡಿತಿಂಜತ್ ಎಣ್ಣೆಚಿ ಚೋಂದವ್ವ.

ಅಕ್ಕುವಾ ಎಂತ ವಿಶೇಷಲ್ಲೊ ಕೇಟತ್ ಕಾಳಯ್ಯ.

ಒಂದೂ ಇಲ್ಲೆ ಅನ್ನನೆ ಪೋನ್ ಮಾಡಿಯೆ ಕೈಲ್ ಪೋಲ್ಡಕ್ ಮನೆಕ್ ಬಪ್ಪಲ್ಲೆ.

ಮೊನಿಯಾಂದ್ ಬೋಜಕ್ಕಿನ ಕಟ್ಟಿ ತಿಂಜತ್. ನಂಗಡ ದರ್ಶನಕ್ ಒರ್ ಮೂಡಿ ಮಾಡಿತಿಂಜತ್.

ದಾರ್ಲೋ ಮೂಡಿ?

ಮೂಡಿ ಅವಡ ಅಣ್ಣಂಡ ಮೋವ. ಓದಿತ್ ಕೆಲಸತುಂಡಲ್ಲೊ. ನಂಗಡ ದರ್ಶನ್ಕೂ ಮಂಗಲ ಕಯಿಪ ವಯಸ್ಸು ಅಲ್ಲಾ, ಅದಂಗ್ ಎಣ್ಣಿಯೆ. ಮಕ್ಕ ಎಚ್ಚಕ್ ಬೆರಿಯ ಬೊಳಂದರುವ ನಾಕೂ ಇದೂ ಗೇನ ಬಂದಾಲೆ.

ನಂಗಡ ಮಕ್ಕಡ ವಯಸ್ಸು ನಂಗಕ್ ಗೊತ್ತಾಪುಲೆ. ಬೋರೆ ದಾರೇಂಗಿ ಇನ್ನನೆ ಎಣ್ಣುವಕಲೆ ನಂಗಕ್ ಎಚ್ಚರಾಪೊ.

ಅಕ್ಕ ನಾನೂ ಇವನ ಗೇನ ಮಾಡಿತಿಂಜಿಲೆ. ಬೋಜಕ್ಕಿ ಎಣ್ಣವಕ ನೋಟ್‌ಂದ್ ಎಣ್ಣಾನ.

ಏದೂ ಕೂಡಿ ಅಂವೊ ಕೈಲ್ ಪೋದ್‌ಕ್ ಬಪ್ಪ ಅಲ್ಲಾ ಅನ್ನನೆ ದಿನೇಶ್ ಬಪ್ಪ. ಎಲ್ಲಾ ತಕ್ಕ ಪರಂದಿತ್ ನೋಟಿತ್. ದರ್ಶನ್ ಎಂತ ಎಣ್ಣವೊ ಕೇಕನ.

ನಾನೂ ಇದನೆ ಗೇನ ಮಾಡಿತಿಂಜ. ಅಕ್ಕಣೆಕ್ ನಿಂಗಳೆ ಇದನ ಎಣ್ಣಿರಾ.

ಸೆರಿ, ನಾನ್ ಚೆನ್ನ ಬೇಲ್ ಕರೆಕ್ ಪೋಯಿತ್ ಬಪ್ಪ. ಅನ್ನನೆ ಗಪ್ಪುಕ್ ಪಂದಿಯರ್ಚಿಕ್ ಎಣ್ಣಂಡು ಕೈಲ್‌ಪೋಲ್ದಕ್ ಪಂದಿ ಕೆತ್ತುವಲ್ಲಾ.

ಈ ಕುರಿ ಚೆನ್ನ ಜಾಸ್ತಿ ಎಣ್ಣಿ. ಮಕ್ಕಮರಿ ಎಲ್ಲಾ ಉಂಡ್.

ಹ್ಲಂ, ಆಚಿ ಬಪ್ಪಿ.

ಸೆರಿ, ಪೋಯಿತ್ ಬಾರಿ.

ದರ್ಶನ್, ನಾಕ್ ನಿನ್ನ ಓರ್ ತಕ್ಕ ಕೇಕಂಡು! ಸೆರಿಯಾನ ಉತ್ತರ ತಪ್ಪಿಯಾ? ಎಣ್ಣೆಚಿ ಕರಣ್.

ಹ್ಲಂ ಕೇಳ್.

ಪೋಟ್ ಪರೆಯುವಕಾಗ, ಇದ್ ನೀಡ ಪರ್ಸನಲ್ ವಿಷಯ.

ಅನ್ನತ ನಾಡ ಪರ್ಸನಲ್ ವಿಷಯ ಒಂದೂ ಇಲ್ಲೆ ಎಲ್ಲಾ ನೀಕ್ ಗೊತ್ತುಳ್ಳದೆ ಅಲ್ಲಾ?

ಆಚೀಂಗಿಯೂ ಒರ್ ವಿಷಯ ಉಂಡ್. ಎಂತ ಕೇಳ್.

ಕಯಿಂಜ ಕುರಿ ನೀನ್ ಮನೆಕ್ ಪೋಯಿತ್ ಬಂದಲ್ಲಿಂಜ ಚೆನ್ನ ಸೆರಿ ಕಂಡಿತಿಲ್ಲೆ. ಎಂತೋ ಒರ್ ವ್ಯಸನ. ಎಂತ ಆಚಿ. ನೀಕ್? ಒರ್ ಆರ್ ತಿಂಗಳ್ ಬಯ್ಯ. ಎಕ್ಕಾಲೂ ಪೋನ್‌ಲ್ ಇಪ್ಪ ಇಂಜಿಯಾ? ಆಚೀಂಗಿ ಇಕ್ಕ ಪೋನ್‌ನೇ ಮುಟ್ಟುವಕ್ ಪೋಪಾಲೆ. ಎನ್ನಂಗ್ ಎಂತ ವಿಷಯ ಎಣ್ಣೆ.

ಅದೆಲ್ಲಾ ಪಳೆಯದ್. ಎಲ್ಲಾ ಪಾಳಾಯಿಪೋಚಿ ಎಣ್ಣವಕ್ ಒಂದೂ ಇಲ್ಲೆ.

ಎಂತಾಚಿ ದರ್ಶನ್? ಎನ್ನಂಗ್ ಈ ತರ ತಕ್ಕ ಪರಂದಂಡುಳ್ಳಿಯಾ?

ಪಳೆಯಾನ ಗೇನ ಮಾಡಿತ್ ಪ್ರಯೋಜನ ಇಲ್ಲೆ. ಪಾಸ್ ಪಾಸ್ ಪಾಸ್, ನಾನ್ ನೀಕ್ ನೊಂಬಲ ಮಾಡಂಡುಂದ್ ಈ ತಕ್ಕನ ಕೇಟಂಡಿಲ್ಲೆ. ಇಂಇಗೊಬ್ಬಂಡ ಜೊತೆಲ್ ಎಣ್ಣೆಚೆಂಗಿ ಮನಸ್ಸರ ಭಾರ ಕಮ್ಮಿ ಆಪ.

ದರ್ಶನ್ ಮೂಡ್ ಚೋಂದತ್ ಪಳೆಯದೆಲ್ಲಾ ಕಣ್ಣ್ ಮಿಂಗಳಲ್ ಬಪ್ಪ ಕೂಡ್ ಚಿ. ಎನ್ನನೆ ಎಣ್ಣಂಡೂಂದೆ ಗೊತ್ತಾಯಂಡ್ ಇಲ್ಲೆ ಕರಣ್.

ದರ್ಶನ್ ಸಮಾಧಾನ ಮಾಡಿಯಂಡ್ ನಡಂದನ್ನೆಲ್ಲಾ ಕರಣ್ ಕಣ್ಣೆಚಿ.

ನಾನ್ ಅವಳ ಎಚ್ಚಕ್ ಇಷ್ಟಪಟ್ಟಿತಿಂಜ ಗೊತ್ತಾ? ಆಚೇಂಗಿ ಅವ ಛೇ, ನಾಕ್ ಎಣ್ಣವಕೆ ಇಾಣ ಆಪ.

ದರ್ಶನ್ ಸಮಾಧಾನ, ನೀಡ ಕತೆನ ಕೇಟಿತ್ ನಾಕ್ ಒರ್ ಬರಿಯ ತೆಳಿಯೂ, ಇಂಇಗೋರ್ ಬರಿಯ ಬೇಜಾರವು ಆಯಡುಂಡ್. ನಾನ್ ಎಂತೋ ಒರ್ ಬಲ್ಯ ವಿಷಯಾಂದ್ ಗೇನ ಮಾಡ್ ನ. ಆಚೇಂಗಿ ಇದ್ ಮಾಮೂಲ್ ಎಲ್ಲಾಡ ಬಾಳ್ಲ್ ಇನ್ನತದ್ ಆಯಿತೆ ಆಪ. ನಂಗಕೆ ಗೊತ್ತಿಲ್ಲತನಕೆ ನಂಗಕ್ ಒರೋರ ಮೂಡಿಯಳ ಇಷ್ಟ ಆಪ. ಯೋಗ ಬಯಂದತೇಂಗಿ ಮಂಗಲಾಪ ಇಲ್ಲತ ಪೋಚೇಂಗಿ ಇಂಇಗೊಬ್ಬ ಆ ಜಾಗತ್ ನ ತುಂಬ್ ವ. ನಾಡ ಕತೆಕ್ಕಿಂಜ ನೀಡ ಕತೆ ಒಂದೂ ಇಲ್ಲೆ. ಎಣ್ಣೆಯಂಡ್ ಪತ್ತೆಕಾಲ ಬಯ್ಯ ಪೋಚಿ ಕರಣ್.

ನಾನ್ ಕವಿತ ಎಣ್ಣವ ಒರ್ ಮೂಡಿನ ಇಷ್ಟಪಟ್ಟ ಅವಳೂ ನನ್ನ ಕೊದಚತ್. ಆಚೇಂಗಿ ಅವಡ ಪ್ರೀತಿ ನಾಡೊಬ್ಬಂಡ ಮೇಲೆ ಇಂಜಿಲೆ. ನಾನ್ ಅವಕ್ ಓದುವಕ್ ಸಹಾಯ ಮಾಡ್ ನ ಓದಿಚಿಟ್ಟ. ಚಾಕ್ರಿ ಕ್ಲಾಟ್ ನ ಪಿಂಇ ಅವಕ್ ನಾನ್ ದಾರೋ ಆಯಿಟ. ಇಕ್ಕ ನನ್ನ ದಾರ್ಂದೆ ಗೊತ್ತಲೆ ಎಣ್ಣವ. ನಾನ್ ಅವಡ ಗೇನತಲೆ ತುಂಬಾ ಅಡಿಕ್ ಪೋಯಿಟ ಸುಮಾರ್ ಒರ್ ಕಾಲ ನಾನ್ ಪಟ್ಟ ಕಷ್ಟ ದಾರ್ಕೂ ಗೊತ್ತಲೆ. ಆಚೇಂಗಿ ಬಯ್ಯ ನಾನ್ ಗೇನ ಮಾಡುವಕೆ ಇದೆಲ್ಲಾ ಪುಚ್ಚೆಂದ್ ಆಚಿ. ಒರ್ ಮೂಡಿಕಾಯಿತ್ ನಾಡ ಬಾಳ್ ನ ಪಾಳ್ ಮಾಡುವದ್ ಸೆರಿ ಅಲ್ಲಾಂದ್ ಗೊತ್ತಾಚಿ. ಅದನ್ನೆಲ್ಲಾ ಮರಂದಿತ್ ಇಕ್ಕ ನಾನ್ ಪೂಜನ ಮಂಗಲಾಯೆ. ಅವ ನಾಕ್ ಸೆರಿಯಾನ ಜೋಡಿ ನಾಡ ಎಲ್ಲಾ ಕಷ್ಟ ಸುಖತೂ ಒಂದಾಪ. ನಾನಿಲ್ಲತ ಪೋಚೇಂಗಿಯೂ

ನಾಡ್‌ಲ್ ಕೂಡಿಯಂಡ್, ಚಾಯಿಲ್ ನೋಟಿಯಂಡ್ ಪೋಯಂಡುಂಡ್. ನಾಕೂ ಮನೇರ ವರೀಸ್ ಇಲ್ಲೆ. ಆಚೇಂಗಿ ದುಡ್ಡ್ ಅಯಿಚಿ ಕೊಡ್‌ಪಿ. ರಜತ್ ಮನೆಕ್ ಪೋಪಕ ಖುಷಿ ಆಪ. ಚಾಯಿಲ್ ತಕ್ಕಾರ ಮಾಡುವ. ಎಲ್ಲಾ ಮೂಡಿಯಳೂ ಒರೆ ಪೋಲೆ ಇಪ್ಪಾಲೆ. ಕವಿತಂಗೂ, ಪೂಜಂಗೂ ಬಾರಿ ವ್ಯತ್ಯಾಸ ಉಂಡ್. ಕವಿತಂಡ ಮಾದರಿಯೆ ಎಲ್ಲಾ ಮೂಡಿಯಳೂಂದ್ ಗೇನ ಮಾಡಿತಿಂಜಕ ಇಂದ್ ನಾನ್ ಇಪ್ಪ ಇಂಜನೊ ಇಲ್ಲೆಯೊ.

ನೀಡ ಕತೆಕೇಪಕ ನೀಕ್ ನಾಡ ಕಾಲ್ ಭಾಗತರಚ್ಚುಕೂ ಮೋಸ ಆಯಿತಿಲ್ಲೆ. ನೀಕ್ ಅವ ದಾರಂದ್ ಗೊತ್ತಾಲೆ. ಬೊರಿ ಪೋನ್ ಕಳಿ. ಇದನ್ನೆ ಆಕಾಶ ಬುದ್ಧ ಮಾದರಿ ಎಡ್ತಂಡ್ ಕಳಿಪಿಯಲ್ಲಾ. ನೀನೋರ್ ಬಾಲೆಕಾರ, ಚಾಯಿಕಾರ, ಆರ್ಮಿಕಾರ. ನೀನ್ ಮನಸ್ಸು ಮಾಡ್‌ಚೇಂಗಿ ದಿವ್ಯಗಿಂಜಿ ಅಪ್ಪಂಡನ್ನತ ಮೂಡಿ ಕ್ಕಟ್ಟುವಾ. ಯೋಗ ಬಪ್ಪಕ ಎಲ್ಲಾ ತಾನಾಯಿತೆ ಬಂದ್ ಕೂಡ್‌ವ. ನೀಕೂ ಮಂಗಲ ಕಯಿಪ ವಯಸ್ಸಾಯಿತ್ ಈ ಕುರಿ ಮನೆಕ್ ಪೋಯಿತ್ ಮೂಡಿ ತೇಡ್ ನಲ್ಲದೇ ಕ್ಕಟ್ಟುವ. ಪಳೆಯನ ಗೇನ ಮಾಡತೆ. ನೀನ್ ಎಣ್ಣುವದ್ ನೇರೆ ಕರಣ್. ಆಚೇಂಗಿ ನಾಡ ಮನಸ್ಸು ಮಾತ್ರ ದಿವ್ಯ ನಾಕ್ ಕ್ಕಟ್ಟುವಾಂದ್ ಎಣ್ಣುವ. ಅವಳ ನಾನ್ ಬಜ್ಜತೇಂಗಿಯೂ ಅವಡ ತಕ್ಕ ಬಾಕ್. ತಳಿ ಇಂಞೂ ನಾಡ ಮನಸ್ಸಲಿಂಜ ಪೋಯಿತಿಲ್ಲೆ. ಬಂದ ಚೆಡಿಲ್ ಅವಡ ನಂಬರ್‌ನ ಮೊಬೈಲಿಂಜ ಡಿಲೀಟ್ ಮಾಡಿಟ. ಆಚೇಂಗಿ ಇಕ್ಕ ತಕ್ಕ ಪರೆಯಂಡುಂದ್ ಆಪ. ಎಂತ ಮಾಡುವೊ ಗೊತ್ತಾಯಂಡಿಲೆ.

ದರ್ಶನ್ ನಾನ್ ಇಚ್ಚಕ್ ನೇರ ಎಣ್ಣಾನದ್ ನೀಡ ಮಂಡೆಕ್ ಪತ್ತಲಿಯಾ? ಪುನಾದಿಯೊ ಅದನೆ ಎಣ್ಣುವಿಯಲ್ಲಾ. ನೀಕ್ ಅಚ್ಚಕ್ ನಂಬಿಕೆ ಉಂಡೇಂಗಿ ಬೆಚ್ಚ. ಬೋಂಡಾಂದ್ ಎಣ್ಣಲೆ ಆಚೇಂಗಿ ಇಕ್ಕ.

ಇಲ್ಲೆ ಕರಣ್. ಅವಕೂ ನಾಕೂ ಜನ್ಮಜನ್ಮಾಂತರತರ ಸಂಬಂಧ ಉಂಡ್. ಇಲ್ಲತ ಪೋಚೇಂಗಿ ನಾಕ್ ಅವಳ ನೋಟತೆ ಈ ತರತರ ಭಾವನೆ ಬಪ್ಪಯಿಂಜಿಲೆ. ಬೊರಿ ಅವಡ ತಕ್ಕ ತಳಿಯೆ ನನ್ನ ಈ ಮಟ್ಟಕ್ ಕೊಂಡ ಬಂದಿತಿಪ್ಪಕ...

ಸ್ವಾಪ್ ಇಟ್ ದರ್ಶನ್, ನೀನ್ ಏದ್ ಕಾಲತ್ ಉಳ್ಳಿಯಾ? ಇದ್

ಇಂಟರ್‌ನೆಟ್‌ಯುಗ. ಎಚ್ಚವಚ್ಚಕ್ ದೂರತ್ ಉಳ್ಳಯಿಂಗ, ತಂಗಕ್ ಗೊತ್ತಿಲ್ಲತನಕೆ ಪರಿಚಯ ಆಪ. ಆ ಪರಿಚಯ ಎಲ್ಲಾ ಜನ್ಮಜನ್ಮಾಂತರತ್ ಸಂಬಂಧವಾ? ಚೆನ್ನ ಪ್ರಾಕ್ಟಿಕಲ್ ಆಯಿತ್ ಗೇನ ಮಾಡ್. ಬಜ್ಜತ್ ಕರಣ್.

ನೀಕ್ ಎಚ್ಚಕ್ ಎಣ್ಣಿಚೇಂಗಿಯೂ ಅಚ್ಚಿಕೆ. ನಾನೆ ನೀಡ ಮನೆಕ್ ಪೋನ್ ಮಾಡಿತ್. ನೀಕೋರ್ ಮೂಡಿ ತೇಡುವಕ್ ಎಣ್ಣುವಿ.

ದಯಬೆಚ್ಚಿತ್ ಆ ಕೆಲಸ ಮಾಡಿರತೆ. ಇಂಇ ನಾಡ ಅವ್ವ ಬಂದಯಿಂಗಕ್ಕೆಲ್ಲಾ ಮೂಡಿ ಮಾಡುವಕ್ ಎಣ್ಣಿರುವಾ. ನಾಡ ಮನಸ್ಸೆಕ್ಕೊತ್ತ ಮೂಡಿ ಕೊಟ್ಟುವಕ ನಾನೆ ನೀಕ್ ಎಣ್ಣುವಿ.

ಸೆರಿ ಅಂದಕ ನಾಕ್ ಡ್ಯೂಟಿಕ್ ಟೈಂ ಆಚಿ ಪೊರ್ಡಾವಿ.

ದಿವ್ಯ ಎಂತ ಮೂಡಿ ನೀಡ ತಕ್ಕಾರ ಮೋಡಿ. ಒರ್ಕಾಲ ಆಚೇಂಗಿಯೂ ನಿನ್ನ ಮರ್ಪಕಯ್ಯುಲೆ. ತಕ್ಕಾಲೆ ಇಚ್ಚಕ್ ಮೋಡಿ ಮಾಡ್‌ವ ನಿನ್ನ ನೋಟಚೇಂಗಿ ಎನ್ನನೆ? ಅದಂಗೆ ಕಾಂಬ ನಿನ್ನ ಕಾಂಬ ಯೋಗ ನಾಕಿಲ್ಲತಾಯಿಟ.

ನಾಡ ಮನಸ್ಸೆ ಎಣ್ಣುವ ದಿವ್ಯ ನೀಕ್ ಕೊಟ್ಟಿಲೆ ಕೊಟ್ಟುವಾ. ಇದ್ ಸತ್ಯ ಆ ನಂಬಿಕೆ ನಾಕುಂಡ್. ನೀನ್ ಎಲ್ಲಿಯೆ ಇರ್ ಒಂದಲ್ಲ ಒರ್ ದಿನ ನೀನ್ ನಾಕ್ ಕಾಂಬಿಯಾ?

ಇಕ್ಕ ನೀಡ ಮಂಗಲಾಯಿತಿಕ್ಕೊ, ಇಲ್ಲೆಯೊ ನಾಕ್ ಗೊತ್ತಾಲೆ. ಆಚೇಂಗಿ ನಾನ್ ದೇವಳ ಗೇನ ಮಾಡಿಯೋವಿ ನೀಕ್ ಮಂಗಲಾಕಂಡ್‌ಂದ್. ನೀನ್ ನನ್ನ ಸ್ವಾರ್ಥಿಂಡ್ ಗೇನ ಮಾಡು ಆಚೇಂಗಿ ನಾನ್ ಇನ್ನನೆ ಬೋಡಿಯವೊ ನಂಗಳ ಒಂದಾಪನಕೆ ಮಾಡ್‌ಂದೆ ಕೇಟವೊ. ನೀಕ್ ನಾಡ ಮೇಲೆ ಇಕ್ಕಲೂ ಚೆಡಿ ಇಕ್ಕು. ದಯಬೆಚ್ಚಿತ್ ಆ ಚೆಡಿನ ಬೆಚ್ಚವತೆ. ಅಂದ್ ನೀನ್ ಪಾರಕಾಪಿಚಿಟ್ಟ ಚೆಡಿಲ್ ತಾರಮಾರ ತಕ್ಕ ಪರಂದ್‌ಟ. ಮಾಘ್ ಕೇಕನ ಎಣ್ಣಿಚೇಂಗಿ ನಂಬರ್‌ನ ಡಿಲೀಟ್ ಮಾಡಿಟಿಯಾ? ಅಲ್ಲಾ ಬೆಚ್ಚಂಡಿಯಾ? ಉಂಡೇಂಗಿ ಒಮ್ಮ ನಾಕ್ ಒರ್ ಮಿಸ್‌ಕಾಲ್ ತಾ. ನೀಡ ಕೂಡೆ ತಕ್ಕ ಪರೆಯೊಂಡು. ಇಂಜಕ್ಕಿಂಜನಕೆ ದರ್ಶನ್‌ಕ್ ಎಂತೋ ಗೇನ ಆಚಿ. ಮನೆಲುಳ್ಳ ಮೊಬೈಲ್ ದಿವ್ಯಂಡ ನಂಬರ್ ಉಂಡ್ ಈ ಕುರಿ ಪೋಪಕ ನೋಟಂಡುಂದ್ ಗೇನ ಮಾಡಿಯಂಡ್ ಡ್ಯೂಟಿಕ್ ಪೋಪಕ್ ರೆಡಿ ಆಚಿ ದರ್ಶನ್.

ಒರ್ವಾರ ಕಯಿಂಜತ್, ದರ್ಶನ್ ಸೆಪ್ಟೆಂಬರ್ ಫಸ್ಟ್ ಮನೆಕ್ ಬಾತ್. ಬಂದವನೆ ಪಳೆಯ ಮೊಬೈಲ್ ತೇಡ್ಚಿ. ಅದ್ ಕಟ್ಟಲೆ. ಅವ್ಲೊನ ಕೇಟತ್.

ಮಮ್ಮಿ ಇಲ್ಲಿಯೋರ್ ಪಳೆಯ ಮೊಬೈಲ್ ಇಂಜತಲ್ಲಾ ಅದ್ ಎಂತ ಆಚಿ?

ಓ ಅದಾ! ನಾನ್ ಕುಂಇಕ್ ಕಳಿಪಕ್ ಕೊಡ್ತ. ಮೊಬೈಲ್ ಬೋಂಡುಂದ್ ಮೊರಟಿತಿಂಜತ್.

ನೀಕ್ ಬೋರೆ ಒಂದೂ ಕಟ್ಟಲಿಯಾ? ಮೊಬೈಲ್‌ನ ಯಾವನೆಂಗಿ ಮಕ್ಕಡ ಕೈಕ್ ಕೊಡ್ಪ?

ಅದ್ ಪಳೆಯದಲ್ಲಾ ದಾರೂ ಎಡ್ತ ಪೋಪ ಇಂಜಿಲೆ. ದರ್ಶನ್ ಕುಂಇರ ಕೈಲಿಂಜ ಮೊಬೈಲ್ ಕೇಟಂಡತ್. ದಿವ್ಯಂಡ ನಂಬರ್‌ನ ತೇಡ್ಚಿ. ಕಡೇಕೂ ನಂಬರ್ ಕಟ್ಟಚಿ.

ದರ್ಶನ್ ಮುಷಿಲ್ ನಂಬರ್ ಎಡ್ತಂಡ್. ಕುಂಇಕೋರ್ ಪೂಮುತ್ತ್ ಕೊಡತತ್. ಮೊಬೈಲ್‌ನ ವಾಪಾಸ್ಸ್ ಕೊಡತತ್.

ಚೋಂದವ್ವಂಗ್ ಮೋಂವಂಡ ಕಳಿಕಂಡಿತ್ ಆಶ್ಚರ್ಯ ಆಚಿ. ಆಚೇಂಗಿಯೂ ಕೇಪಕ್ ಪೋಯಿಲೆ.

ದರ್ಶನ್ ನಂಬರ್ ಎಡ್ತಂಡ್ ನಂಬರ್ ಒತ್ತಚಿ. ಆಚೇಂಗಿ ದಿವ್ಯಂಡ ನಂಬರ್ ಸ್ವಿಚ್ ಆಫ್‌ಂದ್ ಬಾತ್.

ಛೇ, ಎಚ್ಚಕ್ ಕಷ್ಟಪಟ್ಟಿತ್ ನಂಬರ್‌ನ ತೇಡ್‌ನ ಆಚೇಂಗಿ ಪ್ರಯೋಜನ ಇಲ್ಲೆ. ಅವ ನಂಬರ್ ಬೋರೆ ಮಾಡಿತಿಕ್ಕು ದಿವ್ಯ. ನೀನ್ ನನ್ನ ಶಾಶ್ವತ ಆಯಿತ್ ದೂರ ಮಾಡಿಟಿಯಾ. ನಂಬರ್ ಛೇಂಜ್ ಮಾಡಿತ್. ಆರಾಮ್‌ಲ್ ಉಳ್ಳಿಯಾ? ಕರಣ್ ಎಣ್ಣನಕೆ ನಾನ್ ನಿನ್ನ ಇಂಇಗೂ ಗೇನ ಮಾಡಿಯಂಡಿಪ್ಪಾತ್ ಅರ್ಥ ಇಲ್ಲೆ. ನೀಕ್ ನಾಡ ಮೇಲೆ ಒನ್ನಾಂದೂ ಪ್ರೀತಿ ಎಣ್ಣವದ್ ಬಂದ್‌ಲೆ. ನಾನ್ ಕಾಕಿತೂ ನೋಟುವಕ್ ಬಂದಲೆ. ಇಕ್ಕ ಈ ನಂಬರ್‌ನೆ ಛೇಂಜ್ ಮಾಡಿಯಾ. ನೀಕ್ ನಾಡ ಮೇಲೆ ಒರೂ ತರತರ ಭಾವನೆ ಇಲ್ಲತಿಪ್ಪಕ ನಾನ್ ಎಚ್ಚಕ್ ಮಾಡಿಚೇಂಗಿಯೂ ಅಚ್ಚಿಕೆ.

ಬೈಟ್ ಎಲ್ಲಾರೂ ಕೂಡಿ ಉಂಬಕಳತತ್.

ಎಂತ ಮಮ್ಮಿ ಕರಿಕ್ ಚೆನ್ನ ಉಪ್ಪು ಜಾಸ್ತಿ ಆಯಿತ್. ಅಕ್ಕುವಾ. ನಂಗಕ್ ದಾರೂಕೂ ಉಪ್ಪು ಜಾಸ್ತಿ ಆನನಕೆ ಕಂಡೆಡಿಲ್ಲೆ.

ನೀಕ್ ಎಲ್ಲಾ ಸೆರಿಯಾಯಿತ್ ಇಕ್ಕಂಡೇಂಗಿ ಬೆರಿಯ ಒರ್ ಮಂಗಲ ಕಯಿಚ. ನೀನ್ ಎಣ್ಣಾಕಂತೆ ಪೊಣ್ಣಾ ಮಾಡಿತಿಪ್ಪ.

ಪೋ ಮಮ್ಮಿ, ನಾನ್ ಉಪ್ಪಾರ ವಿಷಯ ಎಣ್ಣಾಚೇಂಗಿ ನೀನ್ ಮಂಗಲತ್‌ರ ವಿಷಯ ಎಣ್ಣೆಯೆಂಡುಳ್ಳಿಯಲ್ಲಾ.

ಅಕ್ಕೂ ಮೋನೆ, ನಂಗ ಈಯಾಂಡ್ ಮೇ ತಿಂಗತ್‌ಲ್ ನೀಡ ಮಂಗಲ ಕಯಿಕಂಡೂಂದ್ ಗೇನ ಮಾಡಿತ್. ನೀಕೂ ವಯಸ್ಸಾಯಂಡ್ ಬಂದಂಡುಂಡ್.

ದರ್ಶನ್‌ರ ಮೂಡ್ ಚೋಂದತ್ ಮುಂಡತೆ ಮಂಡೆ ಬಗ್ಗಚಿಟ್ಟಂಡತ್. ಅಕ್ಕಣೆ ಅಣ್ಣ ದಿನೇಶು ಇದೇ ತಕ್ಕನ ಪರಂದತ್.

ನೋಟ್ ದರ್ಶನ್ ನಾನ್ ಸುಮಾರ್ ಮೂಡಿಯಳ ನೋಟಿತ್ ಬೆಚ್ಚಿಯೆ. ನೀಕ್ ದಾರ್ ಇಷ್ಟ ಆಪೊ ಎಣ್ಣಾ ಮಂಗಲ ಕಯಿಪಿ, ಇಲ್ಲತ ಪೋಚೇಂಗಿ ನೀ ದಾರ್‌ನೇಂಗಿ ನೋಟಿಯಂಡತುಂಡೇಂಗಿಯೂ ಪರೋಲೆ ನಂಗ ಒಂದೂ ಎಣ್ಣಲೆ. ಜೀವಮಾನ ಮಾಡುವೊ ನೀನ್ ನೀಕ್ ಇಷ್ಟ ಆಚೇಂಗಿ ನಂಗಕ್ಕೆಲ್ಲಾಕೂ ಇಷ್ಟ ಆನನಕೆ.

ಇಲ್ಲೆ ನಾನೊಂದು ನೋಟಿತಿಲ್ಲೆ. ನಿಂಗ ನೋಟ್‌ನದೆ ಮದಿ.

ಸೆರಿ ಅಂದಕ ನಾಳೆಯಿಂಜೆ ಕೆಲಸ ಶುರು ಕಾಳಯ್ಯ ಎಣ್ಣಾಚಿ.

ಎಲ್ಲರೂ ತೆಳಚತ್.

ದರ್ಶನ್ ಪೊಲಾಕ ಎದ್ದಿತ್ ಪೊರಡುವಕ್ ಸುರುಮಾಡ್‌ಚಿ ಅಕ್ಕ ಅಪ್ಪ ಚೋಂದವ್ವ ಕೋಂಬರೆಕ್ ಬಾತ್.

ಎನ್ನ ಮೋನೆ, ದೂರ ಪೊರಟಿತುಳ್ಳಿಯಾ?

ಅಕ್ಕು ಮಮ್ಮಿ, ನಾಡ ಫೆಂಡ್ ಚಂಗು ಇಂದ್ ಬಪ್ಪಕೆಣ್ಣಾಚಿ. ಅವಂಗ್ ಚೆನ್ನ ಎಂತೂ ಒರ್ ಕೆಲಸ ಉಂಡ್‌ಲೊ. ಅನ್ನನೆ ನಾನೂ ಬಂದಿಯಲ್ಲಾ. ಸುಮಾರ್ ದಿನ ಆಚಿ ಕಾಂಗತೆ ನೋಟಿತ್ ಬಕ್ಕನಾಂದ್ ಪೊರಟಿಯೆ.

ಓ ಅಕ್ಕುವಾ, ಅಂದಕ ಅನ್ನನೆ ಪೋಯಿತ್ ಪೋನ ಬಿಲ್ಲ ಕೆಟ್ಟಿರುವಿಯಾ?
ಎಂತ ಮಮ್ಮಿ, ನಾನೋರ್ ಕೆಲಸಕ್ ಪೋಚೇಂಗಿ ನೀಡದೋರ್
ಕೆಲಸ.

ನೀ ಪೋಪದೆ ಉಂಡಲ್ಲಾ. ಇಂಞ ಅದಂಗಾಯಿತ್ ನಾನ್
ಪೊರಡಂಡು? ನಾನ್ ಇಚ್ಚಕ್ ದಿನ ಮರಂದೆ ಪೋಯಿತಿಂಜ. ನಾಳೆಯೆ
ಲಾಸ್ತ್ ಡೇಟ್ ಒಮ್ಮ ಕೆಟ್ಟಿರ್ ಕುಂಞಿ.

ಸೆರಿ ತಾ.

ಹೂಂ, ನಾನ್ ಪೋಯಿತ್ ಬಪ್ಪಿ.

ಬೆರಿಯ ಬಾ, ಆ ಕ್ಣಣನ ಕೂಟಿಯಂಡ್ ಅಲ್ಲಿ ಇಲ್ಲಿ ಸುತ್ತತೆ. ಅದ್
ಮಿಂಞಲೇ ಸೆರಿ ಇಲ್ಲೆ. ನಿನ್ನ ಪಾಳ್ ಮಾಡಿರುವಾ.

ನೀಕ್ ಎಲ್ಲಾರು ಇನ್ನನೆ ಇದೆಂತ ಬಾರಿ ಬಲ್ಯ ಸಿಟಿ ನೋಟ್ ಸುತ್ತುವಕ್
ಮನಸ್ಸಲೆ ಗೊಣಗಿಯಂಡ್ ಪೊರಟತ್ ದರ್ಶನ್.

ಎನ್ನ ದರ್ಶನ್ ಚಾಯಿತುಳ್ಳಿಯಾ? ಕೇಟತ್ ಚಂಗು ನಾನ್
ಚಾಯಿತುಳ್ಳೆರೆ, ನೀನ್ ಎನ್ನನೆ?

ಒಕ್ಕಾಮೆಕಾರ ಇನ್ನನೆ ಇಪ್ಪೊ.

ಅದು ನೇರೆ ಬುಡ್. ಬಂದ ವಿಶೇಷ ಕೇಟತ್ ದರ್ಶನ್.

ಇನ್ನನೆ ಒರ್ ಪೋಸ್ತ್ ಮಾಡಂಡಿಂಜತ್ ಅನ್ನನಾಯಿತ್ ಬಂದ.

ಓ ಅಕ್ಕುವಾ ನಾಕೂ ಪೊಸ್ಪಾಫೀಸ್ಕ್ ಪೋಂಡು ಮಮ್ಮಿ ಪೋನ್
ಬಿಲ್ಲ ಕೆಟ್ಟುವ ಕೆಣ್ಣಿತ್.

ಸೆರಿ ಅಂದಕ ಬಾ ತಕ್ಕ ಪರಂದಂಡ್ ಪೋಕ. ಪೊರಟತ್ ದರ್ಶನ್
ಪಿಂಞ ಚಂಗು.

ದಿವ್ಯ ಮಾಮೂಲ್‌ರನಕೆ ತಾಂಡ ಕೆಲಸತ್‌ನ ಮಾಡಿಯಂಡಿಂಜತ್
ಅಕ್ಕಣೆಕ್.

ಎಕ್ಸ್‌ಕ್ಯೂಸ್ ಮಿ ಮೇಡಂ

ದಿವ್ಯ ಮಂಡೆ ನೇತೃಚಿ. ಶಾಕ್ ಪೋಜ್ಜನಕೆ ಆಯಿರತ್. ಕಣ್ಣ್ ಬುಟ್ಟಂಡ್ ದರ್ಶನ್ ನೋಟ್ಚಿ. ಪಳೆಯದೆಲ್ಲಾ ಅನ್ನನೆ ಕಣ್ಣ್ ಮಿಂಗಳ್ ಪಾಂಜತ್ ಎದೆ ಬಡಿಪಕ್ ಜೋರಾಚಿ. ದಿವ್ಯ ಬುಟ್ಟ ಕಣ್ಣ್ ಬುಟ್ಟನಕೆ ನೋಟ್ಚಿ.

ಹಲೋ ಮೇಡಂ ಪೋನ್ ಬಿಲ್ಲ ಕೆಟ್ಟಂಡು.

ಹ್ಲಂ ದಿವ್ಯ ಕೇಟಂಡತ್. ದಿವ್ಯಂಗ್ ಎಂತ ಮಾಡಂಡುಂದೇ ಗೊತ್ತಾಯಿಲೆ. ಎಂತೆಲ್ಲೊ ಮಾಡಿತ್ ದುಡ್ಡ್ ಕೇಟಂಡ್ ಪಾದಿ ಕೇತಿತ್ ಕೊಡ್ತತ್ ದರ್ಶನ್ ರಶೀದಿ ಕೇಟಂಡ್ ಪೋಚಿ.

ದಿವ್ಯ ಆ ಪೋನ್ ಬಿಲ್ಲನ ಎಡ್ತಂಡ್ ಅಡ್ರೆಸ ನೋಟ್ಚಿ. ಇದ್ ಇಲ್ಲಿಯತರದೆ. ಇವಂಡ ಊರ್ ಇದಾ?

ಸದ್ಯ ಅವಂಗ್ ನನ್ನ ಗೊತ್ತಾಯಿತ್ಲೆ. ನಾನ್ ಎಲ್ಲಿಯೇಂಗಿ ತಪ್ಪಿತ್ ಅವನ ನೋಟುವಕ್ ಪೋಯಿತಿಂಜಿತುಂಡೇಂಗಿ ಎಂತ ಗತಿ? ನಾಡ ಮಾನ ಮರ್ಯಾದಿ ಎಲ್ಲಾ ಪೋಯಿರುವ ಇಂಜತ್.

ಓ ದೇವಳೆ ನೀನ್ ನಾಕ್ ನಲ್ಲದ್ ಮಾಡಿಯಾ. ಗೇನ ಮಾಡಿಯಂಡ್ ದಿವ್ಯ ಬರೀ ಕಾಲೆ ದರ್ಶನ್ ನೋಟ್ಚಿ.

ದರ್ಶನ್ ತಾಂಡ ಫ್ರೆಂಡ್ ಕೂಡೆ ತಕ್ಕ ಪರಂದಂಡ್ ಪೋಯಂಡಿಂಜತ್.

ದರ್ಶನ್ ಮನೆ ಅಮ್ಮತ್ತಿ ರಸ್ತೆರ ಬರಿಲೇ ಇಂಜತ್. ಬಸ್ ಇಳಿಂಜಿತ್ ಎಲ್ಲಾರು ಆ ಬರಿಕಾಲೇ ನಡಂದಂಡ್ ಪೋಪಯಿಂಜತ್. ಅನ್ನನೆ ದಿವ್ಯನೂ ಬಸ್ ಇಳಿಂಜಿತ್ ಮಾಮೂಲ್ ರನಕೆ ನಡಂದಂಡ್ ಬಾತ್.

ಕೋಂಬರೆರೊಳ್ ಎಂತೊ ಮಾಡಿಯಂಡಿಂಜ ದರ್ಶನ ಎನ್ನಂಗೊ ಕಡಿಕೆರ ಬರಿ ನೋಟ್ಚಿ. ದಿವ್ಯ ಬಂದಂಡುಳ್ಳಾನ ಕಂಡತ್. ನೋಟಿತ್ ಪುನಃ ನೋಟಿಚಿ. ಇನ್ನನೆ ದಂಡ್ ಮೂಂದ್ ದಿನ ನಡಂದತ್. ದರ್ಶನ್ ಅವಡ ಚಾಯಿ ಅದತ್ಲೂ ಕಣ್ಣ್ ತುಂಬಾ ಮುಷಿ ಆಚಿ.

ಒರ್ ದಿನ ದರ್ಶನ್ ದಿವ್ಯ ಬಪ್ಪ ಟೈಂಕ್ ಆ ರಸ್ತೆ ಕಾಲೆ ನಡಂದಂಡ್ ಬಾತ್. ದೂರತಿಂಜ ದರ್ಶನ್ ಬಂದಂಡುಳ್ಳನ ಕಂಡ ದಿವ್ಯಂಗ್ ಪೋಡಿ ಪೋಡಿ ಆಚಿ.

ದರ್ಶನ್ ಅವಳ ನೋಟಿತ್ ಕರ್ಂದೊಳಿ ತೆಳಿಚತ್ ದಿವ್ಯ ತೆಳಿಚತ್.

ಅಕ್ಕಣೆಕ್ ದರ್ಶನ್.

ನಾನ್ ನಿಂಗಳ ಎಲ್ಲಿಯೊ ಕಂಡಿತುಳ್ಳ ಕೇಟತ್ ದರ್ಶನ್ ದಿವ್ಯಂಗ್ ಬೊರಕಲ್ ಸುರು ಆಚಿ.

ನನ್ನವಾ? ಎಲ್ಲಿ? ಆಶ್ಚರ್ಯತ್ ಕೇಟತ್ ದಿವ್ಯ.

ಹ್ಲಂ ನಿಂಗಳೆ. ಅಂದ್ ಪೋಸ್ಪಾಫೀಸ್ಲ್ ಅಕ್ಕುವಾ? ದಿವ್ಯಂಗ್ ಸಮಾಧಾನ ಆಚಿ. ನಾನ್ ನಿಂಗ ಕೇಪಕ ಮಿಂಞ ಎಲ್ಲಿಯೊ ಕಂಡಿಯೇಂದ್ ಗೇನ ಮಾಡ್‌ನ.

ನಾನ್ ನಿಂಗಳ ಎಲ್ಲಿ ಕಾಂಬಕ್ ಸಾಧ್ಯ? ನಾನ್ ಉಳ್ಳ ಪಂಜಾಬ್‌ಲ್.

ನಿಂಗ ಆರ್ಮಿಕಾರಳಾ? ಒಂದೂ ಗೊತ್ತಿಲ್ಲತೆ ಮಾದರಿ ಕೇಟತ್ ದಿವ್ಯ.

ಹ್ಲಂ ಅಕ್ಕು. ಇಕ್ಕ ರಜತ್ ಬಂದಿಯೇ?

ನಿಂಗ ಇಲ್ಲಿಯತರಯಿಂಗಳೆಯಾ?

ಅಕ್ಕು, ನೋಟಿ ಆ ಚೋಂದ ಕಲರ್‌ರ ಮನೆ ನಂಗಡದ್. ಬಾರಿ ಮನೆಕ್.

ಪರೋಲೆ, ಇಂಞ ಎಕ್ಕಾಚೇಂಗಿ ನೋಟನ.

ನಂಗ ಮನೆಲ್ ಪಾಂಬು ಚಾಕಿತಿಲ್ಲೆ. ಎನ್ನಂಗ್ ಅನ್ನನೆ ಪೋಡಿಚಿಡುವಿರಾ?

ಅನ್ನನೆ ಅಲ್ಲಾ. ನಾನ್ ಇಲ್ಲಿಕ್ ಬಂದಿತ್ ಒರ್ ಆರ್‌ತಿಂಗ ಆಯಿತ್. ನಾಕ್ ದಾರನೋ ಅನ್ನನೆ ಪರಿಚಯ ಇಲ್ಲೆ.

ಒಹೋ ಅಕ್ಕು ನಿಂಗಡ ಊರ್?

ಸಿದ್ದಾಪುರ. ನಾಕ್ ಲೇಟಾಚಿ. ಇಂಞೋರ್ ದಿನ ಕಟ್ಟುವಿ. ಪೊರಟತ್ ದಿವ್ಯ.

ಎಂತೊ ಎಣ್ಣುವಕ್ ಬಂದ ದರ್ಶನ್ ಮುಂಡತೆ ಕೂಡ್‌ಚಿ. ಅವ ಪೋನಾನೆ ನೋಟ್‌ನ ದರ್ಶನ್ ಅವಡ ತಕ್ಕನ ಕೇಪಕ ಎಲ್ಲಿಯೋ ಕೇಟ ಮಾದರಿ ಆಚಿ.

ಇವಡಲ್ಲಿ ಎಂತೊ ಒರ್ ಆಕರ್ಷಣೆ ಉಂಡ್. ಮನಸ್ಸಲೆ ಗೇನ

ಮಾಡಿಯಂಡತ್ ದರ್ಶನ್.

ಪಿತ್ಯಾಂದ್ ಮಾಡಿರ ಕೊಡಿಲ್ ನಿಂದಂಡ್ ದಿವ್ಯ ಬಪ್ಪನೆ ನೋಟ್‌ಚಿ ದರ್ಶನ್.

ದಿವ್ಯ ತಾಂಡ ಪಾಡ್‌ಕ್ ತಾನ್ ಬಂದಂಡುಂಡ್. ದರ್ಶನ್ ಅವಳೇ ನೋಟ್‌ಚಿ. ದಿವ್ಯ ಎನ್ನಂಗೊ ಮಂಡೆ ನೇತ್‌ಚಿ. ಅಕ್ಕಣೆ ದರ್ಶನ್ ಕೈಲ್ ಹಾಯ್‌ಂದ್ ವಿಶ್ ಮಾಡ್‌ಚಿ.

ದಿವ್ಯ ತೆಳಿಚಿತ್ ಮುಂಡತೆ ಮಿಂಞಾಕ್ ಪೋಚಿ.

ದರ್ಶನಕ್ ಬೇಜಾರ್ ಆಚಿ. ಛೇ ನಿನ್ನಾಂದ್ ಅಚ್ಚಕ್ ತಕ್ಕ ಪರಂದಿತ್ ಅವಡ ಪೆದಕೇಟ್‌ಲೆ. ನಾಳೆ ಬರಡ್ ಕೇಪೀಂದ್ ಗೇನ ಮಾಡ್‌ಚಿ.

ಹಾಯ್!

ತಿರ್‌ಗಿಚಿ ದಿವ್ಯ

ಓಹೋ ನಿಂಗಳಾ?

ಇಂಞ ದಾರ್‌ಂದ್ ಗೇನ ಮಾಡಿರಾ?

ದಾರ್‌ನೊ ಗೇನ ಮಾಡಿತಿಲ್ಲೆ. ಅನ್ನನೆ ಕೇಟಿಯಾ. ನಾನ್ ನಿಂಗಳ ತಕ್ಕ ಪರಿಚಿಟ್ಟಿತ್ ನಾಡ ಪೆದವು ಎಣ್ಣಿತಿಲ್ಲೆ. ನಿಂಗಡ ಪೆದವೂ ಕೇಟ್‌ಲೆ.

ನಾಡ ಪೆದ ದರ್ಶನ ದೇವಯ್ಯ ನಿಂಗ?

ನಾನ್, ನಾನ್ ದಿ ಎಣ್ಣುವಕ ಪೊರಟ ದಿವ್ಯ ದೇಚಮ್ಮಂದ್ ಎಣ್ಣೆಚಿ.

ದೇಚಮ್ಮ. ಪೆದ ಚಾಯುಂಡ್ ಇಂಞಗೋರ್ ಪೆದ ಇಲ್ಲೆಯಾ?

ಇಲ್ಲೆ ನಾಕ್ ಒರೇ ಪೆದ.

ನಿಂಗ ಓದಿಯೆ ಎಲ್ಲಾ?

ಬೆಂಗಳೂರ್‌ಲ್.

ಆ ಪೆದ ಕೇಪಕೇ ಪೋಡಿ ಆಪ.

ಎನ್ನಂಗ್? ಆ ಬೆಂಗಳೂರ್‌ಲ್ ಪೋಡಿ ಆಪಂತದ್ ಎಂತದ್ ಉಂಡ್.

ದರ್ಶನ್‌ಕ್ ದಿವ್ಯನ ಗೇನ ಬಾತ್. ಆಚೇಂಗಿಯೂ ಮುಂಡತೆ. ಪೊಟ್ತ್ ಪರಂದತ್. ಅಲ್ಲಿ ಎಕ್ಕಾಲೂ ಕೊಲೆ ದರೋಡೆ ಬಾಂಬ್ ಸ್ಫೋಟ ಆಯಂಡಿಪ್ಪ ಅದಂಗ್ ಎಣ್ಣೆನ.

ದಿವ್ಯಂಗ್ ದರ್ಶನ್‌ರ ಮನಸ್ಸು ಅರ್ಥ ಆಚೇಂಗಿಯೂ ಬೋಂಡುದೆ ಕೇಟತ್. ನಿಂಗ ಆರ್ಮಿಕಾರ ಅಲ್ಲಾ. ಇಂತದೆಲ್ಲಾ ಮಾಮೂಲ್.

ಅಕ್ಕು ಮಾಮೂಲ್ ಆಚೇಂಗಿ ಎಂತೊ ಎಣ್ಣುವಕ್ ಬಂದ ದರ್ಶನ್ ತಕ್ಕ್‌ನ ನಿಪ್ಪಚಿಟ್ಟತ್.

ಒ. ಕೆ. ದರ್ಶನ್ ಕಾಂಗನಾ. ಬಾಯ್ ಎಣ್ಣೆಚಿ ದಿವ್ಯ.

ಬಾಯ್ ಬಾಯ್ ಎಣ್ಣಿಯಂಡ್ ಪಳೆಯ ಗೇನ ಮಾಡ್‌ಚಿ ದರ್ಶನ್.

ದೇಚಮ್ಮ ನಲ್ಲ ಮೂಡಿ. ಇವಡ ತಕ್ಕ್ ಬಾಕ್ ಎಲ್ಲಾ ಚಾಯುಂಡ್. ಆಚೇಂಗಿ ಅಪ್ಪವ್ವಂಡ ಬಗ್ಗೆ ಮಾತ್ರ ಗೊತ್ತಾಲೆ. ಇವಳ ಪ್ರಪೋಸ್ ಮಾಡಡಾ, ಬೋಂಡಾ. ಇವಕ್ ಎಲ್ಲಿಯೇಂಗಿ ಅಕ್ಕ ಉಂಡೇಂಗಿ. ಅವಡ ಮಂಗಲಾಕಣೆ ಪಾರ ಕಾಕಂಡು. ದಿನ ಒಂದೊಂದ್ ಕೇಟಕ ಮದಿ ಗೊತ್ತಾಪ. ಅಲ್ಲಿಂಜ ಮಿಂಞಕ್ ನೋಟನ ಇನ್ನನೆ ಸುಮಾರ್ ದಿನ ಕಯಿಂಜತ್. ಒರ್ ದಿನ ಚಂಗು ಮನೆಕ್ ಬಾತ್.

ಎಂತ ಮೋನೆ ಚಾಯಿತುಳ್ಳಿಯಾ? ಪಪ್ಪ ಮಮ್ಮಿ ಎಲ್ಲಾ ಚಾಯಿಲುಂಡಾ? ಕೇಟತ್ ಚೋಂದವ್ವ.

ಎಲ್ಲಾ ಚಾಯಿತುಂಡ್ ಆಂಟಿ. ನಿಂಗಕೊರ್ ನಲ್ಲ ಸುದ್ದಿ ಅರಿಚಿಡಂಡೂಂದ್ ಬಂದ. ಎಲ್ಲಿ ದರ್ಶನ್ ಕಾಂಬಲೆ.

ಅಂವೊ ಕುಳಿಚಡುಂಡ್ ಇಕ್ಕ ಬಪ್ಪ. ಓ ಬಾತಾಲ್ಲಾ?

ಎಂತ ಚಂಗು. ಅಪರೂಫಕ್ ಮನೆಕ್ ಬಂದಿಯೆ?

ನೀನಂತು ಕಾಕುವದಿಲ್ಲೆ ಅದಂಗ್ ನಾನೇ ಬಂದ.

ಇಲ್ಲೆ ಎಂತೋರ್ ವಿಷಯ ಉಂಡ್ ಎಣ್ಣಿಯಲ್ಲಾ ಕೇಟತ್ ಚೋಂದವ್ವ.

ಅಕ್ಕು ಇಕ್ಕ ಅಂವೊ ಎಂತೊ ಎಣ್ಣುವಕ್ ಪೊರಟತ್ ಎಣ್ಣೆಚಿ ದರ್ಶನ.

ಎಂತ ಬೆರಿಯ ಎಣ್ಣೆ.

ಬಪ್ಪವಾರ ನಾಡ ಲಗ್ನಪತ್ರಿಕೆ. ನಿಂಗ ಎಲ್ಲಾ ಬರಂಡು. ಅದಂಗ್ ಕಾಕುವಕ್ ಬಂದ.

ಸದ್ದೆ ಇಲ್ಲತನೆಕೆ ಕಾರ್ಬಾರ್ ಮಾಡಿಟಿಯಾ? ಇಕ್ಕ ಎಂಗೇಚಮೆಂಟ. ಡಿಸೆಂಬರ್‌ಲ್ ಮಂಗಲ. ಲವ ಮ್ಯಾರೇಜಾ? ಕೇಟತ್ ದರ್ಶನ್.

ಒರ್ ತರಾ ಅನ್ನನೆ ಇಗಾಣ್ ಚಿಟ್ಟತ್ ದರ್ಶನ್.

ಎಂತ ಆಂಟಿ? ನಿಂಗಡ ಮೋವಂಡ ಒಂದೂ ಇಲ್ಲೆಯಾ?

ಆಚೇಂಗಿ ಉಂಡ್. ಎಲ್ಲಿಯೂ ಆಯಿತಿಲ್ಲೆ. ಈ ಕುರಿ ಮೇತಿಂಗತ್ ಕಯಿಚಿರಡೂಂದ್ ಉಂಡ್.

ಬೆರಿಯ ಬೆರಿಯ ನೋಟಿ. ನಾಡ ಮಂಗಲತೂ ಸುಮಾರ್ ಮೂಡಿಯ ಬಪ್ಪ. ನಾಡ ಮೂಡಿರ ಫೆಂಡ್‌ವಳೆ ಅಚ್ಚಕ್ ಉಂಡ್. ನೀನ್ ಬೋಂಡೇಂಗಿ ಸೆಲೆಕ್ಟ್ ಮಾಡ್. ನಾನ್ ತಂದಕಾರನಾಪಿ.

ಅದ್ ಒಂದೂ ಬೋಂಡ. ನೀಡ ಮಂಗಲಾಡ್ ನೋಟಿನಾ?

ಸೆರಿ ಆಂಟಿ ಎಲ್ಲಾರು ಬಾರಿ. ನಾನ್ ಪೋಯಿತ್‌ಬಪ್ಪಿ.

ಸೆರಿ ಪೋಯಿತ್ ಬಾ.

ಚಂಗುರ ಲಗ್ನಪತ್ರಿಕೆ ಆಯಿತ್ ಮಂಗಲವೂ ಪಕ್ಕ ಬಾತ್.

ಚಂಗುರ ಮಂಗಲಕ್ ದರ್ಶನ್ ಒರ್ ದಿನ ಮಿಂಞಲೆ ಪೋಚಿ. ಓಡಿ ಕಳಚತ್. ಪಿತ್ಯಾಂದ್ ಮುಹೂರ್ತ. ದರ್ಶನ್ ತಾಂಡ ಬೋರೆ ಫೆಂಡ್‌ರ ಕೂಡೆ ತಕ್ಕ ಪರಂದಂಡ್ ಅಳ್ತಂಡತ್. ಅಕ್ಕಣೆಕ್ ಒರ್‌ಪತ್ತ್ ಪನ್ನೆರಂಡ್ ಮೂಡಿಯ ಮಂಗಲ ಮನೆಕೆ ಬಾತ್. ಅಕ್ಕಣೆ ದರ್ಶನ್‌ರ ಒರ್‌ಫೆಂಡ್ ಪೂವಣ್ಣ ಎಣ್ಣೆಚಿ. ನೋಟಿ ಕಣ್ಣಿಂಬಾ ನೋಟಿಯೋಳಿ. ಏದ್ ಮೂಡಿಯ ದಾರಕ್ ಚಾಯಿಕಾಂಬ. ಇಂದೇ ತಂದ್ ಮಾಡು. ಎಲ್ಲಾರೂ ತಮಾಷಿಕ್ ತೆಳಚತ್.

ದರ್ಶನ್‌ರ ಕಣ್ಣೆ ನೇರೆ ಒರ್ ಮೂಡಿರಪಕ್ಕ ಪೋಚಿ. ದರ್ಶನ್ ಎದ್ದ್ ಪೋಯಿತ್ ತಕ್ಕ ಪರಂದತ್.

ಹಾಯ್ ದೇಚಮ್ಮಾ ಎಂತ ಇಲ್ಲಿ ಕಾಂಬ!

ನಂಗೆಲ್ಲಾ ಮೂಡಿರ ಫ್ರೆಂಡ್ಸ್.

ಓಹೋ. ಬಾರಿ ಬಾರಿ ನಿಂಗ್ ಕೊಡವ ಪೊಡಿಯ ತುಂಬಾ ಚಾಯಿಕಾಂಬ.

ಥ್ಯಾಂಕ್ಯೂ ಎಣ್ಣಿಯಂಡ್ ಪೊರಟತ್ ದಿವ್ಯ.

ಅಕ್ಕಣೆಕ್ ದಿವ್ಯಂಡ ಫ್ರೆಂಡ್ಸ್ ಅವಳ ಗಲಾಟೆ ಮಾಡುವಕ್ ಸುರು ಮಾಡ್ ಚಿ.

ದಾರ್‌ರೇ ಅದ್ ಕೇಟತ ಪಲ್ಲವಿ.

ಅಂವೋ ಅಮ್ಮತ್ತಿಕಾರ, ನಾಡ ಪೋಸ್ಪಾಫೀಸ್‌ಕ್ ಪಕ್ಕೆ ಅಯಿಂಗಡ ಮನೆ ಉಳ್ಳ. ಅನ್ನನೆ ಗೊತ್ತ್ ಅಚ್ಚಿಕೆ.

ಬೋರೀ ಅಚ್ಚಿಕೆಯಾ? ಇಲ್ಲೆ ಎಂತೇಂಗಿ.....

ಒಂದೂ ಇಲ್ಲೆ ನೀನ್ ಬೊಂಡೇಂಗಿ ಅವನೆ ಕೇಳ್ ಸೆರಿ ಬುಡಮ್ಮಾ. ಬಾರಿ ಪಣ ಕೆಟ್ಟುವಕ್ ಪೋಕ. ಎಲ್ಲಾರು ಪೋಚಿ.

ಅಲ್ಲರೆ, ದರ್ಶನ್ ನೋಟ್‌ನನಕೆ ಒರ್ ಮೂಡಿನ ಬೂಕಿಯಲ್ಲಾ ಕೇಟತ್ ಬೋಪಣ್ಣ.

ಅನ್ನನೆ ಅಲ್ಲ ನಾಕ್ ಅವಳ ಮಿಂಗಳೆ ಗೊತ್ತುಂಡ್ ಅವ ನಂಗಡ ಪೋಸ್ಪಾಫೀಸಲ್ ಚಾಕ್ರಿಲ್‌ಉಳ್ಳ.

ಇಚ್ಚಕ್ ಪಕ್ಕತ್ ಬೆಚ್ಚಂಡ್ ಮುಂಡತೆ ಉಳ್ಳಿಯಲ್ಲಾ ತಂದ್ ಮಾಡುವ ಕೆನ್ನೊ...?

ಅದ ಅಚ್ಚಕ್ ಸುಲಭ ಅಲ್ಲ. ಅವಕೆಲ್ಲಿಯೇಂಗಿ ಅಕ್ಕ ಉಂಡೇಂಗಿ ನಾನ್ ಪಾರ ಕಾತಂಡ್ ಇಕ್ಕಂಡು. ಅವಡ ವಿಷಯ ತುಂಬಾ ಗೊತ್ತಲೆ. ಮನೆಪೆದ ಆಡ್ ಅಪ್ಪವ್ವಂಡ ಬಗ್ಗೆ ಆಡ್ ಗೊತ್ತಲೆ. ಆಚೇಂಗಿ ಮೂಡಿ ನಲ್ಲ ಮೂಡಿ. ಎಲ್ಲಾ ಸೆರಿ ಕಂಡತೇಂಗಿ ಕೇಪಿ ಎಣ್ಣಾಚಿ ದರ್ಶನ್.

ಅಕ್ಕಲೆ ನೀನ ಸ್ಕೆಚ್ ಇಟ್ಟಿಯಾ?

ಮುಂಡತಿರ್ ಆ ಮೂಡಿಯಕ್ ಎಲ್ಲಿಯೇಂಗಿ ಕೇಟತೇಂಗಿ ನಿನ್ನ

ಎಲ್ಲಾ ಕೂಡಿಸಿ ಪಕ್ಕೋಡ ಮಾಡಿರು. ತಕ್ಕ ಪರವಕ್ ಚೆನ್ನ ಮಿಂಚು ಬಯ್ಯ ನೋಟ್.

ಸೆರಿ ಎಂತೇಂಗಿ ಮಾಡ್ ಎಣ್ಣೆಚಿ ಬೋಪಣ್ಣ.

ಮನೆಕ್ ಬಂದ ದರ್ಶನಕ್ ದೇಚಮ್ಮನ ಗೇನ ಆಚಿ.

ದೇಚಮ್ಮಾ ನೀನ್ ಇಂದ್ ತುಂಬಾ ಚಾಯಿಕಂಡಂಡಿಂಜಿಯಾ ನೀಕ್ ಕೊಡವ ಪೊಡಿಯ ಚಾಯಿಕಾಂಬ. ಅದಂಗೊತ್ತ ಮೇಕಪ್ ನೇರಾಯಿತೂ ನೀನ್ ಚಾಯಿಕರ್ತಿಯೆ. ಮನಸ್ಸಲೆ ಗೇನ ಮಾಡ್ಚಿ ದರ್ಶನ್.

ಪಿತ್ಯಾಂದ್ ದಿವ್ಯನ ತಕ್ಕ ಪರಿಚಿಡುವಕಾಯಿತ್ ಪೊರಮೆ ಬಾತ್ ದರ್ಶನ್.

ಹಾಯ್, ದೇಚಮ್ಮಾ, ಮಂಗಲೆಲ್ಲಾ ತೇಂದತಾ. ಅದ್ನ ನಾನಾ ನಿನ್ನ ಕೇಕಂಡು ನೀಕೆ ಅಲ್ಲಾ ಓಡಿಕಳಿ ಇಂಜಿಯೆ.

ನೇರೆ ನೀರೆಡ್ತಿತ್ ಚೆನ್ನ ನೇರ ಇಪ್ಪಂಜಿ. ಬಯ್ಯಂಜಿ ಮನೆಕ್ ಬಂದ್ಚಿ.

ದೇಚಮ್ಮಾ, ನಿನ್ನ ಒರ್ ತಕ್ಕ ಕೇಕಂಡು ನೀಡ ಪಪ್ಪ ಮಮ್ಮಿಯಲ್ಲಾ ಎಂತ ಮಾಡುವ?

ಮನೇಲೆ ಉಳ್ಳ.

ನಿಂಗ ಎಚ್ಚಕ್ ಮಕ್ಕ?

ದಂಡ್ ಮೂಡಿಯಾ.

ನೀಡ ಅಕ್ಕ ಎಂತ ಮಾಡೋ?

ನಾಕ್ ಅಕ್ಕ ಇಲ್ಲೆ. ತಂಗೆ.

ನಾನೇ ಪೆರಿಯವ. ಅವ ಡಿಗ್ರಿ ಮಾಡುವ.

ಮಂಡೆ ಆಟ್ಚಿ ದರ್ಶನ್.

ನೀನೆಂತ ಇದನ್ನೆಲ್ಲಾ ಕೇಟಂಡ್ ಸೆನ್ನೆಸ್ ಮಾಡುವಿಯಾ.

ಇಲ್ಲೆ ನೀಕೋರ್ ತಂದ್ ಮಾಡಂಡೂಂದ್.

ನಿನ್ನಾಂದ್ ಒರ್ ಕಣ್ಣ ನಿನ್ನ ಕೇಟತ್ ಮಂಗಲ ಕಯಿಪಕ್. ಮಿಷಿ ಉಂಡೇಂಗಿ ಎಣ್ಣೆ. ಎಣ್ಣುವಿ.

ಅಲ್ಲಾ ನೀಕ್ ಎಂತ ಮಂಡೆ ಸೆರಿ ಉಂಡಾ? ನಾಕ್ ಆ ಕಣ್ಣನೆ ಗೊತ್ತಲೆ. ಇಂಇನ್ನನೆ ಎಣ್ಣುವೋ.

ಅದೂ ಸೆರಿಯೆ. ನೀನ್ ಇನ್ನನೆ ಕೇಪಿಯಾಂದೇ ನಾನ್ ಆ ಕಣ್ಣಂಡ ಪೋಟೋ ಕೇಟಂಡ್ ಬಂದಿಯೆ. ನೀಕ್ ಇಷ್ಟ ಉಂಡೇಂಗಿ ನಾನ್ ಮನೆಲ್ ತಕ್ಕ್ ಪರೆವಿ.

ನೀಕ್ ಆ ಪೋಟೋ ನಾಳೆ ನೀಡ ಪೋಸ್ಪಾಫೀಸಕ್ ಎತ್ತುವ. ಕಣ್ಣ ನಲ್ಲ ಚಾಯಿಕಾರ, ಗುಣಕಾರ ಎಲ್ಲಾಂಗಿಂಜ ನಿನ್ನ ಇಷ್ಟಪಟ್ಟಿತ್ ಕೇಟಿತ್ ಗೇನ ಮಾಡಿ ನೋಟ್.

ದಿವ್ಯಂಗ್ ಒರ್ ತರಾ ಆಚಿ. ಅಲ್ಲಾ ನಾನ್ ಇಂವನ ಗೇನ ಮಾಡುವಕ ಇಂವೊ ಬೋರೆ ದಾರ್ನೋ ಎಣ್ಣುವ. ಅಲ್ಲ 'ಇವಂಗ್ ನನ್ನ ಖುಷಿ ಇಲ್ಲೆಯಾ. ನಾಕ್ ತಂದ್ ಮಾಡುವಲ್ಲಾ, ಛೇ ನಾನ್ ಎನ್ನಂಗ್ ಇನ್ನನೆ ಗೇನ ಮಾಡಂಡಿಯೆ? ಖುಷಿಲ್ ತಕ್ಕ್ ಪರಂದತ ಛೇ, ಇಲ್ಲೆ ಎಲ್ಲಾನೋ ಒರೇ ಅರ್ಥತ್ ಗೇನ ಮಾಡುವ ಕಾಗ. ಎಲ್ಲಾಂಗು ನಾಳೆ ಪೋಟೋ ಅಯಪಾಂದ್ ಎಣ್ಣಿತಲ್ಲಾ. ನಾಳೆ ನೋಟನ ಆ ಪುಣ್ಯಾತ್ಮ ಎನ್ನನೆ ಉಂಡೇಂದ್.

ದರ್ಶನ್ ಕ್ ತಾಂಡ ಐಡಿಯಾ ಸಕ್ಸ್ ಆನನಕೆ ಆಚಿ. ತಾಂಡ ಪೋಟೋತನ ಒರ್ ಕವರ್‌ಲ್‌ಟ್, ಕವರ್ ಅಂಟಿಚಿಟ್ಟಿತ್ ದಿವ್ಯಂಡ ಅಡ್ರೆಸ್ ಎಳ್ಳಿತ್. ಪೋಸ್ಪಾಫೀಸಕ್ ಒರ್ ಮನುಷ್ಯಂಡ ಕೈಕ್ ಆ ಕವರ್‌ನ ದಿವ್ಯ ಬಪ್ಪಕ ಕೊಡೇಂದ್ ಎಣ್ಣಿತ್ ಪೋಚಿ.

ದಿವ್ಯಂಗ್ ಬಂದನಕೆ ಆ ಮನುಷ್ಯ ಕವರ್‌ನ ಕೊಡತತ್/. ದಿವ್ಯ ಓದಿತ್ ನೋಟಚಿ. ಒಮ್ಮಕೇ ಮಿಂಚ್ ನೋಟ್‌ನಕೆ ಆಯಿರ್‌ತ್ ಅದ್ ಬೋರೆ ದಾರೂ ಅಲ್ಲಾ ದರ್ಶನ್. ಪೋಟೋತ್‌ರ ಬೆಂಬರಿಲ್. ಐ ಲವ್ ಯೂ ದೇಚಮ್ಮ. ನಿನ್ನಾಂದ್ ನೀನ್ ತುಂಬಾ ಚಾಯಿ ಕಾಂಬ ಇಂಜಿಯಾ. ನಾಳೆ ನಿನ್ನ ಕಾಂಬಿ. ನೀಡ ತೀರ್ಮಾನ ಎಣ್ಣೇಂದ್ ಎಳ್ಳಿದಿತಿಂಜತ್.

ದಿವ್ಯಂಗ್ ಒರ್ ಬರಿ ಕಾಲೆ ಖುಷಿ ಆಚೇಂಗಿ ಇಂಇಗೋರ್ ಬರಿ ಕಾಲೆ ಪೋಡಿಯೂ ಆಪ ಕೂಡ್‌ಚಿ. ನಾಳೆ ದರ್ಶನ್‌ನ ಎನ್ನನೆ ನೋಟಡ್. ಅಂವೋ ನನ್ನ ಕೇಟತೇಂಗಿ ಎಂತ ಎಣ್ಣಡ್. ದಿವ್ಯಂಗ್ ಮನಸ್ಸೆ ಸೆರಿ

ಇಲ್ಲತಾಚಿ. ಆ ದಿನ ಇದೆ ಮನಸ್ಸು ಎಂತದೊ ಗೇನ ಮಾಡುವ ಕೂಡ್‌ಚಿ.

ಎಚ್ಚಕ್ ಬೋಂಡ ಬೋಂಡಾಂದ್ ದೂರ ಪೋನಕಲೂ ಇಂವೊ ಪಕ್ಕ ಪಕ್ಕೇ ಬಂದಂಡುಂಡ್. ನಾಡ ಹಣೆ ಬರಹತ್ ಇವನೇಂದ್ ಎಳ್ಳಿತಾ? ಅದಂಗೇ ಇನ್ನನೆ ಜೊತೆ ಕೂಡ್‌ವದಾ? ಎಂತ ಎಣ್ಣಡ್. ಇವನ ಒತ್ತವಡ. ಮಂಗಲಾಯಿ ಪೋಯಿರತೇಂಗಿ. ಇಂಇ ಸದ್ ಇಪ್ಪಲೆ. ನಾಳೆ ದರ್ಶನ್‌ಕ್ ಒ. ಕೆ. ಎಣ್ಣಡಾ, ನೋಟನ ಎಣ್ಣಿತ ಬುದ್ಧಂಡತ್ ದಿವ್ಯ.

ಹಾಯ್ ದೇಚಮ್ಮಾ, ಪೋಟೋ ನೋಟಿಯಾ ಕಣ್ಣಿನ ಖುಷಿಯಾ?

ದೇಚಮ್ಮಾ ಒಂದೂ ಎಣ್ಣಿತನಕೆ ಬೆರಿಯ ಬೆರಿಯ ನಡಂದಂಡ್ ಪೋಯಿರತ್. ಅಚ್ಚಕ್ ದೂರ ಪೋನದು ದರ್ಶನ್‌ನ ನೋಟಿತ್ ಒಪ್ಪಿಗೇರ ತೆಳಿ ಕೊಡತತ್.

ದರ್ಶನ್‌ಕ ಒಮ್ಮೆಕೇ ಖುಷಿ ಆಚಿ. ದೇಚಮ್ಮನ ಕಾಕಣೆ ಅವ್ವೋ ದರ್ಶನ್‌ನ ಕಾಕ್‌ಚಿ.

ಒಯಿಪತ್ ಬಪ್ಪನೇರ ಪಾರಕಾತಂಡಿಂಜ ದರ್ಶನ್ ಕಾರ್ ಎಡ್ತಂಡ್ ಬಸ್‌ಸ್ಟೇಂಡ್‌ರಲ್ಲಿಕ್ ಪೋಚಿ.

ದಿವ್ಯ ಬಸ್‌ಕ್ ಪತ್ತುವಕ್ ಬಾತ್.

ದರ್ಶನ್ ದಿವ್ಯಂಗ್ ಕಾರ್ ನಿಪ್ಪಚಿಟ್ಟತ್.

ಆಶ್ಚರ್ಯತ್‌ಲ್ ನೋಟನ ದಿವ್ಯಂಗ್ ದರ್ಶನ್‌ನ ನೋಟಿತ್ ಇಾಣ ಆಚಿ. ಮೂಡ್ ಚೋಂದತ್.

ದೇಚಮ್ಮಾ, ಬಾ ಪತ್ತಾ, ನೀಡ ಕೂಡೆ ತಕ್ಕ ಪರೆಯಂಡು.

ಅಯ್ಯೋ, ಬೋಂಡ ಬಸ್ಸು ಬಪ್ಪಕಾಚಿ. ಮನೆಕ್ ಎತ್ತುವಕ ಲೇಟಾಪ. ಪರೋಲೆ ನಾನೆ ಕಾರ್‌ಲ್ ಬುಡುವಿ ಬಾ.

ಬೋಂಡ.

ನೋಟ್ ಇಂದ್ ಒರ್ ದಿನ ದಯಬೆಚ್ಚಿತ್ ಬಾ.

ಅದ್ ಎಂತ ಎಣ್ಣಂಡು, ಅದ್‌ನ ಬಸ್ಸು ಬಪ್ಪಂಡ ಒಳಿಯ ಎಣ್ಣೆ.

ಎಲ್ಲಾಂಗೂ ನೀನ್ ಕಾರ್ ಪತ್ತ್.

ದಿವ್ಯ ಕಾರ್ ಪತ್ತ್ಚಿ.

ನಾಕ್ ನೀಡ ಸೆರಿಯಾನ ಉತ್ತರ ಕ್ಷೆಟ್ಟಲೆ. ಎಂತ್‌ಎಂದ್ ಇಕ್ಕ ಎಣ್ಣೆ.

ದಿವ್ಯಂಗ್ ಇಣಾಣ ಆಯಿತ್ ಮಂಡೆ ಬಗ್ಗೆಚಿಟ್ಟಿತ್.

ಇಷ್ಟ ಉಂಡಾ?

ದಿವ್ಯ ಹ್ಲಂ ಎಣ್ಣೆಚಿ.

ಥ್ಯಾಂಕ್ಸ್ ದೇಚಮ್ಮಾ. ನಾನ್ ನೀಕ್ ಸುಮಾರ್ ದಿನತಿಂಜ ಎಣ್ಣೆಂಡುಂದ್ ಇಂಜ. ಆಚೇಂಗಿ ಎನ್ನನೆ ಎಣ್ಣೆವೊಂದ್ ಗೊತ್ತಾಯಿಲೆ. ಅದಂಗ್ ಇನ್ನನ್ನೆಲ್ಲಾ ಮಾಡ್‌ನ ನಾಕ್ ನೀಡ ಮೊಬೈಲ್ ನಂಬರ್ ತಾ.

ಇಲ್ಲೆ. ನಾಡ ಪಕ್ಕ ಮೊಬೈಲ್ ಇಲ್ಲೆ.

ಪೊಟ್ ಪರೆಯತೆ. ಇಕ್ಕತ ಕಾಲತ್ ಭಿಕ್ಷೆಕಾರಂಡ ಕೈಲೂ ಮೊಬೈಲ್ ಇಪ್ಪ. ಅನ್ನತಲ್ಲಿ ನೀನ್.

ಅಕ್ಕು ಆಚೇಂಗಿ ನಾಡ ಪಕ್ಕ ಇಲ್ಲೆ. ನಾಕ್ ಆಂಡ ಅವಶ್ಯಕತೆ ಇಲ್ಲೆ.

ಮಿಂಞ ಎಲ್ಲಾರೂ ಮೊಬೈಲ್ ಇಲ್ಲತೆ ಬದಕ್‌ಲಿಯಾ. ಅನ್ನನೆ ದಾರೂ ಚತ್ತ್ ಪೋಪಲೆ.

ನೀಕ್ ಎನ್ನಂಗ್ ಇಚ್ಚಕ್ ಮೊಬೈಲ್‌ರ ಮೇಲೆ ಚೆಡಿ.

ಚೆಡೀಂದ್ ಅಲ್ಲಾ. ನೆಮ್ಮದಿ ಪಾಳಾಪದ್ ಬೋಂಡಾಂದ್ ನೀಡ ಇಷ್ಟ ಎಣ್ಣೆಚಿ ದರ್ಶನ್.

ನಾಳೆ ಚೆನಿಯಾಚೆ. ಬೆರಿಯ ಕೆಲಸ ತೇತ. ನಾಳೇ ನಾನ್ ನೀಕ್ ಕ್ಷೆಟ್ಟುವಿ. ನಂಗ ಎಲ್ಲಿಕೇಂಗಿ ಪೋಕ.

ಅಯ್ಯೋ ನಾಡ ಬಸ್ ಬಾತ್. ಬಾಯ್, ಬಾಯ್ ಒಂದೂ ಎಣ್ಣೆತನಕೆ ಪೊರಟತ್ ದಿವ್ಯ.

ಹಾಯ್ ದೇಚು.

ನಾನ್ ದೇಚು ಅಲ್ಲ ದೇಚಮ್ಮ.

ಆಚೇಂಗಿ ನಾನ್ ಇಂಞ ಮಿಂಞಾಕ್ ನಿನ್ನ ಇನ್ನನೆ ಕಾಕುವ.

ಎಂತೋ ಬಾರಿ ತಕ್ಕ ಪರೆಯಂಡು ಎಣ್ಣಿಯಾ?

ನೀಕ್ ಎಕ್ಕಲೂ ಆತುರ. ಆಚೇಂಗಿ ಇಂದ್‌ನಾನ್ ನಿನ್ನ ಬುಡ್‌ಲೆ.

ಎಂತ ಮಾಡುವಿಯಾ?

ಒಂದೂ ಮಾಡುವಕಯ್ಯಲೆ. ಇಂಞೆನ್ನಂಗ್ ಈ ತಕ್ಕ ಎಲ್ಲಾ. ಚೆನ್ನ ತೆಳಿಲ್ ತಕ್ಕ ಪರಿ ದೇಚು.

ಹ್ಲಿ..ಹ್ಲಿ.. ಮದಿಯಾ.

ಜಾಸ್ತಿ. ನೀಡ ಕೂಡೆ ಎಂತ ತಕ್ಕ ಪರಂದತೇಂಗಿಯೂ ಕಷ್ಟ.

ಎಣ್ಣುವಿ ಕೇಳ್ ನಾನ್ ನೀಡ ಮನೆಕ್ ಎಕ್ಕ ಬರಡ್.

ಅದ್‌ನ ನಾನೇ ಎಣ್ಣುವಿ. ನೀನ್ ಆ ಸಾಹಸಕ್ ಕೈ ಇಡಂಡ.

ನೋಟ್ ದೇಚೂ, ನಾಕ್ ಇಂಞ ಒರ್ ತಿಂಗ ರಜ ಉಳ್ಳ ಪಿಂಞ ವಾಪಾಸ್ಸ್ ಪೋಂಡು. ಆಂಡೊಳಿಯ ತಕ್ಕ ತಂದತೇಂಗಿ ನಲ್ಲದ್‌ಂದ್ ನಾಡ ಗೇನ.

ನೀಡ ಗೇನ ಎಂತೋ ಸರಿ ಉಂಡ್ ಆಚೇಂಗಿ...

ಆಚೇಂಗಿ ಎಂತ ಎಣ್ಣೆ ನಾನುಳ್ಳ. ನಾಡ ಮಾಂವೋ ಬಾರಿ ಜೋರಾ?

ಇಲ್ಲೇ. ಇಕ್ಕ ತಾನೇ ನಂಗ ತಕ್ಕ ಪರೆವದ್ ಶುರು ಆಯೆ. ಚೆನ್ನ ದಿನ ಕಯ್ಯಡ್. ಅಕ್ಕ ನೀಕ್ ನಾನೆಂತಂದ್ ಗೊತ್ತಾಪ. ನಾಕೂ ನೀನೆಂತಂದ್ ಗೊತ್ತಾಪ.

ಹಲೋ ಮೇಡಂ. ಇದೆಲ್ಲಾ ಆಕಣೆ ನಾಕ್ ಐಯಿಂಬದ್ ದಾಟಿತಿಪ್ಪ. ಇಂಞ ನಾನೋರ್ ಮುದುಕಿನ ಮಂಗಲಾಕಂಡು.

ತಕ್ಕಕ್ ಜೋರ್‌ಲ್ ತೆಳಚತ್ ದೇಚಮ್ಮ.

ನೀಕ್ ತೆಳಿ. ಆಚೇಂಗಿ ನಾಕ್ ಪ್ರಾಣಸಂಕಟ. ನೀಕ್ ಎಲ್ಲಿ ನಾಡ ಕಷ್ಟ ಅರ್ಥ ಆಪ ಎಣ್ಣೆ.

ಇಲ್ಲೆ ದರ್ಶನ್, ನಾನ್ ಎಣ್ಣುವದ್ ನೀಕ್ ಅರ್ಥಾಯಂಡಿಲ್ಲೆ. ನೋಟ್

ಇಕ್ಕತ ಸುಮಾರ್ ಸಂಸಾರ ಪಾಳಾಯಂಡುಂಡ್. ಅದಂಗೆಲ್ಲಾ ಕಾರಣ ಅರ್ಥ ಮಾಡಿಯವತದ್. ಅನ್ನನೆ ನಾಕೂ, ನೀಕೂ ಹೊಂದಾಣಿಕೆ ಆಪುಲೆ. ಆನಕ ಇಕ್ಕಲೆ ಬೋರೆ ಬೋರೆ ಆಕನ. ಆಚೇಂಗಿ ಮಂಗಲಾನ ಪಿಂಞ ಚಾಯಾಪುಲೆ.

ಎಲ್ಲಿಕ್ ದೇಚು ನೀನ್ ಪೋಯಂಡುಳ್ಳಿಯಾ. ಮುಂದಾಲೋಚನೆ ತುಂಬಾ ಉಂಡ್.

ದರ್ಶನ್ ನೀನ್ ಇದಾನ ಎಂತ ಬೋಂಡೇಂಗಿ ಗೇನ ಮಾಡಿಯ. ಆಚೇಂಗಿ ನಾಡ ಅಭಿಪ್ರಾಯ ಇದೇ.

ಆಚಿ. ಆಚೇಂಗಿ ಒರ್ ಕಂಡೀಷನ್. ನೀನ್ ನಾಕಾಯಿತ್ ಮೊಬೈಲ್ ಎಡ್ಡವಂಡು.

ನಾಕ್ ನಿನ್ನ ನೋಟತೇ ಇಪ್ಪಕಯ್ಯುಲೆ ಅನ್ನತಲ್ಲಿ ತಕ್ಕ ಪರೆಯತೆಯೂ ನಾಕ್ ಕಯ್ಯುಲೆ.

ಸೆರಿ. ಆಚಿ. ನೀನ್ ಅಂತಿಂತೂ ಆರ್ಮಿಕ್ ಪೋಪಿಯ ಇಂಞ ಆರ್ತಿಂಗ ಬಪ್ಪುಲೆ. ಅಲ್ಲಿಕೆತ್ತನೆ ನಂಗ ನಂಗಡ ಇಷ್ಟ ಕಷ್ಟತನ ಅರಿಂಜವನ ಅಲ್ಲಿಂಜ ಮಂಗಲ. ಎಂತೆಣ್ಣುವಿಯಾ?

ಮಹಾರಾಣಿ ಎಣ್ಣನಕೆ ಪ್ರಜೆಯ ಕೇಕಂಡುಲ್ಲಾ.

ಅಚ್ಚಕ್ಕೆಲ್ಲಾ ಬೋಂಡ.

ಆಚಿ ನಾಡ ದೇಚು. ಅಪ್ಪಣೆ.

ಬಾ ಪೋಕನಾ ಕಾಕ್ಚಿ ದೇಚಮ್ಮಾ.

ನಾಕ್ ಮನಸ್ಸೇ ಇಲ್ಲೇ ಬಪ್ಪುಕ್.

ಅಂದಕ ನೀನ್ ಇಲ್ಲಿಯೇ ಇರ್. ನಾನೊಬ್ಬಳೇ ಪೋಪಿ.

ಇರ್ ದೇಚುಂದ್ ಓಡಿಯಂಡ್ ಬಂದತ್ ದರ್ಶನ್.

ಮನೆಕ್ ಬಂದ ದಿವ್ಯಂಡ ಮನಸ್ಸು ದರ್ಶನ್‌ರ ಬಗ್ಗೆ ಗೇನ ಮಾಡುವಕ್ ಕೂಡ್‌ಚಿ. ದರ್ಶನ್‌ಕ್ ನಾಡ ಪಳೆಯ ವಿಷಯತನ ಎಣ್ಣಿರಡಾ. ಎನ್ನನೆ

ಎಣ್ಣೆ. ಅಂವೊಂಗ್ ನಾನೆ ದಿವ್ಯಾಂದ್ ಗೊತ್ತಾನಕ ಎಂತ ಆಕು? ನಾನೋರ್ ಮೋಸಕರ್ತೀಂದ್ ಗೇನ ಮಾಡುವ. ಋಷಿಲ್ ಉಳ್ಳ ದರ್ಶನ್ ನನ್ನಗೊಂಡ್ ಬೇಜಾರ ಪಡವದ್ ಬೋಂಡ. ಎಕ್ಕೇಂಗಿ ಸಮಯ ಕಟ್ಟಾವಕ ಎಣ್ಣೆವಿ. ಅಂವೊ ಎಲ್ಲಿಯೇಂಗಿ ಆ ವಿಷಯ ಪರಂದಕ ನೋಟನಾ. ಅಲ್ಲಾ ನಾಡ ಕೂಡೆ ಅಂದ್ ಅಚ್ಚಕ್ಕೆಲ್ಲಾ ತಕ್ಕ ಪರಂದ ಮನುಷ್ಯ ಇಂದ್ ಬಾರಿ ನಲ್ಲವೊಂಡ ಮಾದರಿ ಕಳಿಪಲ್ಲಾ. ಇವಂಗ್ ಇವಂಡ ಪುರಾಣ ಗೊತ್ತಾಲೇಂದ್ ಗೇನ. ನಾಡೆನ್ನಕೆ ಎಚ್ಚಕ್ ಮೂಡಿಯ ಇಕ್ಕು ದಾರಕ್ ಗೊತ್ತ. ಛೇ, ದರ್ಶನ್ ಅನ್ನನೆ ಆಯಿತಿಪ್ಪಕ್ಕಿಲ್ಲೆ. ಅಚ್ಚಕ್ ಆಲಾಟೋಪ್ ಆಯಿತುಂಡೇಂಗಿ ನಾಡ ಜೊತೆಲ್ ಇಂಇಂತೊ ಕಳಿ ಕಳಿಪಯಿಂಜತ್. ಆಚೇಂಗಿ ಅಂವೊ ನಾಡ ತಕ್ಕಕ್ ಬೆಲೆ ತಂದಂಡುಂಡ್. ಅಂದ್ ಎಂತೋ ತಪ್ಪಿತ್ ಒರ್ ತಪ್ಪ್ ಮಾಡಿತಿಕ್ಕು. ಅದತ್ ನಾಡದು ತಪ್ಪ್ ಉಂಡ್. ಅಕ್ಕ ಅಂವೊ ನನ್ನೊ ಅನ್ನನೆ ಗೇನ ಮಾಡಲು ಅಲ್ಲಾ. ಇಲ್ಲೆ ಅಂವೊ ಅಂತ ಕ್ಣೆನಲ್ಲ. ಅನ್ನನೆ ಎಂತೇಂಗಿ ಇಂಜಕ. ಆರ್ ತಿಂಗತ್ ಗೊತ್ತಾಪಲ್ಲಾ. ಅಕ್ಕ ಬೋಂಡಾಂದ್ ಎಣ್ಣೆಚೇಂಗಿ ಆಚಿ ಮನಸ್ಸಲೆ ಗೇನ ಮಾಡಿಯಂಡತ್ ದಿವ್ಯ.

ಮೂಡಿಯ ಎಲ್ಲಾರು ಇನ್ನನೆ ಸುರು ಸುರುಲ್ ಬಾರಿ ಕಳಿಪ. ಮನಸ್ಸಲ್ ಎಲ್ಲಾ ಆಸೆ ಇಪ್ಪ. ಆಚೇಂಗಿ ತಕ್ಕ ಪರೆವಕ್ ಬಾರಿ ಬಲ್ಯ ಮೇಧಾವಿರನಕೆ ತಕ್ಕ ಪರೆವ. ಇದ್ ಚೆನ್ನಂಗೆ ದಿನ ನಾಡ ಕೂಡೆ ತಕ್ಕ ಪರಂದ್. ಪರಂದ್ ಎಲ್ಲಾ ಸೆರಿ ಆಪ. ಇವ ಆ ದಿವ್ಯಂಡ ಮಾದರಿ ಮಾಡತ ಪೋಚೇಂಗಿ ಮದಿ. ಅದತ್ಂಜ ಪೊರ ಬಂದದ್ ನಾಕೆ ಗೊತ್ತ ಪಿಂಇ ಇವಳೂ ಅನ್ನನೆ ಮಾಡಿಚೇಂಗಿ ದೇವಳೆ ಗತಿ. ಇವಕ್ ದಿವ್ಯಂಡ ವಿಷಯ ಎಣ್ಣೆ. ಎಣ್ಣೆಚೇಂಗಿ ನನ್ನ ಎಂತ ಗೇನ ಮಾಡಿಯವು? ನಾನ್ ಎಲ್ಲಾ ಮೂಡಿಯಡ ಕೂಡೆ ಇನ್ನನೇಂದ್ ಗೇನ ಮಾಡುವಕ್ಕಿಲ್ಲೆಯಾ? ಇಲ್ಲೆ ನಾನ್ ಅವಡ ಕೂಡೆ ದಿವ್ಯಂಡ ವಿಷಯ ಎಣ್ಣೆತೆ ಎಣ್ಣೆಂಡು. ಎನ್ನಂಗೆಣ್ಣಕ ಮಿಂಇಕ್ ಒರ್ ಕಷ್ಟ ಇಪ್ಪಲೆ. ಮಂಗಲಾಯಿತ್ ಅಪ್ಪಿತಪ್ಪಿತ್ ಬಾಯಿಲ್ ಬಂದ್‌ಟಕ ಅವ ಮುಂಡತಿಪ್ಪಕ್ಕಿಲ್ಲೆ. ಅದಂಗಿಂಜ ಮಂಗಲಕ್ಕಿಂಜ ಮಿಂಇಲೆ ಎಣ್ಣೆಟಕ ಒರ್ ತೊಂದರೆಯೂ ಇಪ್ಪಲೆ. ಅಕ್ಕ ಅವಕ್ ನಾನ್ ಪೊಟ್ಟ ಪರಂದಿತ್ ಜೀವಮಾನ ಇಡಿ ಕೊರಗುವಕ್ಕಿಂಜ. ಉಳ್ಳಾನ ಎಣ್ಣೆತ್ ಮನಸ್ಸರ ಭಾರತನ ಕಮ್ಮಿ

ಮಾಡಿಯವದ್ ನಲ್ಲದ್. ಇಲ್ಲೆ ದೇಚಮ್ಮಿಂಗ್ ಈ ವಿಷಯತ್ನ ಆಪಚ್ಚಕ್ ಬೆರಿಯ ಎಣ್ಣಂಡು ಸಂದರ್ಭ ಕ್ಟ್ಟುವಕಲೆ ಕೆಲಸ ಮಾಡಂಡು. ನೋಟನ ನಾಳೆ ಎಣ್ಣುವಕ್ ಟ್ರೈ ಮಾಡುವಿ.

ನಾಡ ದೇಚುರ ಮೇಲೆ ನಾಕ್ ನಂಬಿಕೆ ಉಂಡ್. ಅವ ಸತ್ಯಕ್ ಬೆಲೆ ಕೊಡಪದಲ್ಲತೆ. ನಾಡ ತಕ್ಕಕಲ್ಲ ಅವ ನೇರಾಯಿತೂ ನನ್ನ ಮಾಫ್ ಮಾಡುವ ಎಣ್ಣಾವ ನಂಬಿಕೆ ನಾಕುಂಡ್ ಗೇನ ಮಾಡಿಯಂಡತ್ ದರ್ಶನ್.

ದೇಚು ಸುಮಾರ್ ದಿನತಿಂಜ ನಾನ್ ನೀಕೋರ್ ವಿಷಯ ಎಣ್ಣಂಡುಂದ್ ಗೇನ ಮಾಡಿಯೆ. ಎಣ್ಣಡ, ಎಣ್ಣಚಿ ದರ್ಶನ್.

ನೀಡ ಮಾಮೂಲ್ ವಿಷಯ ಇಂಇನ್ನತದ್. ಇಪ್ಪಾ?

ಇಲ್ಲೆ ದೇಚೂ, ಸೀರಿಯಸ್ಸಾಯಿತ್ ಎಣ್ಣಿಯಂಡುಳ್ಳ. ಸೆರಿ ಅಂದಕ ಎಣ್ಣ್ ಅಕ್ಕಣೆ.

ಹಾಯ್, ದರ್ಶನ, ಎನ್ನ ಇಲ್ಲಿಯಲ್ಲಾ ಕಾಂಬ, ಕೇಟತ್ ಚಂಗು.

ಒಂದೂ ಇಲ್ಲೆ ಅನ್ನನೆ ಚೆನ್ನ ಇಾಣ ಇಾಣ ಕಳಿಚತ್ ದರ್ಶನ್.

ದೇಚಮ್ಮನ ನೋಟಿಚಿ, ಓ ಗೊತ್ತಾಚಿ ಬುಡ್ ಇನ್ನನೆಯಾ ವಿಷಯ. ಎಣ್ಣಲೆಲ್ಲಾ ನೀನ್?

ಅದ್ ಅದ್ ಬಿಕ್ಕಚಿ ದರ್ಶನ್.

ನಾನ್ ನೀಕ್ ಬಯ್ಯು ಪೋನ್ ಮಾಡುವಿ ಕಾಂಗನ ಅಂದಕ, ಪೋಚಿ ಚಂಗು.

ಭೇ, ಎಣ್ಣುವಕೇಂದ್ ಪೊರಟ ಅಕ್ಕಣೆಕ್ ಇಂವೊ.

ಎಣ್ಣ್ ದರ್ಶನ್ ಎಂತೂ ಎಣ್ಣಿಯಂಡಿಜಲ್ಲಾ.

ಇಂಇಗೋರ್ ದಿನ ಆಡ್. ನಾನ್ ಮನೆಲ್ ನಂಗಡ ವಿಷಯ ಎಣ್ಣಡ ಕೇಟತ್ ದರ್ಶನ್.

ಬೋಂಡ ಬೋಂಡ ನಾನ್ ಎಣ್ಣವಲ್ಲಿಕತ್ತನೆ ನಂಗಕ್ ಮಾತ್ರ ಇರಡ್.

ಅಕ್ಕ ಮನೆಲ್ ಕೇಟತೇಂಗಿ ಎಂತೇಂಗಿ ಪೊಟ್ವಪರಿ. ಅದ್ ಅನ್ನೆನ್ನೆಲ್ಲಾ

ದೇಚು.

ಎಚ್ಚಕೊ ಜನ ಅಂಜಿ ಕಾಲಕೆತ್ತನೆ ದಾರೂಕೂ ಗೊತ್ತಿಲ್ಲತನಕೆ ಇಪ್ಪ ನೀಕ್ ಒರ್ ಆರ್‌ತಿಂಗ ತಡ್‌ಪಕಯ್ಯುಲಿಯಾ?

ನಾಡ ಮನೆಲ್ ಮಂಗಲ ಕಯಿಪಕ್ ಮೂಡಿ ತೇಡಿಯಂಡುಂಡ್. ನಾನ್ ಎಣ್ಣೆಚೇಂಗಿ, ತಡ್‌ತತ್ ಅಕ್ಕಣೆಕ್ ದೇಚಮ್ಮ.

ಎಣ್ಣೆಚೇಂಗಿ ಊರಿಡೀ ಸದ್ದಾಪ. ಎಲ್ಲಾರು ಕೇಪ ಅಕ್ಕ ನಾಡ ಮನೆಲೂ ಗೊತ್ತಾಪ. ನಾಡ ಮಮ್ಮಿ ಪಪ್ಪಂಗೂ ಮಿಂಗಳೆ ಒರ್ ಅನುಮಾನ. ಇಕ್ಕ ಅದ್ ಸತ್ಯ ಆಪ. ನೀಡಗೊಂಡ್ ನಾನ್ ಮೊರಡಂಡು ಗೊತ್ತಾ?

ಇಲ್ಲೆ ದೇಚೂ, ನಾಡಕ್ಕೊಂಡ್ ನೀಕ್ ನೊಂಬಲ ಆಪಕಾಗ ಎಣ್ಣೆಚಿ ದರ್ಶನ್.

ನಾಕೂ ಮಂಗಲ ಕಯಿಪಕ್ ಕ್ಕಣ್ಣ ನೋಟಿಯಂಡುಂಡ್. ಆಚೇಂಗಿ ನಾನೆ ಒಂದೂ ಎಣ್ಣೆತೆ ಉಳ್ಳ. ಎನ್ನಂಗ್ ಗೊತ್ತಾ? ನೀಕಾಯಿತ್ ನಾನ್ ನಾಡ ಮನಸ್ಸನ ಎಕ್ಕೋ ನೀಕ್ ತಂದ್‌ಟಿಯೆ, ಆಚೇಂಗಿ ನೀಕ್, ನೀಕ್ ಬಿಕ್ಕಚಿ ದೇಚಮ್ಮ.

ಇಲ್ಲೆ ದೇಚೂ, ಇಂಗಳ ನಾನ್ ಅನನ್ನೆಲ್ಲಾ ತಕ್ಕ ಪರೆಯುಪುಲೆ. ಮುಷಿಯಾ ನೀಕ್? ಕೇಟತ ದರ್ಶನ್.

ನಾಕ್ ನಿನ್ನ ಎಕ್ಕಲೊ ಮುಷಿ ಆಯಿತ್. ಆಚೇಂಗಿ ನೀಕ್ ಅದ್ ಗೊತ್ತಲೆ. ಗೊತ್ತಾಚೇಂಗಿ ನೀನ್ ನಾಡ ಮೇಲೆ ಚೆಡಿ ಮಾಡುವಿಯಾ. ಮನಸ್ಸಲೆ ಗೇನ ಮಾಡಚಿ ದಿವ್ಯ.

ದೇಚೂ ದೇಚೂ ಎಂತ ಗೇನ ಮಾಡಿಯಂಡುಳ್ಳಿಯಾ? ನೆಟ್ಚಿ ದಿವ್ಯ.

ಒಂದೂ ಇಲ್ಲೆ.

ಇಲ್ಲೆ ನಾನ್ ನೀಕ್ ಎಣ್ಣೆದ್ ಬೇಜಾರ ಆಯಿತ್. ಇಂಗಳ ಮಿಂಗಳಕ್ ಅನ್ನನೆ ತಕ್ಕ ಪರೆಯುಲೆ.

ಸರಿ ಬಾ. ಅಂದಕ ಪೋಕ ನೀಕೂ ಲೇಟಾಪ.

ಮನೆಕ್ ಬಾತ್ ದರ್ಶನ್.

ಬಂದಿಯಾ ಬಾ ಕಾಕ್‌ಚಿ ಚೋಂದವ್ವ.

ನೀಕೋರ್ ವಿಷಯ ಎಣ್ಣಂಡು. ನೀಕ್ ಮಂಗಲ ಕಯಿಪ ಎಣ್ಣೋಕ ಸುಮಾರ ಜನ ತಂದ್ ಮಾಡಿತ್.

ಅಯಿಂಗಕ್ ಮಾಡೋಕ್ ಬೋರೆ ಕೆಲಸ ಇಲ್ಲೆಕಾಂಬ.

ಎನ್ನಂಗರೆ ಅನ್ನನೆ ಎಣ್ಣುವಿಯಾ? ನೀನ್ ಹ್ಲಂ ಎಣ್ಣಾಂಗೆ ನಂಗಳೂ ಸದ್ಡ್ ಮಾಡಿಯೆ ಮುಂಡತೆ ಇಂಜಕ ಮೂಡಿ ಮನೆಕೆ ಬಪ್ಪಲೆ.

ದರ್ಶನ್‌ರ ಸದ್ಡೆ ಇಲ್ಲೆ.

ಎನ್ನಂಗ್ ದರ್ಶನ್ ಎಂತಾಚಿ ನೀಕ್ ಅಂದ್ ಅಚ್ಚಕ್ ಖುಷಿಲ್ ಎಣ್ಣವಂಗ್ ಎಂತಾಚಿ?

ಒಂದೂ ಇಲ್ಲೆ ಎಣ್ಣಾಚಿ ದರ್ಶನ್.

ಅಂದಕ ಮೂಡಿ ನೋಟುವಕ್ ಪೋಪದಾ?

ಬೋಂಡ ಮಮ್ಮಿ, ಇಂಇೋರ್ ಆರ್ ತಿಂಗ ಕಯ್ಯಡ್.

ಮೂಡಿ ನೋಟನನ್‌ಕೆ ಮಂಗಲ ಕಯಿಪುಲೆ. ಇಕ್ಕ ನೋಟಿತ್ ತಕ್ಕ ತೀತಿತ್ ಬೆಚ್ಚವನ.

ಏದೂ ಕೂಡಿ ಇಂಇ ಚೆನ್ನಂಗ್ ದಿನತ್ ನೀನ್ ಆರ್ಮಿಕ್ ಪೋಪಿಯಲ್ಲಾ. ಇಂಇ ಆರ್ ತಿಂಗ ಕಯಿಂಜಿತೆ ಬಪ್ಪೊ. ನೋಟಾನನಕೆ ಮಂಗಲ ಆಪದಿಲ್ಲೆ. ನೀನ್ ಮೂಡಿ ನೋಟಂಡು, ನೀಕ್ ಖುಷಿ ಆಂಡು. ಅಪ್ಪವ್ವ ಸಂಸಾರ ಎಲ್ಲಾ ಚಾಯಿರಂಡು. ಮೂಡಿಕೂ ನಿನ್ನ ಖುಷಿ ಆಂಡು. ಜಾತಕ ಒತ್ತಬರಂಡು ಇದೆಲ್ಲಾ ಆಪಕ್ ಲೇಟಾಪ. ನೀನ್ ನೋಟಿಚೇಂಗಿ ಮಿಂಇಕ್ ನಂಗ ಮಾಡಿಯವ. ಅನ್ನನೆ ಸೆರಿ ಆಕತೆ ಪೋಚೇಂಗಿ ಇಂಇೋರ್ ನೋಟಿಚೇಂಗಿ ಆಚಿ.

ಇಲ್ಲೆ ಮಮ್ಮಿ ನಾನ್ ಏದ್ ಮೂಡಿ ನೋಟುವಕೂ ಬಪ್ಪಲೆ.

ಎಣ್ಣಕ... ಕೇಟತ್ ಚೋಂದವ್ವ.

ಇದ್ದಾನ ಎಣ್ಣುವಕ ನೀಕ್ ಇಚ್ಚಕ್ ದಿವಸ ಬೋಂಡು ಇಂಜತಾ? ನಾನ್ ಎಲ್ಲಿಯೇಂಗಿ ಆ ಮೂಡಿರ ಅಪ್ಪವ್ವಂಗ್ ಎಣ್ಣಿರ್ತಿಂಜಿತುಂಡೇಂಗಿ ಎಂತ ಗತಿ? ಇನ್ನನೆ ಒಳಿಯ ಒಂದ್ ಇಪ್ಪ ಬಯ್ಯಂಜ ಮೂಡಿ ನೋಟನದೆಲ್ಲಾ ಬೋಂಡ ಕಡೆಕೂ ಬಯ್ಯುವೊ ಅಪ್ಪವ್ವನ ಗೊತ್ತಿಂಜಿತೂ ಬೋರೆ ಮಂಗಲ ಕಯಿಪಕ್ ಪೊರಟತ್‌ಂದ್.

ಮಮ್ಮಿ ನನ್ನ ಮಾಘ್ ಮಾಡ್. ನಿಂಗಕ್ ನೊಂಬಲ ಮಾಡಂಡುಂದ್ ನಾನ್ ಎಣ್ಣಿಯಂಡಿಲ್ಲೆ. ಇದ್ ಸುಮಾರ್ ಕಾಲತರದ್ ಅಲ್ಲ. ಒರ್ ದಂಡ್ ತಿಂಗತರದ್.

ಓಹೋ ಇದಂಗ್ ಎಕ್ಕಾಲೂ ಓಡಿಯಂಡಿಂಜಿಯೆ? ಅವ್ವಂಡ ತಕ್ಕಕ್ ಇಗಾಣ ಆಚಿ ದರ್ಶನಕ್ ಮೂಡಿ ದಾರ್? ಕೇಟತ್ ಚೋಂದವ್ವ.

ಅದ್, ಪೊ..ಎಣ್ಣಿನಕೆ ದೇಚಮ್ಮಂಡ ತಕ್ಕ ಗೇನ ಬಾತ್.

ಇಲ್ಲೆ ಮಮ್ಮಿ ನಾನ್ ಇಕ್ಕಲೆ ಎಣ್ಣಲೆ. ನಿಂಗ ನನ್ನ ಒಂದೂ ಕೇಕಂಡ. ಕೇಕಂಡ ಎಣ್ಣಾಚೇಂಗಿ ನಂಗಕ್ ಎಂತ ಅರ್ಥ ಆಪ್? ನೀನ್ ಮೂಡಿರ ಬಗ್ಗೆ ಎಣ್ಣಾಚೇಂಗಿ ತಾನೆ ನಂಗ ಅರಿವೊ ಕಯ್ಯುವಾ?

ನಿಂಗ ಅರಿವದ್ ಒಂದೂ ಬೋಂಡ. ನಾನ್ ಮೂಡಿನ ಅರ್ಂಜಿಯೆ. ಚಾಯಿಕರ್ತಿ, ಗುಣಕರ್ತಿ ಇಚ್ಚಕ್ ಮಾತ್ರ ನಾನ್ ಎಣ್ಣುವೊ.

ಅಲ್ಲಾ. ಅಕ್ಕಲಿಂಜೆ ಎಣ್ಣಲೆ. ಎಣ್ಣಲೆ ಎಣ್ಣುವಿಯಲ್ಲಾ ಎಂತದ್ ನೀಡ ಉದ್ದೇಶ.

ಉದ್ದೇಶ ಒಂದೂ ಇಲ್ಲೆ. ಅವ ಕೊಡವತಿಯೆ. ನಾಲ್ ಜನಡ ಮಿಂಇಲ್ ಮಂಗಲ ಕಯಿಪಿ. ಆಚೇಂಗಿ ಇಕ್ಕ ಅವಡ ಬಗ್ಗೆ ನಾನ್ ಒಂದೂ ಎಣ್ಣಲೆ. ನಾಕ್ ಇಂಇಗೋರ್ ಆರ್ ತಿಂಗ ಟೈಂ ಬೋಂಡು. ಅಲ್ಲಿಂಜ ಮಿಂಇಕ್ ಎಲ್ಲಾ.

ಎಲ್ಲಾ ಅರಿಂಜಿಯಾ, ಎಣ್ಣಿಯಾ? ಇಂಇಂತ ನೀಕುಳ್ಳ ಕೇಟತ್ ಚೋಂದವ್ವ.

ನೀನ್ ನನ್ನ ಬುಡುವನಕೆ ಕಾಂಬ್ಲೆ. ಎಣ್ಣುವಿಕೇಳ್ ನಾನ್ ನೋಟನ

ಮನೆಕ್ ಬಾತ್ ದರ್ಶನ್.

ಬಂದಿಯಾ ಬಾ ಕಾಕ್‌ಚಿ ಚೋಂದವ್.

ನೀಕೋರ್ ವಿಷಯ ಎಣ್ಣಂಡು. ನೀಕ್ ಮಂಗಲ ಕಯಿಪ ಎಣ್ಣೋಕ ಸುಮಾರ ಜನ ತಂದ್ ಮಾಡಿತ್.

ಅಯಿಂಗಕ್ ಮಾಡೋಕ್ ಬೋರೆ ಕೆಲಸ ಇಲ್ಲೆಕಾಂಬ.

ಎನ್ನಂಗರೆ ಅನ್ನನೆ ಎಣ್ಣುವಿಯಾ? ನೀನ್ ಹ್ವಂ ಎಣ್ಣಾಂಗೆ ನಂಗಲೂ ಸದ್ ಮಾಡಿಯೆ ಮುಂಡತೆ ಇಂಜಕ ಮೂಡಿ ಮನೆಕೆ ಬಪ್ಪಲೆ.

ದರ್ಶನ್‌ರ ಸದ್ದೆ ಇಲ್ಲೆ.

ಎನ್ನಂಗ್ ದರ್ಶನ್ ಎಂತಾಚಿ ನೀಕ್ ಅಂದ್ ಅಚ್ಚಕ್ ಖುಷಿಲ್ ಎಣ್ಣವಂಗ್ ಎಂತಾಚಿ?

ಒಂದೂ ಇಲ್ಲೆ ಎಣ್ಣಾಚಿ ದರ್ಶನ್.

ಅಂದಕ ಮೂಡಿ ನೋಟುವಕ್ ಪೋಪದಾ?

ಬೋಂಡ ಮಮ್ಮಿ ಇಂಇಗೋರ್ ಆರ್ ತಿಂಗ ಕಯ್ಯಡ್.

ಮೂಡಿ ನೋಟನನಕೆ ಮಂಗಲ ಕಯಿಪುಲೆ. ಇಕ್ಕ ನೋಟಿತ್ ತಕ್ಕ ತೀತಿತ್ ಬೆಚ್ಚವನ.

ಏದೂ ಕೂಡಿ ಇಂಇ ಚೆನ್ನಂಗ್ ದಿನತ್ ನೀನ್ ಆರ್ಮಿಕ್ ಪೋಪಿಯಲ್ಲಾ. ಇಂಇ ಆರ್ ತಿಂಗ ಕಯಿಂಜಿತೆ ಬಪ್ಪೊ. ನೋಟ್‌ನನಕೆ ಮಂಗಲ ಆಪದಿಲ್ಲೆ. ನೀನ್ ಮೂಡಿ ನೋಟಂಡು, ನೀಕ್ ಖುಷಿ ಆಂಡು. ಅಪ್ಪವ್ವ ಸಂಸಾರ ಎಲ್ಲಾ ಚಾಯಿರಂಡು. ಮೂಡಿಕೂ ನಿನ್ನ ಖುಷಿ ಆಂಡು. ಜಾತಕ ಒತ್ತಬರಂಡು ಇದೆಲ್ಲಾ ಆಪಕ್ ಲೇಟಾಪ. ನೀನ್ ನೋಟಿಚೇಂಗಿ ಮಿಂಇಕ್ ನಂಗ ಮಾಡಿಯವ. ಅನ್ನನೆ ಸೆರಿ ಆಕತೆ ಪೋಚೇಂಗಿ ಇಂಇಗೋರ್ ನೋಟಿಚೇಂಗಿ ಆಚಿ.

ಇಲ್ಲೆ ಮಮ್ಮಿ ನಾನ್ ಏದ್ ಮೂಡಿ ನೋಟುವಕೂ ಬಪ್ಪಲೆ.

ಎಣ್ಣಕ... ಕೇಟಿತ್ ಚೋಂದವ್.

ಮೂಡಿ ಇಂಞ ಆರತಿಂಗ ಟೈಂ ಕೇಟಂಡಿತ್. ಅಲ್ಲಿಕೆತ್ತನೆ ಈ ವಿಷಯ ದಾರ್ಕೂ ಗೊತ್ತಾಪಕಾಗಾಂದ್ ಎಣ್ಣಿತ್. ಏದೂ ಕೂಡಿ ನಾನ್ ಆರ್ಮಿಕ್ ಪೋಪಿಯಲ್ಲಾ ಇಂಞ ಬಪ್ಪದ್ ಆರತಿಂಗ ಕಯಿಂಜ ಪಿಂಞ ಅದಂಗ್ ಮುಂಡತೆ ಎನ್ನಂಗ್ ಸದ್ ಮಾಡುವೋಂದ್ ಅಚ್ಚೆಕೆ.

ನೀಡ ಮೂಡಿಯೂ, ನೀಡ ಕಳಿಯೂ ನೀಕೆ ಚಾಯಿ. ಅವ ಎಣ್ಣೆಚಲ್ಲೊ ಇವಂಗ್ ಒಪ್ಪಿಗೆ. ಅಲ್ಲಾ ಅವ ಎಲ್ಲಿಯೇಂಗಿ ಆರ್ ತಿಂಗತ್ಲ್ ಬೋರೆ ಮಂಗಲಾಚೇಂಗಿ...?

ಇಲ್ಲೆ. ಅದ್ ಸಾಧ್ಯ ಇಲ್ಲೆ. ಅವ ನನ್ನ ಬುಟ್ಟಿತ್ ಬೋರೆ ದಾರ್ನೊ ಮಂಗಲಾಪುಲೆ ಆ ನಂಬಿಕೆ ನಾಕುಂಡ್. ಎಣ್ಣಿಯಂಡ್ ಕೋಬರೆಕ್ ಪೋಚಿ ದರ್ಶನ್.

ದೇಚು ನೀಕ್ ನಾನೋರ್ ತಕ್ಕನ ನಿನ್ನಾಂದ್ ಎಣ್ಣುವಕ್ ಬಂದ ಆಚೇಂಗಿ ಅದ್ ಆಯಿಲೆ.

ನಾನೂ ಅದ್ನ ಕೇಕಂಡುಂದ್ ಇಂಜ. ಎಂತ ಎಣ್ಣೆ?

ನೀನ್ ಬೇಜಾರ ಆಡ್, ಚೆಡಿ ಆಡ್, ಮಾಡುವ ಕಯ್ಯ. ನಾಡ ಪ್ರೀತಿ ಎಕ್ಕಾಲ್ಯೂ ಸತ್ಯ. ಈ ಸಂಗತಿ ಕೇಟಿತ್ ನೀನ್ ನನ್ನ ಬೋರೆ ತರತ್ಲ್ ಗೇನ ಮಾಡುವ ಕಯ್ಯ. ಎನ್ನಂಗೇಣ್ಣಕ Past ia Past ಆಚೇಂಗಿ Future ನಂಗಡ ಕೈಲುಂಡ್.

ದೇಚಮ್ಮಂಗ್ ದರ್ಶನ್ರ ತಕ್ಕ ಕೇಟಿತ್ ಆಶ್ಚರ್ಯ ಆಚಿ.

ಎಂತಾಂಗ್ ದರ್ಶನ್? ಎಂತ ಆಯಿತಿಂಜತ್ ನೀಕ್?

ನಾನ್ ಕೊದಿಚ ದಂಡನೆ ಮೂಡಿ ನೀನ್. ನೀಕ್ಕಿಂಜ ಮಿಂಞ ನಾಕೊಬ್ಬಳ ಇಷ್ಟ ಆಯಿತಿಂಜತ್. ಅವಡ ಪೆದ ದಿವ್ಯ. ನಾಕ್ ನೀಡ ಕೂಡೆ ತಕ್ಕ ಪರೆವಕ ಅವಡ ಕೂಡೆ ಪರಂದನಕೆ ಆಪೆಯಿಂಜತ್. ಆಚೇಂಗಿ ನೀನೆ ಬೋರೆ ಅವಳೆ ಬೋರೆ.

ನಾನ್ ಒರ್ ಕುರಿ ಆರ್ಮಿಲಿಂಜ ಬಂದಿತಿಪ್ಪಕ ನಾಡೋರ್ ತಂಗೆಕ್ ಪೋನ್ ಮಾಡ್ನ. ಅದ್ ತಪ್ಪಿತ್ ಈ ದಿವ್ಯಂಗ್ ಪೋಚಿ. ಅವ ನಾಕ್ ತಾರಮಾರ ಬಜ್ಜತ್. ಅವಕ್ ಪಡಿಪಿಚಿಡಡೋಂದ್ ನಾನ್ ಬೋರೆ

ನಂಬರ್‌ಲಿಂಜ ಮೆಸೇಜ್ ಮಾಡ್‌ನ. ತಾರಮಾರ ಮೆಸೇಜ್ ಅಯಚ್. ಇನ್ನನೆ ಆಯಿ ಆಯಿ ನಾನ್ ಅವಳ ನಾಕೆ ಗೊತ್ತಿಲ್ಲತನಕೆ ಕೊದಿಪಕ್ ಸುರು ಮಾಡ್‌ನ. ನಾನ್ ಎಚ್ಚಕ್ ಮೆಸೇಜ್ ಮಾಡನಕಲೂ ಅವಡ ಉತ್ತರ ಇಲ್ಲೆ. ಅವಡ ಆ ಗುಣವೆ ನಾಕ್ ಇಷ್ಟ ಆಚಿ. ಅಲ್ಲಿಂಜ ಇದ್‌ನ ಎಣ್ಣುವಕಯ್ಯತನೆಕೆ ಗೋಳಾಡ್‌ನ. ಕಡೇಕ್ ಒರ್ ದಿನ ನಾಡ ಪಂಜಾಬ್ ನಂಬರ್‌ಲಿಂಜ ಫೋನ್ ಮಾಡಿತ್ ಗೊತ್ತುಳ್ಳಯಿಂಗ ಕಳಿಪಿಚಿಡುವೋಂದ್ ಗೇನ ಮಾಡಿತ್ ನಾಡ ಕೂಡೆ ತಕ್ಕ್‌ಪರಂದತ್. ಇನ್ನನೆ ಫ್ರೆಂಡ್‌ಶಿಪ್ ಆಚಿ. ನಾನ್ ಅವಕ್ ನಾಡ ಮನಸ್ಸರ ಆಸೆನ ಎಣ್ಣುವಕ್‌ಂದ್ ನೋಟನ. ಆಚೇಂಗಿ ಅದ್ ಆಯಿತಿಲ್ಲೆ ಎಣ್ಣಾಚೇಂಗಿ ಬಯ್ಯುವ. ಬಯ್ಯಂಜಿ ತಕ್ಕ್ ಪರೆಯುಲೆ. ಅದಂಗಾಯಿತ್ ಮುಂಡತೆ ಇಂಜ. ಅಕ್ಕ ಅವ ಬೆಂಗಳೂರ್‌ಲ್ ಓದಿಯಂಡಿಂಜತ್. ಆಚೇಂಗಿ ಇಕ್ಕ ಎಲ್ಲಿ ಉಂಡ್ ಗೊತ್ತಾಲೆ. ನಾನೋರ್ ದಿನ ಆರ್ಮಿ‌ಲಿಂಜ ಮನೆಕ್ ಬಪ್ಪಕ ಅವಳ ನೋಟಿತ್ ಬಪ್ಪಾಂದ್ ಗೇನ ಮಾಡ್‌ನ. ಅವಕೂ ಎಣ್ಣ. ಅವ ಬಾಂದ್ ಎಣ್ಣಾಚಿ. ಇದನ ಕೇಟ ನಾಕ್. ಖುಷಿ ಆಚಿ. ಅಕ್ಕಲೆ ಎಲ್ಲಾನೊ ಎಣ್ಣಂಡುಂದ್ ಗೇನ ಮಾಡಿಟ. ನಾಕ್ ಅವಡ ಚಾಯಿ ಚಂದ ಬೋಂಡಿಂಜಿಲೆ. ಅವಡ ತಕ್ಕ್ ಗುಣ ಚಾಯಿ, ಅನ್ನನೆ ಆಯಿತ್. ಅಂದೋರ್ ದಿನ ಅವ ಬಪ್ಪಿಂಂದ್ ಎಣ್ಣಿತ್ ಬಂದಾಲೆ. ನಾನ್ ಸುಮಾರ್ ನೇರ ನೋಟನ. ಫೋನ್ ಮಾಡಿಚೇಂಗಿಯೂ ಎಡ್ತಾಲೆ. ವಿಧಿ ಇಲ್ಲತೆ ವಾಪಾಸ್ ಬಂದ. ಬಯಿಟಾಪಕ ಫೋನ್ ಮಾಡಿತ್ ತಾರಮಾರ ಬಜ್ಜ. ಅಲ್ಲಿಂಜ ಸುಮಾರ್ ದಿನ ಫೋನ್ ಮಾಡಿತಿಲ್ಲೆ. ಬಯ್ಯಂಜಿ ನಾಕೆ ಬೇಜಾರಾಯಿತ್ ಅವಕ್ ಫೋನ್ ಮಾಡ್‌ನ ಆಚೇಂಗಿ ನಂಬರ್ ಸ್ವಿಚ್ ಆಫ್. ಅಲ್ಲಿಂಜ ಸುಮಾರ್ ದಿನ ನಾಕ್ ಎಂತ ಮಾಡುಂಡೂಂದೆ ಗೊತ್ತಾಯಂಡಿಂತ್‌ಲೆ. ಬಯ್ಯ ಬಯ್ಯ ಚೆನ್ನ ಸೆರಿಯಾಚಿ ಇಕ್ಕ ಅವ ನಾಡ ಮನಸ್ಸರ ಒರುಬರಿಯೂ ಇಲ್ಲೆ. ನಾಕ್ ಅವ ಎನ್ನನೆ ಉಂಡೇಂದೂ ಗೊತ್ತಾಚಿ. ಒರ್ ಸಮಯ ನಾಡ ಮಿಂಞಕಾಲೆ ಫೋಚೇಂಗಿಯೂ ನಾಕ್ ಅವಳ ಗೊತ್ತಪ್ಪಡಿಪಕ್ ಕಯ್ಯುಲೆ. ಅಲ್ಲಿಂಜ ಮೂಡಿಯಡ ಸಹವಾಸ ಬೋಂಡಾದ್ ಗೇನ ಮಾಡಿತ್. ನಾಡ ಕೆಲಸ ಮಾಡಿಯಂಡ್ ಮುಂಡತೆ ಇಂಜ. ನಿನ್ನ ಕಾಂಬಕ ಎಂತೊ ಒರ್ ತರ ಆಚಿ. ನೋಟಡಾಂದ್ ಗೇನಂ

ಮಾಡಿಚೇಂಗಿಯೂ ನೋಟಂಡೂಂದ್ ಆಚಿ. ತಕ್ಕ್ ಪರಂದಿತಾನದು ದಿನಾ ತಕ್ಕ್ ಪರೆಯಂಡೂಂದ್ ಆಚಿ. ಇನ್ನನೆ ನಾಕೆ ಗೊತ್ತಿಲ್ಲತನಕೆ ನಾಡಮನಸ್ಸಲ್ ಪುನಾದಿಯೋ ಒರ್ ಆಸೆ ಪುಟ್ಚಿ. ನಾನ್ ಒಮ್ಮೆ ಮಾಡ್‌ನ ತಪ್ಪನ ಪುನಾದಿಯೋ ಮಾಡುವಕಾಗಾಂದ್ ತುಂಬಾ ಕಷ್ಟಪಟ್ಟ ಆಚೇಂಗಿ ಆಯಿತಲೆ. ನೀನ್ ಬಪ್ಪ ಟೈಂಕ್ ನಾಡ ಕಣ್ಣ್. ರಸ್ತೆಲ್ ನಿನ್ನ ಕಾತಂಡಿಪ್ಪಯಿಂಜತ್. ಸತ್ಯ ಎಣ್ಣುವಿ ದೇಚೂ ಇಕ್ಕ್ ನಾಡ ಸೊಪನತ್, ಮನಸ್ಸಲ್ ಉಳ್ಳ ನೀನ್ ನಿನ್ನ ಬುಟ್ಟಿತ್ ನಾಕ್ ಇಪ್ಪ ಕಯ್ಯಲೆ. ಎಣ್ಣಿತ್ ತಿರ್‌ಗ್‌ಚಿ ದರ್ಶನ್.

ದೇಚಮ್ಮ ಮೊರಟಡುಂದ್.

ಸಮಾಧಾನ ಮಾಡಿಯಾ ದೇಚೂ ನಾನ್ ನೀಕ್ ನೊಂಬಲ ಮಾಡಂಡೂಂದ್ ಈ ತಕ್ಕ್‌ನ ಎಣ್ಣಿತ್ತಿಲ್ಲೆ. ಉಳ್ಳ ಸತ್ಯತನ ಎಣ್ಣಾಚೇಂಗಿ ನಾಕೂ ನಲ್ಲದ್ ನೀಕೂ ನಲ್ಲದ್. ಮಿಂಇಕ್ ಜಗಳ ಬಪ್ಪದ್ ಕಮ್ಮಿ. ನಾಕ್ ಗೊತ್ತುಂಡ್ ನೀಕ್ ನಾಡ ತಕ್ಕ್ ಕೇಟಿತ್ ಬೇಜಾರಾಯಿತ್‌ಲೆಂದ್ ಆಚೇಂಗಿ ನಾನ್ ಮೋಸ ಮಾಡಿತ್ತಿಲ್ಲೆ. ಬೋರೆ ಪ್ರೇಮಿಯಡ ಮಾದರಿ ಕೈ ಕೈ ಪುಡಿಚಂಡ್ ಪಿಕ್ಚರ್ ಪಾರ್ಕ್ ಅಲ್ಲಿ ಇಲ್ಲಿಂದ್ ಸುತ್ತಿತ್ತಿಲ್ಲೆ ಫೋನ್‌ಲ್ ಆನ ಪರಿಚಯ ಸಿಮ್ ಛೇಂಜ್ ಮಾಡುವಾತ್ ತ್‌ಲೆಂದತ್. ನೀನ್ ನನ್ನ ಪೋಲಿ ಪೊರ್ಕಿಂದ್ ಗೇನ ಮಾಡತೆ. ನಾನ್ ಏದ್ ಮೂಡಿರ ಬಯ್ಯ ಪೋಯಿತ್‌ಲೆ. ಒಂದ್ ದಿವ್ಯ ಅಲ್ಲಿಂಜ ನೀನ್ ಅಚ್ಚಿಕೆ. ಪೊಟ್ ಪರಂದಿತ್ ಮೋಸ ಮಾಡುವ ಉದ್ದೇಶ ನಾಕಿಲ್ಲೆ. ದೇಚೂಂದ್, ಕಾಕಿಯಂಡ್ ಕೈಪುಡ್‌ಚತ್ ದರ್ಶನ್.

ದೇಚಮ್ಮ ಕೈನ ಒದರಿತ್ ದೂರ ನಿಂದತ್.

ನಾನ್ ನೀಕ್ ಅದಂಗೆ ಮಿಂಇಲೇ ಎಣ್ಣಿಯ ಚೆಡಿ ಮಾಡಿಯವತೆಲೆಂದ್. ದಯಬೆಚ್ಚಿತ್ ನನ್ನ ಮಾಘ್ ಮಾಡ್.

ನೋಟ್ ನೀನ್ ನಾಕ್ ಒಂದೂ ಎಣ್ಣುವದ್ ಬೋಂಡ. ಇಚ್ಚಕ್ ಎಣ್ಣಾನೆ ಸಹಿಸುವ ಕಯ್ಯಲೆ. ಇಂಇಗೂ ಎಣ್ಣಿತ್ ನಾಕ್ ಇಂಇಗೂ ನೊಂಬಲ ಮಾಡತೆ.

ಇಲ್ಲೆ ದೇಚಮ್ಮ, ಛಿ ನಾನ ಎಂತ ಮಾಡಡ್

ನೋಟ್ ನಾಕ್ ನೀಡ ಕೂಡೆ ತಕ್ಕ ಪರೆವಕ್ ಟೈಂ ಇಲ್ಲೆ. ನಾಕ್ ಲೇಟಾಚಿ ನಾನ್ ಪೋಪಿ.

ನೇರೆ ಪೊರಟತ್ ದಿವ್ಯ

ದೇಚಮ್ಮಾ ನಿಲ್ಲ. ಕಾಕ್‌ಚಿ ದರ್ಶನ್

ದಿವ್ಯ ತಿರಿ ನೋಟತೆ, ನೇರೆ ಮೊರಟಂಡ್ ಬಸ್ಸಪತ್ತಾಚಿ.

ಮನೆಕ್ ಬಂದ ದಿವ್ಯ ನೇರೆ ಕೋಂಬರೆಕ್ ಪೋಯಿತ್ ಪಡಿ ಇಟ್ಟಂಡ್ ಮೊರಡುವ ಕೂಡ್‌ಚಿ. ಬಿಕ್ಕಿ ಬಿಕ್ಕಿ ಮೊರಟತ್ ಮನಸ್ಸಾರ ಒರ್ ತರ ಬೇಜಾರ ಮೊರಟಂಡೆ ಗೇನ ಮಾಡ್‌ಚಿ ದಿವ್ಯ.

ದರ್ಶನ್ ನಾಕ್ ನೀನ್ ಎಣ್ಣೆ ತಕ್ಕ ಕೇಟಿತ್ ಬೇಜಾರ ಆಯಿತಿಲ್ಲೆ. ಎನ್ನಂಗಣ್ಣಕ ಇದೆಲ್ಲಾ ನಾಕ್ ಗೊತ್ತುಳ್ಳ ಸಂಗತಿಯೆ. ಆ ನೀಡ ದಿವ್ಯ ಬೋರೆ ದಾರೂ ಅಲ್ಲ ನಾನೇ. ಇದನ ನೀಕ್ ಎನ್ನನೆ ಎಣ್ಣಡ್. ನೀನ್ ಎಲ್ಲಾನ ಮರಂದಿತುಳ್ಳಿಯಂದ್ ಗೇನ ಮಾಡ್‌ನ ಆಚೇಂಗಿ ನೀಡ ಮನಸ್ಸಲ್ ಆ ದಿವ್ಯ ಎಣ್ಣೆಚೇಂಗಿ, ನಾಡ ಮೇಲೆ ಚೆಡಿ ಅನ್ನನೆ ಉಂಡ್. ಆ ದಿವ್ಯ ನಾನೇಂದ್ ನೀಕ್ ಎಣ್ಣಕ... ಬೋಂಡ, ದರ್ಶನ್ ನೀಕ್ ಗೊತ್ತಾಪದ್ ಬೋಂಡ. ನಾನ್ ನೀಡ ಮೇಲೆ ಸುಮಾರ್ ಆಸೆ ಬೆಚ್ಚಿತುಳ್ಳ ಆಚೇಂಗಿ ಈ ಸತ್ಯತನುಂಡ್ ಬೋರೆ ಆಪದ್ ಬೋಂಡ ನೀನ್ ಗೇನ ಮಾಡಿತಿಕ್ಕು ನಾನ್ ನೀಡ ತಕ್ಕ ಕೇಟಿತ್ ಮೊರಂಟಂಡ್ ಬಂದಿಯೇಂದ್ ಆಚೇಂಗಿ ನಾಡ ಮನಸ್ಸಲ್ಲಳ್ಳದೆ ಬೋರೆ ನೀಕ್ ಇದ್‌ನ ಎನ್ನನೆ ಎಣ್ಣಡ್ ಇಚ್ಚಕ್ ದಿನ ಪಳೆಯನ್ನೆಲ್ಲಾ ಮರಂದಿತ್ ಆರಾಮ್‌ಲ್ ಇಂಜ. ಆಚೇಂಗಿ ಇಕ್ಕ ನಾಕ್ ಕೈಯ್ಯುವದಿಲ್ಲೆ. ಮಂಡೆ ಎನ್ನಂಗೊ ಭಾರ ಭಾರ ಆಪ. ನನ್ನ ಮಾಘ್ ಮಾಡಿರ್ ದರ್ಶನ್ ನಾಕ್ ಎನ್ನನೆ ನೀಡ ಕೂಡೆ ತಕ್ಕ ಪರೆವೋಂದ್ ಆಯಂಡುಂಡ್. ಅನ್ನನೆ ವರ್‌ಚಿ ದಿವ್ಯ.

ಪಿತ್ಯಾಂದ್ ಪೊಲಾಕ ಆಫೀಸಕ್ ಬಪ್ಪಕ್ ರೆಡಿಯಾಚಿ ದಿವ್ಯ ಮನಸ್ಸಲೆಲ್ಲಾ ದರ್ಶನ್‌ರದೆ ಗೇನ ಎಂತ ಎಣ್ಣಡ್ ಇಂದ್ ಅಂವೊ ನನ್ನ ತೇಡಿಯಂಡ್ ಬಂದಿತೇಬಪ್ಪ. ನಾನೇ ದಿವ್ಯಂದ್ ಎಣ್ಣೆರಡಾ. ಇಲ್ಲೆ ಬೋಂಡ ಅವಂಗ್ ಗೊತ್ತಾಪದೆ ಬೋಂಡ. ಅನ್ನನೆ ಗೇನ ಮಾಡಿಯಂಡ್ ರಸ್ತೆಲ್ ನಡ್‌ಂದಂಡ್

ಬಾತ್ ದಿವ್ಯ. ಏದೊ ಗೇನತಿಂಜ ದಿವ್ಯಂಗ್ ಮಿಂಞಾಕಾಲೆ ಬಂದ ಕಾರ್ ಇಡ್ಚಂಡ್ ಪೋಯಿರ್ತ್. ದಿವ್ಯ ರಸ್ತೆಲ್ ಬುದ್ಧಿತ್. ಚೋರೆಲ್ ಒದ್ದಾಡಿಚಿ. ಜನ ಎಲ್ಲಾ ಗುಡ್ಡೆ ಕೂಡಚಿ.

ಈ ಮೂಡಿಯಾ! ಇವ ಇಲ್ಲಿಯೆ ಪೋಸ್ತಾಫೀಸಲ್ ಉಳ್ಳ. ಬೆರಿಯ ಆಸ್ವತ್ತೆಕ್ ಕೊಂಡ ಪೋಕೊಂಡ್ ಒಬ್ಬೊ ಎಣ್ಣೆಚಿ. ಅವಳ ಎಡ್ತಂಡ್ ವೆಹಿಕಲ್‌ನ ನೋಟಿಯಂಡಿಂಜತ್ ಜನ.

ಸುಮಾರ್ ನೇರ ಪಾರಕಾತಡಿಂಜ ದರ್ಶನ್ ದೇಚಮ್ಮ ಬಕ್ಕತಿಪ್ಪದು ಕಾರ್ ಎಡ್ತಂಡ್ ರಸ್ತೆಕಾಲೆ ಬಾತ್.

ಓಹೋ ಏದೊ ಕಾರ್ ಬಂದಡುಂಡ್. ಇದನೆ ತಡಿತಿತ್ ಪೋಕ.

ಹ್ಲಂ ಹ್ಲಂ ಒಬ್ಬೊ ಕೈ ಕಾಟ್ಚಿ.

ನಾನ್ ಎಂತೋರ್ ಕೆಲಸಕ್ ಪೊರಟಕ ಈ ಜನಕ್ಕೊಂದ್ ಕೈತಡ್‌ಪ. ಬಸ್‌ಲ್ ಪೋಪಕಯ್ಯಲಿಯಾ? ಗೊಣಗಿಯಂಡ್ ಕಾರ್ ನಿಪ್ಪಚಿಟ್ಟತ್ ದರ್ಶನ್.

ನೋಟಿ, ಇಯಂಗಳ್ ದಾರೊ ಆಕ್ಸಿಡೆಂಟ್ ಮಾಡಿತ್ ಪೋಯಿಟಿತ್. ಅರ್ಜೆಂಟಾಯಿತ್ ಆಸ್ವತ್ತೆಕ್ ಪೋಂಡು ಎಣ್ಣೆಚಿ.

ದರ್ಶನ್ ಹ್ಲಂ ಎಣ್ಣೆತ್ ಕಾರ್‌ರ ಪಡಿ ತೊರಂದತ್ ಅಯಿಂಗ, ದಿವ್ಯನ ಎಡ್ತಂಡ್ ಕಾರ್‌ಕ್ ಇಡುವಕ್ ಬಾತ್.

ದರ್ಶನ ತಿರಿತ್ ನೋಟ್‌ಚಿ. ತೆಡ್ ಬಡ್‌ಚನಕೆ ಆಚಿ.

ದೇಚಮ್ಮಾ... ಚೋರೆಲ್ ಕೂತ್‌ಟ್ಟತ್ ದರ್ಶನ್.

ದೇಚು, ದೇಚು, ತಕ್ಕ ಪರಿ. ಎಂತಾಚಿ ನೀಕ್? ಗಾಬರಿಲ್ ದೇಚಮ್ಮನ ಕಾಕ್‌ಚಿ ದರ್ಶನ.

ನೋಟಿ, ನಿಂಗಕ್ ಇಯಂಗಳ್ ಗೊತ್ತುಂಡಾ?

ಹ್ಲಂ ಗೊತ್ತುಂಡ್ ಮೊರಟಂಡ್ ಎಣ್ಣೆಚಿ ದರ್ಶನ್.

ಇಯಂಗಳ್ ಇಕ್ಕ ಸೊಯ ಇಲ್ಲೆ. ನಿಂಗ ಎಚ್ಚಕ್ ಬಾಯಿ ಬಡಚತೇಂಗಿಯೂ ಪ್ರಯೋಜನ ಇಲ್ಲೆ. ಬೆರಿಯ ಆಸ್ವತ್ತೆಕ್ ಪೋಕ. ಬೆರಿಯ

ಕಾರ್ ಸ್ಪೂಟ್ ಮಾಡಿ ಎಣ್ಣೆಚಿ ಅಲ್ಲಿಂಜಯಿಂಗ ದರ್ಶನ್ ಬೆರಿಯ ಕಾರ್ ಓಡ್ ಚಿಟ್ಟತ್. ಆಸ್ತೆ ಬಾತ್.

ದರ್ಶನ್ ಕಾರ್ನ ನಿಪ್ಪಚಿಟ್ಟತ್. ತಾನೇ ದೇಚಮ್ಮನ ಎಡ್ಡಂಡ್ ಒಳಕ್ ಬಾತ್. ನೇರೆ ಆಪರೇಷನ್ ಥಿಯೇಟರ್ಕ್ ಎಡ್ಡತ್ ಪೋಚಿ. ಅಕ್ಕಣೆಕ್ ಡಾಕ್ಟರ್, ನರ್ಸ್‌ವ ಓಡಿಯಂಡ್ ಬಾತ್.

ನೋಟಿ ಡಾಕ್ಟರ್ ಬೆರಿಯ ಇವಳ ನೋಟಿ. ನಾಡ ದೇಚುಕೂ ಒಂದೂ ಆಪಕಾಗ.

ನಿಂಗೆಲ್ಲಾ ಪೊರಮೆ ಇರಿ ನಾನ್ ನೋಟಿತ್. ನಿಂಗಕ್ ಕಂಡೀಷನ್ ಎನ್ನನೇಂದ್ ಎಣ್ಣುವಿ. ಡಾಕ್ಟರ್ ಪಡಿ ಮುಚ್ಚಚಿ.

ದೇಚು, ನಾಡಕೊಂಡೆ ನೀಕ್ ಇನ್ನನೆ ಆಪಕಾಯೆ. ನಾನ್ ನೀಕ್ ಎಂತೆಲ್ಲೊ ಎಣ್ಣುವಂಜ ಮಂಡೆ ಪಾಳ್ ಮಾಡಿತಿಂಜ. ನೀನ್ ಅದೆ ಗೇನತ್ ಇಂಜಿಯಾ ಕಾಂಬ. ಅನ್ನನೆ ಆಯಿತೆ ನೀಕ್ ಇನ್ನನೆ ಆಪಕಾಯೆ. ನನ್ನ ಮಾಘ್‌ಮಾಡಿರ್ ದೇಚು. ಮಾಘ್‌ಮಾಡಿರ್. ಓ ದೇವಳೆ ನಾಡ ದೇಚುಕ್ ಒಂದೂ ಆಕತನಕೆ ನೋಟಿಯಾ. ಅವಕ್ ಒರೂ ತೊಂದರೆ ಇಲ್ಲತಾಡ್. ದೇವಳ ಬೋಡಿಯಂಡತ್ ದರ್ಶನ್ ಮನಸ್ಸಲೆ ಬೇಜಾರ ಮಾಡಿಯಂಡ್ ಅಳತತ್.

ಅಕ್ಕಣೆಕ್ ಒರ್ ಮನುಷ್ಯ ಅಲ್ಲಿಕ್ ಬಾತ್.

ನೋಟಿ ನಿಂಗಕ್ ಅಯಿಂಗಳ ಗೊತ್ತುಂಡಲ್ಲಾ. ಇದ್ ಅಯಿಂಗಡ ಬ್ಯಾಗ್. ಎಚ್ಚರಾನ ಪಿಂಞ ಕೊಡ್ತಿರಿ.

ಪಿಂಞ ಮನೆಕ್ ಅರಿಚಿಡಿ.

ಮಂಡೆ ಆಟ್‌ಚಿ ದರ್ಶನ್. ಬ್ಯಾಗ್ ಕೇಟಂಡತ್.

ಬ್ಯಾಗ್‌ನ ನೋಟ್‌ಚಿ. ಅಲ್ಲಿ ಒರ್ ಡೈರಿ ಕಂಡತ್. ದರ್ಶನ್ ತೊರಂದ್ ನೋಟ್‌ಚಿ. ಅಲ್ಲಿ ದೇಚಮ್ಮಂಡ ಪೆದ ಮನೆರ ಅಡೆಸ್ ಪೋನ್ ನಂಬರ್ ಇಂಜತ್. ದರ್ಶನ್ ಆ ನಂಬರ್ ನೋಟಿತ್ ಪೋನ್ ಮಾಡ್‌ಚಿ.

ಹಲೋ, ಇದ್ ಮಾಚಯ್ಯ ಅಯಿಂಗಡ ಮನೆಯಾ?

ಅಕ್ಕು, ನಾನ್ ಮಾಚಯ್ಯನೆ ತಕ್ಕ ಪರಂಡುಳ್ಳ, ನಿಂಗ ದಾರ್ಂದ್ ಗೊತ್ತಾಯಿತ್ಲೆ.

ನಾನ್ ದರ್ಶನ್ಂದ್, ದೇಚಮ್ಮ ನಿಂಗಡ

ಹ್ಲೆಂ. ನಾಡ ಮೋವಳೆ ಎಂತಾಚಿ ದೇಚಮ್ಮಂಗ್? ಗಾಬರಿಲ್ ಕೇಟತ್ ಮಾಚಯ್ಯ.

ಅದ್ ಅದ್ ಒರ್ ಚೆರಿಯ ಆಕ್ಸಿಡೆಂಟ್ ಆಚಿ.

ಇಕ್ಕ ಅಮ್ಮತ್ತಿ ಆಸ್ವತ್ತೆಲ್ ಉಂಡ್. ಎಣ್ಣೆಚಿ ದರ್ಶನ್.

ಅಯ್ಯೋ ದೇವಳೆ ಕೂತ್‌ಟ್ಟತ್ ಮಾಚಯ್ಯ.

ನೋಟಿ ಅಂಕಲ್ ನಿಂಗ ಗಾಬರಿ ಕಳಿಕತಿ. ನಾನ್ ಇಲ್ಲಿಯೆ ಉಳ್ಳ. ಇಂಇೂ ಡಾಕ್ಟರ್ ಒಂದೂ ಎಣ್ಣೆತ್ತಿಲ್ಲೆ. ನಿಂಗ ಆ ಪಚ್ಚಕ್ ಬೆರಿಯ ಪೊರಟಿತ್ ಬಾರಿ.

ಮಾಚಯ್ಯಂಗ್ ಕಣ್ಣ್ ಕಾಂಗತಾಚಿ. ದೇಚಮ್ಮಾಂದ್ ಕಾಕಿಯಂಡ್ ಮೊರಟಿತ್ ಮಾಚಯ್ಯ. ಆ ಸದ್ದಕ್ ಒಳಲಿಂಜ ಪೊಣ್ಣ್ ಓಡಿಯಂಡ್ ಬಾತ್.

ಎಂತಾಚಿ ನಿಂಗಕ್? ದಾಡ ಪೋನ್ ಕೇಟತ್ ಮಾಚಮ್ಮ.

ದಿವ್ಯ ದಿವ್ಯಂಗ್. ಮಿಂಇಾಕ್ ತಕ್ಕ ಬಕ್ಕತೆ ನಿಪ್ಪಚಿಟ್ಟತ್ ಮಾಚಯ್ಯ.

ಎಂತಾಚಿ ದಿವ್ಯಂಗ್?

ಆಕ್ಸಿಡೆಂಟ್

ಹ್ಲೆಂ. ಎಂತ ಎಣ್ಣೆಯೆಂಡುಳ್ಳಿರಾ? ನಂಗಡ ದಿವ್ಯಂಗಾ?

ಅಕ್ಕು. ಆಸ್ವತ್ತೆಲ್ ಉಂಡೆಲ್ಲೊ. ಮೊರಟಿತ್ ಮಾಚಯ್ಯ ಬೆರಿಯ ಏಳಿ ಪೋಕ. ಗಾಬರಿಲ್ ಬೊರತಂಡ್ ಪೊರಟಿತ್. ದಂಪತಿಯ ಓಡಿಯಂಡ್ ಆಸ್ವತ್ತೆಕ್ ಬಾತ್. ಅಲ್ಲಿಯೆ ಇಂಜ ದರ್ಶನ್ ಅಯಿಂಗಳ ತಕ್ಕ ಪರಿಚಿಟ್ಟತ್.

ಎಂತಾಚಿ? ನಾಡ ಮೋವಕ್ ಕೇಟತ ಮಾಚವ್ವ.

ಇಂಇೂ ಡಾಕ್ಟರ್ ಒಂದೂ ಎಣ್ಣೆತ್ತಿಲ್ಲೆ. ರಸ್ತೆಲ್ ಬಪ್ಪಕಾಪಕ ದಾರೊ

ಕಾರ್ಕಾರ ಇಡಚಂಡ್ ಪೋಯಿತ್ಯೊ. ಜನ ಗುಡ್ಡೆ ಕೂಡಿತಿಂಜತ್ ಆ ಟೈಂಕ್ ನಾನ್ ಪೋನ. ಕಾರ್ ಇಂಜಾಂಗ್ ಬೆರಿಯ ಎಡ್ಡ ಬಂದಿತ್ ಅಡ್ಡಿಟ್ ಮಾಡಿಯ. ಇಂಇೂ ಎಂತಾಂದ್ ಗೊತ್ತಲೆ.

ಮಾಚವ್ವ ಮೊರಡುವ ಕೂಡಚಿ.

ಸಮಾಧಾನ ಮಾಡಿಯೋಳಿ ಆಂಟಿ. ಅಂತ ಬಲ್ಯ ಆಕ್ಸೆಂಟ್ ಅಲ್ಲ. ದಿವ್ಯ ಚಾಯಿತೆ ಉಂಡ್.

ಇಲ್ಲೆ ನಾಡ ಮೋವಳ ನಾಕ್ ನೋಟತೆ ಸಮಾಧಾನ ಆಪುಲೆ. ನಾಕ್ ಇಕ್ಕಲೆ ನೋಟಂಡು.

ಇತ್ತಟಿ ಮಾಚಯ್ಯನೂ ಮೊರಟಡಿಂಜತ್.

ಸಮಾಧಾನ ಮಾಡಿಯೋಳಿ. ಒಂದೂ ಆಪದಿಲ್ಲೆ. ಎಲ್ಲಾಂಗೂ ದೇವ ಉಂಡ್. ನಲ್ಲದ್ ಮಾಡುವ, ಸಮಾಧಾನ ಮಾಡ್ಚಿ ದರ್ಶನ್.

ಡಾಕ್ಟರ್ ಪೊರಮೆ ಬಾತ್.

ಎಲ್ಲಾರು ಡಾಕ್ಟರ್ ಪಕ್ಕ ಪೋಚಿ.

ಎಂತಾಚಿ ಡಾಕ್ಟರ್? ನಂಗಡ ಮೋವಕ್?

ಬಲ್ಯ ತೊಂದರೆ ಒಂದೂ ಇಲ್ಲೆ. ಆಚೇಂಗಿ ಬಲ್ತ ಕಾಲ್ ಪೊಟ್ಟಿ ಪೋಯಿತ್. ಅದಂಗ್ ಇಕ್ಕ ಆಪರೇಷನ್ ಮಾಡಿತ್ ಬ್ಯಾಂಡೇಜ್ ಇಟ್ಟಿತ್. ಇಂಇ ಕೈಲ್ ಮಂಡೆಲ್ ಗಾಯ ಆಯಿತ್. ದಂಡ್ ಮೂಂದ್ ಸ್ವಿಚ್ ಇಟ್ಟಿತ್ ಬಲ್ಂಜನೆ ಒಂದೂ ಆಯಿತ್ಲೆ. ನಿಂಗಕ್ ಪೋಡಿ ಬೋಂಡ. ಆಚೇಂಗಿ ಕಾಲ್ ಕೂಡುವಲ್ಲಿ ಕೆತ್ತನೆ ಆರ್ತಿಂಗ ರೆಸ್ಪಲಿರಂಡು ಎಣ್ಣೆಚಿ ಡಾಕ್ಟರ್.

ಸೆರಿ ಡಾಕ್ಟರ್ ನಂಗ ಇಕ್ಕ ನೋಟಲುವಾ?

ನೋಟಿ, ಆಚೇಂಗಿ ಡಿಸ್ಪರ್ಬ್ ಮಾಡತಿ. ನಂಗ ಇಕ್ಕ ಆಪರೇಷನ್ ಮಾಡುವಕ್ ಇಂಜೆಕ್ಷನ್ ಕೊಡತಿತ್ ಅವ ವರ್ಕ್ ಮಂಕ್ಲುಂಡ್. ನಿಂಗ ಕಾಕತಿ. ಅವಕ್ ಎಚ್ಚರಾಪಕ ಬೋಂಡೇಂಗಿ ಮೆಲ್ಲೆ ತಕ್ಕ ಪರೆಯಿರಿ ಜಾಸ್ತಿ ತಕ್ಕ ಪರಿಚಿಟ್ಟತೇಂಗಿ ಮಂಡೆ ನೊಂಬಲ ಬಪ್ಪ.

ಸೆರಿ ಡಾಕ್ಟರ್ ಎಣ್ಣೆಚಿ ಮಾಚಯ್.

ದಾರೇಂಗಿ ಒಬ್ಬೊ ನಾಡ ಕೂಡೆ ಬಾರಿ ಚೆನ್ನ ಮದ್ದ್ ಎಡ್ತ ಬರಂಡು.

ನಿಂಗ ಪೋಯಿತ್ ದೇಚ್ಚಮನ ನೋಟಿ. ನಾನ್ ಡಾಕ್ಟರಡ ಕೂಡೆ ಪೋಯಿತ್ ಬಪ್ಪಿ. ದರ್ಶನ್ ಮದ್ದ್ ಎಡ್ತ ಬಪ್ಪಕ್ ಪೋಚಿ.

ಮಾಚಯ್, ಮಾಚಮ್ಮ ದಿವ್ಯಂಡ ಪಕ್ಕ ಪೋಚಿ. ದಿವ್ಯಂಡ ಅವಸ್ಥೆ ನೋಟಿತ್ ಮೊರಡುವ ಕೂಡ್ಚಿ ಮಾಚವ್.

ದಿವ್ಯನ ನೋಟಿಯಂಡ್ ಬೆಡ್ಡಲ್ ಅಳತತ್.

ಅಕ್ಕಣೆಕ್ ಮದ್ದ್ ಎಡ್ತಂಡ್ ಒಳಕ್ ಬಾತ್ ದರ್ಶನ್ ಅಕ್ಕಣೆಕ್ ಮಾಚಯ್.

'ನೋಟಿಪ್ಪಾ ನೀನ್ ದಾರ್ ಎಂತೊ ಗೊತ್ತಾಲೆ. ಆಚೇಂಗಿ ನಂಗಕ್ ತುಂಬಾ ಸಹಾಯ ಮಾಡಿಯ. ದಿವ್ಯನ ಆಸ್ಪತ್ರೆಕ್ ಕೂಟಿಯಂಡ್ ಬಂದಿಯದೂ ಅಲ್ಲತೆ ಇಚ್ಚಕ್ ಓಡಿಕಳಿಚಂಡುಳ್ಳಿಯಾ. ನೀಡ ಋಣತ್‌ನ ಎನ್ನನೆ ತೀಕಂಡೂಂದ್ ಗೊತ್ತಾಪಾಲೆ. ತುಂಬಾ ಧ್ಯಾಂಕ್ಸ್ ಮೋನೆ. ಎಣ್ಣೆಚಿ ಮಾಚಯ್.

ಪರೋಲೆ ಅಂಕಲ್. ದಾರಾಚೇಂಗಿಯೂ ನಂಗ ಸಹಾಯ ಮಾಡಲು ಗೊತ್ತಿಕ್ಕಂಡೂಂದೇ ಇಲ್ಲೆ. ಅದ್ ಮಾಲವಂಡ ಗುಣ.

ತುಂಬಾ ನಲ್ಲದ್ ಮೋನೆ. ಈ ಕಾಲತ್ ನಿನ್ನಂತ ಮಕ್ಕ ಇಪ್ಪದ್ ಕಷ್ಟ ಇಂಞ ನಂಗ ಇಲ್ಲಿಯೆ ಇಪ್ಪ ನೀನ್ ಮನೆಕ್ ಪೋ.

ಇಲ್ಲೆ ಅಂಕಲ್ ದೇಚಮ್ಮಂಗ್ ಎಚ್ಚರಾಡ್. ನಾನ್ ತಕ್ಕ ಪರಿಚಿಟ್ಟಂಡ್ ಪೋಪಿ. ನಾಡ ಮನೆ ಇಲ್ಲಿಯೆ ಪಕ್ಕತುಳ್ಳೆ. ಅದೂ ಅಲ್ಲತೆ ನಾಕ್ ದೇಚಮ್ಮನ ಗೊತ್ತುಂಡ್. ಅವ ಎಕ್ಕಾಲು ನಂಗಡ ಮನೆರೆ ಮಿಂಞಕಾಲೇ ನಡ್ಂದಂಡ್ ಪೋಪ. ಪರಿಚಯ ಉಂಡ್.

ಓಹೋ, ಅಕ್ಕುವಾ ಸೆರಿ ಅಂದಕ ಎಣ್ಣೆಚಿ ಮಾಚಯ್.

ಎಂತ ಮಾಡಿಯಂಡುಳ್ಳಿಯಾ ಮೋನೆ ನೀನ್?

ನಾನ ಆರ್ಮಿಲ್ ಉಳ್ಳೆ, ಇಕ್ಕಾಯಿತ್ ಮೂಂದ್ ತಿಂಗ ರಜತ್ ಬಂದ ರಜ ತೇವಕಾಚಿ ಬಪ್ಪವಾರ ಪೋಂಡು. ನಾಡ ಪೆದ ದರ್ಶನ್ಂದ್ ಎಣ್ಣೆಚಿ.

ನಲ್ಲದಪ್ಪಾ. ಚಾಯಿಲಿರ್. ಎಣ್ಣೆಚಿ ಮಾಚಯ್ಯ.

ಮೆಲ್ಲೆ ಕಣ್ಣೆ ತೊರಂದತ್ ದಿವ್ಯ.

ದಿವ್ಯ ದಿವ್ಯ ಕಾಕ್‌ಚಿ ಮಾಚಮ್ಮ.

ಮಂಡೆನ ಪುಡ್‌ಚಂಡ್ ಕಾಕ್‌ಚಿ. ಎಂತಾಚಿ ಮೋಳೆ ನೀಕ್.

ದಿವ್ಯಂಡ ಕಣ್ಣೆಲ್ ನೀರ್ ಬಾತ್. ಸುತ್ತ ನೋಟಿಚಿ. ಮಿಂಇತ್ ದರ್ಶನ್.

ದರ್ಶನ್ ತೆಳಿಚಂಡೆ ಸಮಾಧಾನ ಎಣ್ಣೆಚಿ.

ಅಂಕಲ್ ದಿವ್ಯ ತಕ್ಕ ಪರೆವ. ನಾನ್ ಪೋಪಿ.

ಸೆರಿ ಮೋನೆ ಆಚಿ ಎಣ್ಣೆಚಿ ಮಾಚಯ್ಯ.

ದಿವ್ಯ ಅಪ್ಪವ್ವನ ನೋಟಿತ್ ಮೊರಡುವ ಕೂಡ್‌ಚಿ. ನಡಂದಾನ ಎಣ್ಣೆಚಿ.

ಸೆರಿ ಮೋಳೆ. ನೀನ್ ಬೇಜಾರ ಮಾಡತೆ ದೇವ ಉಂಡ್. ದೇವಳ ಗೇನ ಮಾಡ್. ನೀಕ್ ಬಲ್‌ಂಜನೆ ಒಂದೂ ಆಯಿತ್‌ಲೆ. ಕಾಲ್ ಮುರುಂಜಿ ಪೋಯಿತ್. ಅದ್ ಬುಟ್ಟತೇಂಗಿ ಬಲ್ಯ ಗಾಯ ಒಂದೂ ಇಲ್ಲೆ. ಎಣ್ಣೆಚಿ ಮಾಚಮ್ಮ. ದಿವ್ಯ ಮೇಲ್ಲೆ ತಾಂಡ ಕಾಲ್‌ನ ನೋಟ್‌ಚಿ. ಕಾಲ್‌ಕ್ ಬ್ಯಾಂಡೇಜ್ ಇಟ್ಟತ್ ನೇತುವಕಯ್ಯಲೆ. ಮೊರಟತ್ ದಿವ್ಯ.

ಸಮಾಧಾನ ಮಾಡಿಯವ್ವ ಇಂಇ ಆರ್‌ತಿಂಗತ್‌ಲ್ ಎಲ್ಲಾ ಸೆರಿಯಾಪ. ನೀನ್ ಮಾಮೂಲ್‌ರನಕೆ ಆಪಿಯಾ. ಎಣ್ಣೆಚಿ ಮಾಚಯ್ಯ.

ದಂಡಾಳೂ ಕೂಡಿಯಂಡ್ ದಿವ್ಯನ ಸಮಾಧಾನ ಮಾಡ್‌ಚಿ. ಅಕ್ಕಣೆಕ್ ದರ್ಶನ್ ಬಾತ್.

ನೋಟಿ ಅಂಕಲ್ ಆಂಟಿ, ನಿಂಗ ಸುದ್ದಿ ಕೇಟಿತ್ ಬೆರಿಯ ಬಂದ್‌ಟಿರಾ. ಇಕ್ಕ ಮನೆಕ್ ಪೋಯಿ. ನಾನ್ ಇಲ್ಲಿ ಇಪ್ಪಿ. ದಿವ್ಯಂಡ ಬಗ್ಗೆ ನಿಂಗಕ್ಕೊಂದು ಬೇಜಾರ ಬೋಂಡ. ಮನೆಲ್ ಎಲ್ಲಾ ಸೆರಿ ಮಾಡಿತ್ ಬಾರಿ ನಾನ್ ದಿವ್ಯನ ನೋಟಿಯವಿ.

ಬೋಂಡಪ್ಪ, ನೀಕೆನ್ನಂಗ್ ಕಷ್ಟ ನಂಗಳೆ ಇಲ್ಲಿ ಇಪ್ಪ.

ಇಲ್ಲೆ ಅಂಕಲ್, ಅಂತಿಂತೂ ನಾನ್ ಮನೆಲ್ ಮುಂಡತೆ ಇಪ್ಪೊ. ಅದ್ ನ ಇಲ್ಲಿಯೆ ಇಪ್ಪಿ. ಮನೆಲೂ ಎಣ್ಣೆತ್ ಬಂದಿಯೆ ನಿಂಗ ಪೋಯಿತ್ ಬಾರಿ.

ದರ್ಶನ್ ತಕ್ಕ ಮಾಚಯ್ಯಂಗ ಸೆರೀಂದ್ ಆಚಿ. ಅತ್ತಕಡಚಿಯ ನಾಯಿ, ಪೂಂಇ. ಎಲ್ಲಾನೊ ಅನ್ನನೆ ಬುಟ್ಟಿತ್ ಬಂದಿತ್. ಜೊತೆಕ್ ನವ್ಯನೂ ಕಾಲೇಜಿಂಜ ಬಪ್ಪ. ಪೋಯಿತ್ ಎಲ್ಲಾ ಸೆರಿ ಮಾಡಿಯಂಡ್ ಬಕ್ಕಲೂಂದ್ ಗೇನ ಮಾಡಿಯಂಡ್ ಪೊರಟತ್ ಮಾಚಯ್ಯನೂ, ಮಾಚವ್ವನೂ.

ದಿವ್ಯ ನಂಗ ಪೋಯಿತ್ ಬೆರಿಯ ಬಪ್ಪ. ನೀನ್ ಬೇಜಾರ ಮಾಡತೆ. ಏಳು ಗಂಟೆರೊಳಲ್ ಬಂದಿತತ್ತುವ. ನೋಟ್ ಇಯಂಗ ನೀಡ ಜೊತೆಲ್ ಇಪ್ಪ. ಇಯಂಗಳೆ ನಿನ್ನ ಇಲ್ಲಿಕ್ ಅಡ್ಡಿಟ್ ಮಾಡಿಯೆ. ನಂಗ ಬರಣೆ ನಿನ್ನ ನೋಟಿಯವ, ಎಂತ ಬೋಂಡೇಂಗಿಯೂ ಇಯಂಗಳ ಕೇಳ್. ಪೊರಟತ್ ಮಾಚಯ್ಯ, ಮಾಚಮ್ಮ.

ದಿವ್ಯ ಮಂಡೆ ಆಟ್ ಚಿ.

ದರ್ಶನ್ ದಿವ್ಯನ ನೋಟಿತ್ ಬೇಜಾರ ಆಚಿ. ಪಕ್ಕ ಬಂದಿತ್ ದಿವ್ಯಂಡ ಪಕ್ಕ ಅಳತಂಡತ್.

ದೇಚು, ಬೇಜಾರ ಮಾಡತೆ. ಎಲ್ಲಾ ಸೆರಿಯಾಪ. ನಾಕ್ ಗೊತ್ತುಂಡ್. ಇದೆಲ್ಲಾ ನಾಡಕೊಂಡೆ ಆಯಿಯೆ. ನೀನ್ ಎಂತನೊ ಗೇನ ಮಾಡಿಯಂಡ್ ಬಂದಂಡಿಂಜಿಯ.

ಇಲ್ಲೆ. ದರ್ಶನ್ ಅದ್ ಅನ್ನನೆಲ್ಲಾ.

ನೀನ್ ಜಾಸ್ತಿ ತಕ್ಕಪರಿಯತೆ ಮಂಡೆ ನೊಂಬಲ ಆಪ. ಡಾಕ್ಟರ್ ಎಣ್ಣೆತ್. ಬೆರಿಯ ವಾಸಿ ಆಪ. ನೀನ್ ಬೇಜಾರ ಮಾಡತೆ ನಾನುಳ್ಳ ನೀಡ ಕೂಡೆ. ಸಮಾಧಾನ ಮಾಡಚಿ ದರ್ಶನ್.

ದಿವ್ಯಂಡ ಕಣ್ಣೆಲ್ ನೀರ್ ಬಾತ್.

ಮೊರಡತೆ ದೇಚು. ನಾನ್ ಉಳ್ಳ ಅಲ್ಲಾ. ನೀಕ್ ಎಂತೇಂಗಿ ಆಯಿತಿಂಜಕ ಎಂತ ಗತಿ? ನಾನ್ ಪೋನ ಪಿಂಇ ಬಪ್ಪಕೂ ಕಯ್ಯುವಂಜಿತಿಲ್ಲೆ. ಇಕ್ಕ ನಾನ್ ಉಳ್ಳ ನೀಕೆಂತ ವರೀಸ್. ಎಲ್ಲಾ ಚಾಯಾಪ. ಇಂಇ ಆರ್ ತಿಂಗತ್

ಒಳಲ್ ನೀನ್ ಮಿಂಞತ ಮಾದರಿಯೆ ಓಡಿ ಕಳಿಪಿಯಾ. ಎಣ್ಣಿಯಂಡ್ ಕಣ್ಣೀರ್ ತೇಟ್ಚಿ ದರ್ಶನ್.

ನಾನ್ ನೀಕ್ ಏದ್ ಗಳಿಗಲ್ ಆರ್ತಿಂಗ ಟೈಂ ಬೋಂಡೂಂದ್ ಕೇಟನೊ ಗೊತ್ತಿಲ್ಲೆ. ಆಚೇಂಗಿ ಇಕ್ಕ ಅನ್ನನೆ ಆಯಿಪೋಚಿ. ಆರ್ತಿಂಗಕೆತ್ತನೆ ನಾಕ್ ನಡಪಕ್ ಕೂಡಿ ಕಯ್ಯಲೆ. ಮೊರಟತ್ ದಿವ್ಯ.

ದೇಚು ನೀನ್ ಮೊರಟತೇಂಗಿ ನೀಡ ನೊಂಬಲ. ಇಂಞೂ ಜಾಸ್ತಿ ಆಪ. ನೀನ್ ಇಕ್ಕ ರೆಸ್ಪ್ ಎಡ್ಡ ಎಣ್ಣಿಯಂಡ್ ರಗ್ಗ್ ಪೊದೆಪಿಚಿಟ್ಟತ್ ದರ್ಶನ್.

ದಿವ್ಯ ತಾನೆ ಮನಸ್ಸಾರೊಳ್ ದುಃಖ ಪಟ್ಟಂಡ್ ಬುದ್ಧಂಡತ್. ಅಕ್ಕಣೆಕ್ ಮಾಚಮ್ಮ ಒಳಕ್ ಬಾತ್.

ಓಹೋ, ಆಂಟಿ ಬಂದಿರಾ. ಬಾರಿ ಅಂಕಲ್ ಬಂದಿತಿಲ್ಲೆಯಾ.

ಇಲ್ಲೆ. ಇಂದ್ ನಾನ್ ಇಲ್ಲಿಯೆ ಇಪ್ಪಿ. ಅಯಿಂಗ ಮನೆಲ್ ಇಪ್ಪ. ಮನೆರ ಕೆಲಸವೂ ಸುಮಾರ್ ಉಂಡ್.

ಎಣ್ಣೆಚಿ ಮಾಚಮ್ಮ.

ಸೆರಿ ಆಂಟಿ ಅಂದಕ ನಾನ್ ನಾಳೆ ಬಪ್ಪಿ. ಇದ್ ದಿವ್ಯಂಡ್ ಬ್ಯಾಗ್ ನಾನ್ ಅಕ್ಕಲೆ ತಪ್ಪಕ್ ಮರ್ಂದಾಟ. ಬ್ಯಾಗನ ಕೊಡತತ್ ದರ್ಶನ್.

ಪರೋಲೆ ಮೋನೆ. ಗಡಿಬಿಡಿಲ್ ದಾರೂಕೂ ಎಂತ ಮಾಡಂಡುಂದೆ ಗೊತ್ತಾಪುಲೆ. ನೀನ್ ನಾಡ ಮೋವಡ ಪ್ರಾಣ ಉಳಿಚಿಟ್ಟಿಯಾ? ನೀಕ್ ಎಚ್ಚಕ್ ಥ್ಯಾಂಕ್ಸ್ ಎಣ್ಣಕಲೂ ಪೋರ. ಒರ್ ದಿನ ಮನೆಕ್ ಬಾ ಎಣ್ಣೆಚಿ ಮಾಚಮ್ಮ.

ಒರ್ ದಿನ ಅಲ್ಲ. ಎಕ್ಕಾಲು ಬೋಂಡೇಂಗಿ ಇಪ್ಪಿ. ನಾನೆ ನಿಂಗಡ ಮೈಮೋಂದ್ ಎನ್ನನೆ ಎಣ್ಣಡ್ ನಿಂಗಕ್ ಮನಸ್ಸಲೆ ಗೇನ ಮಾಡಿಯಂಡತ್ ದರ್ಶನ್.

ಎಂತ ಮೋನೆ ಗೇನ ಮಾಡಿಯಂಡುಳ್ಳಿಯಾ?

ನೆಟ್ಚಿ ದರ್ಶನ್.

ಒಂದೂ ಇಲ್ಲೆ ಆಂಟಿ. ನಾಕ್ ಜಾಸ್ತಿ ರಜೆ ಇಲ್ಲೆ ಬಪ್ಪವಾರೇ ಪೋಂಡು.

ಅದ್ ಗೇನಾಚಿ ಅಚ್ಚಿಕೇ.

ಪರೋಲೆ. ಇಂಇಗೋರ್ ಕುರಿ ರಜೆ ಕ್ಹಟ್ಟುವಕ ಬಾ. ನೀಕ್ ಒರೂ ಬೇಜಾರ ಬೋಂಡ. ನೀಡನ್ನತ ಕ್ಣಂಂಗ ಈ ಕಾಲತ್ ಇಪ್ಪದೆ ಕಮ್ಮಿ. ಕಂಡಿತೂ ಕಾಂಗತ ಮಾದರಿ ಕಳಿಪ. ಅನ್ನತಲ್ಲಿ ನೀನ್ ಇಚ್ಚಕ್ ಸಹಾಯ ಮಾಡಿಯ. ನಿನ್ನ ಮರ್ಪಕಯ್ಯುಲೆ ಎಣ್ಣೆಚಿ ಮಾಚಮ್ಮ.

ಆಂಟಿ ತುಂಬಾ ನನ್ನ ಹೊಗಳತಿ. ನಾನ್ ಅನ್ನತ ಘನಕಾರ್ಯ ಒಂದೂ ಮಾಡಿತಿಲ್ಲೆ. ನಾಡ ಜಾಗತ್ ದಾರ್ ಉಂಡೇಂಗಿಯೂ ಈ ಕೆಲಸ ಮಾಡಿತೇ ಮಾಡುವ. ನಿಂಗ ಬೇಜಾರ ಮಾಡತಿ. ಎಂತ ಸಹಾಯ ಬೋಂಡೇಂಗಿಯೂ ನಾಕ್ ಪೋನ್ ಮಾಡಿ. ನಾಕ್ ಒಂದೂ ಬೇಜಾರ ಇಲ್ಲೆ. ಬೈಟೆಕ್ ಕೂಳ್ ಎಡತ ಬರಡಾ?

ಬೋಂಡ ನಾನೆ ಮಾಡಿಯ. ಬಂದಿಯೆ.

ಸೆರಿ ಆಂಟಿ. ನಾಳೆ ಕಾಂಬಿ. ಬಕ್ಕಡಾ. ಪೊರಟತ್ ದರ್ಶನ್.

ಎಂತಾ ನಲ್ಲ ಕ್ಣಂ. ಎಚ್ಚಕ್ ಮರ್ಯಾದಿ. ಕ್ಹೆಚ್ಚೇಂಗಿ ಇವಂಡನ್ನತ ಕ್ಣಂ ಕಟ್ಟಂಡು. ನಂಗಡ ದಿವ್ಯನ ಮಂಗಲಾಪಂವೊ ಎನ್ನನೆ ಇಪ್ಪೊ. ದಾರಕ್ ಗೊತ್ತ ಮನಸ್ಸಲೆ ಗೇನ ಮಾಡಿಯಂಡತ್ ಮಾಚಮ್ಮ.

ದಿವ್ಯ ವರ್ಕಲ್ ಉಂಡ್. ಮಾಚಮ್ಮ ಕುರ್ಚಿಲ್ ಗೇನ ಮಾಡಿಯಂಡ್ ಅಳ್ತತ್.

ದಿವ್ಯ ನೀಕ್ ಮಂಗಲ ಕಯಿಕಂಡೂಂದ್ ಗೇನ ಮಾಡ್ಚಿ. ಅಕ್ಕಣೆಕ್ ಇನ್ನನೆ ಆಚಿಲ್ಲಾ. ಇಂಇ ಒರ್ ಕಾಲ ಕೆತ್ತನೆ ಒಂದೂ ಕಯ್ಯುಲೆ. ಇದಂಗ ಎಣ್ಣುವೊ. ನಂಗ ಗೇನ ಮಾಡುವೊ ಒಂದ್ ನಡಪ ಒಂದ್. ಎಲ್ಲಾಂಗೂ ಕಾಲ ಕೂಡಿ ಬರಂಡು ನೀಡ ಅದೃಷ್ಟ ಇನ್ನನೆ ಆಡೂಂದ್ ಇಂಜತ್ ಆಚಿ.

ದಾರನೊ ಎಣ್ಣೆತ್ ಪ್ರಯೋಜನ ಇಲ್ಲೆ. ಹಣೆಬರಹತ್ ಎಂತ ಎಳ್ಳದಿತೊ ಅದ್ ಆಯಿತೇ ಆಪ. ತಾನೆ ಗೇನ ಮಾಡಚಿ ಮಾಚಮ್ಮ.

ಪಿತ್ಯಂದ್ ಪೊಲಾಕ ಆಚಿ. ದಿವ್ಯಂಗ್ ಮೆಲ್ಲೆ ಮೆಲ್ಲೆ ನೊಂಬಲ ಗೊತ್ತಾಪಕಾಚಿ. ಮೇಲ್ಡಿ ನೋವ ಕೂಡ್ಚಿ. ಮಾಚಮ್ಮ ದಿವ್ಯಂಗ್ ಬ್ರಷ್

ಮಾಡಿಚಿಟ್ಟಿತ್ ಬ್ರೇಕ್‌ಫಾಸ್ಟ್ ಕೊಡ್‌ತಡುಂಡ್. ಅಕ್ಕಣೆಕ್ ದರ್ಶನ್ ಬಾತ್.

ಗುಡ್ ಮಾರ್ನಿಂಗ್ ಆಂಟಿ. ಗುಡ್‌ಮಾರ್ನಿಂಗ್ ದೇಚಮ್ಮ ಎನ್ನನೆ ಉಳ್ಳಿರಾ?

ದಿವ್ಯ ತೆಳಚತ್.

ಅಕ್ಕಣೆಕ್ ನರ್ಸ ಬಂದಿತ್ ಮಾಚಮ್ಮನ ಡಾಕ್ಟರ್‌ರ ಪಕ್ಕ ಪೋಪಕೆಣ್ಣಾಚಿ. ದರ್ಶನ್ ನಾನ್ ಚೆನ್ನ ಡಾಕ್ಟರ್‌ರ ಪಕ್ಕ ಪೋಯಿತ್ ಬಪ್ಪಿ ನೀನ್ ಚೆನ್ನ ಇಲ್ಲಿಯೆ ಇಪ್ಪಿಯಾ.

ಆಚಿ. ಆಂಟಿ. ಪೋಯಿತ್ ಬಾರಿ. ಮಾಚಮ್ಮ ಪೋಚಿ.

ದೇಚು. ನಾನ್ ಬ್ರೇಕ್‌ಫಾಸ್ಟ್ ತರಡಾ? ಕೇಟತ್ ದರ್ಶನ್.

ಮಂಡೆ ಆಟ್‌ಚಿ ದಿವ್ಯ.

ಸ್ಪೂನ್‌ಲ್ ಮೆಲ್ಲೆ ಮೆಲ್ಲೆ ಕೊಡತತ್ ದರ್ಶನ್.

ದರ್ಶನ್ ದಯಬೆಚ್ಚಿತ್ ಮಾಘ್ ಮಾಡಿರ್. ನಾನ್ ನೀಕ್ ಸುಮಾರ್ ನೊಂಬಲ ಮಾಡಿಯೆ. ಆಚೇಂಗಿ ನೀನ್ ಅದನ್ನೆಲ್ಲಾ ಮನಸ್‌ಲ್ ಬೆಚ್ಚಂಡಿತ್ತಿಲ್ಲೆ. ಎಲ್ಲಾ ತಪ್ಪು ನಾಡದೆ.

ದೇಚು ನೀನೆಂತ ತಪ್ಪು ಮಾಡಿಯಾ? ನೀಡದೊಂದ್ ಇಲ್ಲೆ. ನಾನ್ ಎಲ್ಲಾ ಮಾಡ್‌ನಂವೊ. ನಾಡ ಮೇಲೆರ ಚೆಡಿಕೆ ನೀಕ್ ಇನ್ನನೆ ಆಚಿ. ನಾನ್ ಎಣ್ಣೆ ವಿಷಯತ್‌ನ ಗೇನ ಮಾಡಿತ್ ಮಂಡೆ ಪಾಳ್ ಮಾಡಿಯಂಡಿಯಾ ನೀನ್.

ಇಲ್ಲೆ ದರ್ಶನ್ ನಾನ್ ಎಣ್ಣುವದ್ ನೀಕ್ ಅರ್ಥ ಆಯಂಡಿಲ್ಲೆ. ನಾಕ್ ಎನ್ನನೆ ಎಣ್ಣುಂಡುಂದೆ ಗೊತ್ತಾಲೆ. ನಾನೇ ಆ...ಆ... ಬಿಕ್ಕಚಿ ದಿವ್ಯ.

ದಿವ್ಯ, ದಿವ್ಯ ದೇಚಮ್ಮ. ನಾಕ್ ಗೊತ್ತುಂಡ್.

ಗೊತ್ತುಂಡಾ ನೀಕ್? ಆಶ್ಚರ್ಯತ್ ಕೇಟತ್ ದಿವ್ಯ.

ಅಕ್ಕು ನೀನ್ ಮುಚ್ಚಿತ್ ಬೆಚ್ಚಿ ಸತ್ಯ ನಾಕ್ ಗೊತ್ತುಂಡ್. ನಾಡ ದಿವ್ಯನೂ, ನೀನೆ ದೇಚಮ್ಮನೂ ನೀನೆ. ನಾಡ ಕಣ್ಣಾಮಿಂಗಳ್ ನೀನ್ ಉಂಡೇಂಗಿಯೂ,

ನೀನೆ ದಿವ್ಯಂದ್ ಗೊತ್ತ್ ಪುಡಿಕತಾಯಿಟ. ಆಚೇಂಗಿಯೂ ನಾಡ ಮನಸ್ಸೆ
 ಎಣ್ಣುವಯಿಂಜತ್. ನೀನ್ ನಾಕ್ ಕಟ್ಟತೇ ಕಟ್ಟಿವಿಯಾಂದ್ ಅದ್ ನೇರೆ.
 ದಾಡ ದಾಡ ಅದ್ಯಷ್ಟ ಎನ್ನನೆ ಉಂಡೊ ಅದ್ ಆಯಿತೇ ಆಪ. ನೀಕ್
 ನಾನೆ ದಿವ್ಯಂದ್ ಎನ್ನನೆ ಗೊತ್ತಾಚಿ. ಕೇಟತ್ ದಿವ್ಯ.

ದರ್ಶನ್ ಡೈರಿನ ಕಾಟಿ ಕೊಡತತ್. ನೀಕ್ ಆಕ್ಸಿಡೆಂಟ್ ಆಪಕ ಮನೆಕ್
 ಅರಿಚಿಡುವಕ್ ಬ್ಯಾಗ್‌ಲ್ ಎಂತೇಂಗಿ ಉಂಡಾಂದ್ ನೋಟ್‌ನ. ಅಕ್ಕಣೆಕ್
 ಡೈರಿ ಕಟ್ಟ್‌ಚಿ. ಅಲ್ಲಿ ನೀಡ ಪೋನ್ ನಂಬರ್ ಅಡ್ರೆಸೂ ಇಂಜತ್. ಅನ್ನನೆ
 ಡೈರಿನ ಪೇಜಿ ತಿರಾಕುವಕ ಅಲ್ಲಿ Sorry ದರ್ಶನ್‌ಂದ್ ಎಳ್ಳಿತಿಂಜದ್
 ಕಂಡೆ. ಎಡತಿತ್ ಓದ್‌ನ. ನೀನ್ ಎಳ್ಳೆನ ಎಲ್ಲಾ ವಿಷಯ ನಾಕ್ ಗೊತ್ತಾಚಿ.
 ನೀನ್ ಇದ್‌ನ ಎಣ್ಣುತಾಂಗ್ ಚೆಡಿಯೂ ಬಾತ್. ಆಚೇಂಗಿ ಎಂತೊ ಒರ್
 ತರ ಋಷಿ. ನಾನ್ ಗೇನವೇ ಮಾಡಿತಿಂಜಿಲೆ. ನೀನೇ ದಿವ್ಯಂದೂ ನಾಡ
 ಮನಸ್ಸಾಕಾಯಿತಿಲ್ಲೆ. ಆಚೇಂಗಿ ನಾಡ ಲೈಫ್‌ಲ್ ನಾನ್ ಇಷ್ಟಪಟ್ಟ ಫಸ್ಟ್
 ಮೂಡಿಯೂ ನೀನೆ. ಲಾಸ್ಟ್ ಮೂಡಿಯೂ ನೀನೆ. ನಾನ್ ದಂಡಾಳ್‌ನ
 ಕೊದಿಚಂದ್ ಗೇನ ಮಾಡ್‌ನ. ಆಚೆಂಗಿ ಆ ದಂಡೂ ಮೂಡಿ ಒಬ್ಬಳೇಂದ್
 ನೀಡ ಡೈರಿ ಓದಿತಾನದು ಗೊತ್ತಾಚಿ. ಇದಂಗೆ ಎಣ್ಣುವೋ ದೇಚು ದಾರ್
 ದಾರ್‌ಕ್ ಎಂತ ಕಟ್ಟಂಡು ಅದ್ ಕಟ್ಟತೆ ಕಟ್ಟುವ ಅದ್ಯಷ್ಟ ಉಂಡೇಂಗಿ.
 ಅದ್ ಎಲ್ಲಿ ಉಂಡೇಂಗಿಯೂ ನಂಗಳ ತೇಡಿಯಂಡ್ ಬಪ್ಪ. ಎಣ್ಣೆಚಿ
 ದರ್ಶನ್.

ದರ್ಶನ್ ದಯಬೆಚ್ಚಿತ್ ನನ್ನ ಮಾಘ್ ಮಾಡ್. ನಾಡ ಕ್ಕೊಂಡ್
 ನೀಕ್ ಸುಮಾರ್ ತೊಂದರೆ ಆಚಿ. ಆಚೇಂಗಿ ಇಂಞ ಮಿಂಞಕ್ ಇನನ್ನೆ
 ಆಪುಲೆ. ನಾಡ ಜೀಂವ ಉಂಡೇಂಗಿ ಅದ್ ನೀಕಾಯಿತ್ ಮಾತ್ರ ಮೊರಟತ್
 ದಿವ್ಯ.

ದರ್ಶನ್ ದಿವ್ಯಂಡ ಕಣ್ಣೀರ್‌ನ ತೇಟ್‌ಚಿ. ಕೈಪುಡ್‌ಚಂಡ್ ಸಮಾಧಾನ
 ಮಾಡ್‌ಚಿ.

ಮಾಚಯ್ಯ, ಮಾಚಮ್ಮ, ನವ್ಯ ಪಡಿಲ್ ಬಂದಿತ್ ನಿಂದಿತ್.

ದಿವ್ಯ, ದರ್ಶನ ತಂಗಡ ತಕ್ಕಲ್ ಮುಳಿತಿಂಜತ್. ಮಾಚಯ್ಯ,
 ಮಾಚಮ್ಮಂಗ್ ದಿವ್ಯಂಡ ಪಿಂಞ ದರ್ಶನ್‌ರ ವಿಷಯ ಗೊತ್ತಾಚಿ. ತಂಗ

ಗೇನ ಮಾಡ್‌ನ ಮೈಮನೆ ತಂಗಕ್ ಕ್‌ಟ್ವಾಚೀಂದ್ ಖುಷಿ ಪಟ್ಟತ್.

ದಿವ್ಯಂದ್ ಮಾಚಯ್ಯ ಕಾಕ್‌ಚಿ.

ಸ್ವರ ಕೇಟಿತ್ ದರ್ಶನ್ ದಿವ್ಯಂಡ ಕೈ ಬುಟ್ಟತ್. ದರ್ಶನ್ ಇಾಣತ್‌ರ ಕೂಟಕ್ ಬಜ್ಜಿರೋಂದ್ ಗೇನ ಮಾಡಚಿ.

ದರ್ಶನ್ ನಂಗ ನಿಂಗಡ ತಕ್ ಕೇಟಿತ್ ಎಲ್ಲಾ ಗೊತ್ತಾಚಿ. ನಂಗಕ್ಕೋರ್ ಬೇಜಾರ ಇಲ್ಲಿ. ಎಲ್ಲಾಡ ಒಪ್ಪಿಗೆ ಉಂಡ್. ಬಪ್ಪ ಮೇ ತಿಂಗತ್ ಮಂಗಲ ಕಯಿಕನಾ ಅಕ್ಕಣೆಕ್ ದಿವ್ಯನೂ ಚಾಯಾಪ. ಎಣ್ಣೆಚಿ ಮಾಚಯ್ಯ.

ದರ್ಶನ್ ದಿವ್ಯನ ನೋಟಾಚಿ.

ದಿವ್ಯ ಇಾಣತ್ ಮಂಡೆ ಬಗ್ಗಚಿಟ್ಟತ್.





ಹೈಸೂಡ್ಲರ್‌ಕಾರಕಾನ, ಹೊಟ್ಟೇಂಗಡ ಜನಕ ಪಿಂಞ
ಸುಶೀಲ (ತಾಮನೆ:ಚೇರಂಡ) ದಂಪತಿಯಡ ಮೂಂದನೇ
ಮೋವಕಾಯಿತ್ 1985ಲ್ ಪುಟ್ಟನ ಇವು ವಿದ್ಯಾಭ್ಯಾಸತ್‌ನ
ಶ್ರೀಮಂಗಲ ಪಿಂಞ ಮೈಸೂರ್‌ಲ್ ಮಾಡ್‌ಚಿ. ಚೆರಪತಿಂಜೇ
ಪತ್ರಿಕೆಲ್ ಲೇಖನ ಚುಟುಕ ಎಳ್ಳುವ ಹವ್ಯಾಸ ಇಂಜ
ಇಯಂಗಡ ಚುಟುಕ, ಕವನ, ಲೇಖನ ಪಿಂಞ ಚೆರಿಯ ಎಳ್ತ್
ಕೊಡವ ಪತ್ರಿಕೆಯೂ ಅಲ್ಲತೆ ರಾಜ್ಯಮಟ್ಟತ್‌ರ ಕನ್ನಡ
ಪತ್ರಿಕೆಲ್ ಪ್ರಕಟ ಆಯಿತ್, ಮೆಚ್ಚುಗೆ ಪಡಂದಂಡಿತ್. ಅಲ್ಲತೆ
"ತೆಡ್‌ಬಡಚತಾ" ಎಣ್ಣುವ ಪುಸ್ತಕವೂ ಪ್ರಕಟ ಆಯಿತ್.

2007ಲ್ ಪತ್ರಿಕೋದ್ಯಮತ್ ಎಂ. ಎ. ಪದವಿ ಪಡ್‌ಂದ
ಇವು, ಇಂಗ್ಲೀಷ್ ಸಾಹಿತ್ಯತೂ ಎಂ. ಎ. ಪದವಿನ ಪಡಂದಿತ್.
ಇಕ್ಕ್ ಮಡಿಕೇರಿರ ಫೀಲ್ಡ್ ಮಾರ್ಷಲ್ ಕೆ. ಎಂ. ಕಾರ್ಯಪ್ಪ
ಕಾಲೇಜ್‌ಲ್ ಉಪನ್ಯಾಸಕಿ ಆಯಿತ್ ಚಾಕರಿಲುಂಡ್.

ಇಯಂಗಡ ವಿಳಾಸ

ಹೊಟ್ಟೇಂಗಡ ಸ್ವಾತಿ

ಹೈಸೂಡ್ಲರ್ ಗ್ರಾಮ ಪಿಂಞ ಪೋಸ್ಟ್

ವಿರಾಜಪೇಟೆ ತಾಲ್ಲೂಕ್

ದ. ಕೊಡಗ

ಫೋನ್. : 9480730586